

54. 55 20.

32989

Z BIBLIOTEKI
SEMITA RYLA
SANDOMIERSKIEGO

Tab 49. LE VI II.

BREVIERE

DES


COVRTISANS,

*Ex libris son p[re]gato
ni) Gratoni Ince
men di*

Enrichy d'un grand nombre de
Figures.

PAR LE S^r. DE LA SERRE

Historiographe de France.



A BRUSSELLES,

32989

Chez FRANÇOIS VIVIEN,

derriere l'hostel de Ville:

Au bon Pasteur. 1630.

Avec approbation & Privilège.


Tab: 43

Num: 39

*Congr: Grat.
Studjant*

Handwritten text in red ink along the left edge, possibly a list or index.

Faint, illegible text in blue ink, possibly bleed-through from the reverse side of the page.



Faint, illegible text at the bottom of the page, possibly bleed-through or a signature.

A
TRES-HAVT,
ET
TRES PVISSANT
PRINCE
CHARLES
EVSEBE,

Prince du S. Empire, de Liech-
tenstein & Nicholspourg.
Duc de Troppau &
Yagherndort, &c.



ONSEIGNEVR

*Les hommes de
vostre Merite, & de vostre
Naissance, ont beau estre elle-*

à 4

uez

EPITTRE

nez sur le commun, par ces
 Prerogatives de Vertu, & de
 Nature. Si la Renomee ne
 parle d'eux aux siecles à ve-
 nir, leur gloire n'a point de
 plus longue estandue que celle
 de leur sepulture. Il faut ne-
 cessairement qu'ils ayent des
 Autels, & des Temples, où
 leur Memoire, treuvant un
 tombeau de Phenix, r'anime
 incessamment leurs cendres, pour
 les faire vivre dans la mort
 mesme. J'ay mis en avant ces
 veritez sur le sujet de vos
 perfections toutes enviees ;
 mais toutes inimitables, affin
 d'en eterniser le souvenir
 d'une

DEDICATOIRE.

d'une façon digne d'elles:
Car ayant fait apprendre par
cœur vostre nom aux Echôs
du mont de Parnasse; Je veux
que le bruit de vos louanges
rettentisse par toute la terre,
& que le Soleil soit moins co-
gnu que vous. Ce n'est point
un langage de compliment,
Monseigneur, les genereuses
qualités que vous possédez,
sont d'une nature beaucoup
plus noble que celle des astres,
parce qu'elles ne trouveront
jamais en vous d'occident, &
tous ces flambeaux des cieus
sont sujets aux esclipses. Ce
n'est pas qu'il n'y aye des Prin-

EPI T T R E

ces, & des Rois, qui vous res-
semblent en quelque chose;
Mais ie deffie le plus jaloux
d'honneur de pretendre juste-
ment à cete Gloire Immortel-
le que vous vous estes acqui-
se, en l'age d'adolescence où
vous respirés encore, par un
nombre infiny d'actions, qui
n'ont point de nom, pour estre
trop louables. I'ay pris plaisir
souvent d'estudier vostre hu-
meur, afin de cognoitre le prix
des choses les plus parfaites: Et
i'ay si bien employé mon temps,
qu'il faut que i'aduouè que
vous estes le seul au monde,
qui m'a ués fait voir la Vertu
dans

DEDICATOIRE.

dans son Trone, & avec toutes les douceurs, & toutes les graces, d'ont elle attire à soy les ames, & les cœurs. Mais que ne peut pas un Inuincible Thesee, guidé par le filet d'Ariane, dans le penible Dedale d'une auueugle jeunesse? Je veux dire, de quoy ne sont pas capables, les genereuses inclinations d'un nouveau Achille, animé de la Prudence de son cher Chiron? Vous estes trop parfait, Monseigneur pour nous servir d'exemple: Et toutesfois, je puis dire, que vous ne cognoisses pas vos perfections, parce que
n'ayant

EPI T T R E.

n'ayant jamais d'autre miroir,
 que celuy de vostre Humilité,
 il vous represente, avec la seu-
 le couronne de vostre Gran-
 deur ordinaire, & la Fortune,
 n'en a pas asses seulement pour
 couronner le moindre de vos
 Merites. De sorte qu'il ne
 nous est permis, que de vous
 admirer, & ie croy, me rendre
 moy mesme admirable, en pub-
 liant par tout que ie suis,

Monseigneur

Vostre Treshumble &
 tresobeissant seruiteur
 P. DE LA SERRE.

A

LVY-MESMES

STANCES.

Grand Prince tes vertus ont de si
puissans charmes,
Que tu peus asseoir tous les
mortels sans armes:

Ton seul Renom suffit pour conquerir les
cœurs;

Impose donc tes loix, establis ton Em-
pire.

Il me semble des-ja que le monde sou-
pire

D'esperance, & de ioye apres tes faicts
Vainqueurs.

Tu portes sur le Front l'image de ta
gloire!

Car tout ce que tu fais est digne de me-
moire.

Le bruit de tes vertus etonne les mor-
tels,

Ta

Tu fais encore vn coup pleurer cet Ale-
xandrè,
Qui n'a pü comme toy en vn age si ten-
dre,
Meriter icy bas de glorieux autels.

Tu nous parois si vieux nous paroissant
si sage,
Qu'on prendroit pour l'Hyuer le Prin-
temps de ton age,
Si tu ne faisois voir les fruits de ton Esté.
Mais en ton Orient, tu produis des Mer-
ueilles
Dignes de ton Midy: Elles sont sans pa-
reilles,
N'ayant point d'autre obiet que dans
l'Eternité;

DE LA SERRE.

QVA

Q V A T R A I N

A la louange de l'auteur.

*Tu as pü, grand Cezar, par liberalité,
Agrandir les Estats de ce genereux
Prince,
Mais le diuin La Serre, au lieu d'une
Prouince,
Luy Oëtroye le don de l'Immortalité.*

A V T R E.

*Delices de la Court, Ornement de la
Terre,
Librairie viuante, & Fleur des beaux
Espris,
Si les Muses pouuoient auoir des fauoris,
Leur Duc de Bouquingand s'appelleroit
La Serre.*

A L'AV

A L'AVTHEVR

Sur son liure.

*Si tes liures suiuant le bel Astre du
Monde
Courent tout l'vniuers pour luire à nos
Esprits,
Ta liberale main, quin'a point de seconde,
Te cueille des Lauriers dignes de tes
Escrits.*

AVTRE QVATRAIN

Sur le Portrait de ce Prince.

*Peintre ayant si bien joint ton art à la
Nature,
Pour nous montrer ça bas vn Prince si
parfait,
Iette là tes Pinceaux, & quitte ta pein-
ture;
Car que pourrois tu faire apres ce beau
Portrait?*

A V L E C T E V R

IE nete veux point persuader que
 cet ouvrage me soit echapé des
 mains, j'y ay employé tout le soin, &
 toute l'industrie qui m'a esté possible
 pour le metre à sō jour Les Merites de
 ce Prince, à qui il estoit destiné, m'ont
 engagé à ce deffain, & comme l'hon-
 neur, & le contentement, en sont in-
 separables, mes trauuaux ont des-ja
 produit ma Recompense. Tout le
 monde scait, que chacun a ses incli-
 nations affectees, dont on ne peut se
 desprendre qu'avec des puissans ef-
 fortz. Celle d'escrire me possede si
 absolument, quelle m'accompagne-
 ra dans le tombeau, quoy qu'elle
 promete de m'en exempter. Je m'e-
 stonne toutesfois, Que j'aye l'hu-
 meur & l'habitude, d'escrire, sans en
 auoir le don. Je ne fay que croasser,
 comme les Corbeaux parmy ces

Rossignols de court d'ont le degoise-
ment charme les cœurs , par les
oreilles ; Mais quoy le Ciel a des fa-
uoris aussi bien que les Roys. Si ie
n'ay qu'une plume de Corbeau , ie
m'en seruiray de pinceau pour faire
des nouveaux portraits de la mort, &
avec ce funeste artifice , ie chercheray
l'Immortalité par la voye du Trepas.

*Excuse les fautes de l'impression : Car
ie n'ay peu corriger les espreuues
de ma main.*

Som-

Sommaire du Priuilege.

PHilippe par la Grace de Dieu, Roy de Castille, de Lion, d' Aragon, &c. At permis & octroyé à François Viuien, marchand Libraire, & Imprimeur iuré de nostre ville de Brusselle, de pouuoir luy seul imprimer ou faire imprimer, vèdre, & distribuer vn liure intitulé Le Breviere des Courtisans, par le Sr. DE LA SERRE, & ce pour le terme de six ans, avec deffences à tous aultres Imprimeurs & Libraires, ou aultres de quelle qualité qu'ilz soyent, d'imprimer ou contrefaire ledict liure, où ailleurs imprimé & contrefaict apporter, vendre ou distribuer es pays & Signeuries de sa Majesté, durant ledict terme, à peine des confiscations des exemplaires, & aultres amendes, contenus plus amplement es lettres patentes dudit Priuilege, donné à Brusselle le 1. de Mars 1630.

Signé Coels.

C E N S U R A .

BReuiarium hoc Passionis Domini-
cæ à docto Auctore Aulicis con-
scriptum, etiam omnibus proderit, si
vt fasciculus myrræ inter duo vbera
animæ intellectus & affectus colloce-
tur. Ita censeo hac 16. Febr. 1630.

HENRICVS CALENVS

S. Theol. Licent. Archipres.

Bruxell. Libr. Censor.



LE BREVIERE

DES

COVRTISANS.

A MATINES.

CHAPITRE I.

Si fieri potest, transeat à me Calix iste.



ENTENDEZ VOUS pas la cloche de la parole du fils de Dieu, Messieurs les Courtisans, qui vous appelle à Matines, dans le iardin saeré de son Eglise. Vous voyez comme il commence seul, l'office de sa passion, sans que personne luy reponde. Le

A

Ciel

Ciel est muet, la Terre est sourde, ses Disciples sont endormis, & vous courez les rues de Hierusalem au son de vos luths, pour donner des serenades à vos Maistresses: Tandis que vostre Maistre, & vostre Redempteur tout ensemble, est reduit aux abois, par vn excez de tristesse & d'amour, voyant dans sa Prescience, que ses tourmens, & ses peines, seront inutiles pour vous, puis que vous tenez vostre partie en ce concert de musique que les Scribes & Pharisiens luy preparét, à la veille de ses funerailles. Vos ris le font pleurer, vos chants d'allegresse le forcent de se plaindre: vos promenades le tiennent à genoux, & tous vos autres plaisirs luy donnent mille atteinces de martyre. Ce qui l'oblige sans doute, à prier son Pere d'esloigner de luy le Calice de sa Passion. Il me semble qu'il parle de la sorte, selon ma pensee.

Mon

Mon cher Pere, vous voulez que
je rachapte le Monde de mon
sang, ie le desire aussi de tout
mon cœur, mais, où est ce Mon-
de ? le me voy seul abandon-
né en ce lieu solitaire, sans autre
compagnie que celle des Astres qui
m'esclairent. Les vns conjurent ma
mort, les autres en forgent les in-
strumens : Ceux cy comptent l'ar-
gent de mon achapt, & ceux là font
des parties de balet, & de musique
en faueur des Demons, pour rejoyir
les enfers ; he qui est-ce qui entrera
donc dans ma Barque, pour se sau-
uer du deluge de vostre Iustice ?
Me voila prest à partir, & pas vn ne
s'auance à dessein de m'accôpagner
en ceste nauigation du Caluaire, où
je doibs ietter l'ancre de ma Croix,
pour leur faire trouuer le port de
grace, & de salut. O Pere bien-
aymé, à quoy me sert donc la

„qualité que vous m'avez donnée
 „de Nocher, & de Pilote sur la mer
 „orageuse de ma Passion, si ces ames
 „criminelles que vous me baillez en
 „garde se precipitent en foule dans
 „les abysses du desespoir, à l'exem-
 „ple de Iudas, qui leur a des-ja donné
 „parole, de leur seruir de Capitaine.
 „Que le Calice donc de mes souf-
 „frances passe loing de moy, s'il vous
 „plaist, ou faictes que i'en boiue vti-
 „lement toute l'amertume, à la fanté
 „de tout le monde, afin que ie ne
 „porte pas en vain ce glorieux tiltre
 „de Sautieur. Mais toutesfois vostre
 „volonté soit faicte.

Voila le sens, selon mon imagina-
 tion, de la premiere priere que le fils
 de Dieu fait à son Pere, dans le Iardin
 des Oliues. Ne vous estonnez pas si
 au milieu de son oraison il se leue,
 pour esueilleer les Apostres, l'amour
 qu'il a pour eux, ne peut compatir
 avec

avec la crainte, du danger où ils sont.
Esueillez vous donc, Messieurs les
Courtisâns: Car vous dormez bien
plus fort que ces Disciples. Ils ne sont
assoupis que d'un sommeil innocent,
& le vostre vous rend hebeté jus-
ques au point de coure à vostre per-
te, & de soupirer après vostre ruine.
Quelle honte vous est ce; de chanter
avec l'infidèle Apostre des airs de tra-
hison, & de perfidie, dans les rues
d'une nouvelle Babylone. Vos luths
soupleurent, à leur façon de vostre mal-
heur, ils se plaignent de mesme, de
la durezza de vostre cœur, & de la ma-
lice de vostre ame, & l'armonie de
vostre voix ne charme de joye que
les Demons, dans le chemin où vous
estez, de vostre damnation.

Mais Seigneur, quel excez de bonté
guide vos pas à la mort. Je scay bien
que vous estes descédu du Ciel pour
nous y faire monter avec l'eschele de

vostre croix. Il me semble pourtant;
& il est vray, que par le prix d'un de
vos soupirs vous pouuiez rachepter
vn nombre infiny de mondes, quel-
le surabondance de satisfaction don-
nez vous donc à la Iustice de vostre
Pere? Que si par vn sentiment d'amour
vous vouliez ressentir nos miseres; ne
vous suffisoit il pas d'auoir espreuue
en naissant celle du froid, dans la
creiche? C'estoit trop pour vous, &
beaucoup plus encore pour nous-
mesme, & de la sorte vous pouuiez
commander au Ciel, & à tous les
Astres, de vous venir querir à l'in-
stant, & de vous porter dans le sejour
de vostre Eternité glorieuse; Amour
que tes merueilles sont grandes.
Vous n'auiez garde, ô doux Sauueur!
de dōner des limites à vos peines, puis
que vostre amour n'en auoit point.
Et c'est elle qui vous a faict espouser
nostre condition, avec tous les tour-
mens

mens qui luy sont propres. C'est elle
mesme qui vous a fait entrer dans le
monde par la porte d'un estable, &
qui vous en veut faire sortir mainte-
nant par celle d'un poteau ; que peut
on dire davantage ? Tellement que
ie ne m'estonne pas si vous priez vo-
stre Pere Eternel de faire passer loin
de vous ce nouveau Calice de dou-
leur qui se presente, puis que ç'a esté
vostre verre ordinaire, & que vous y
auez estanché dedans vostre soif
mille, & mille fois, depuis l'heureux
moment de vostre naissance. Priez
le donc hardiment, Seigneur ; sa Ju-
stice ne vous peut rien demander,
ayant acquitté nos debtes, avec la
monnoye de vostre sang mesme, sur
l'autel de vostre Circoncision. Ce
n'est rien encore, combien de lar-
mes auez vous respandues, dans vo-
stre berceau ? combien de cris en-
fantins auez vous jetté au vent ?

De sorte que si la plus petite de ces larmes & la plus foible de ces plaintes pouuoit suffisamment reparer l'enormité de nos crimes. La Iustice diuine vous doit du reste, il ne tiendra qu'à vous de refuser le Calice qui se presente. Vostre Pere le veut si vous le voulez; mais parce qu'il sçait la resolution que vous auez prise de mourir dans le Conseil secret de vostre Prescience, il ne peut exaucer vos prieres, & voir vos desseins accomplis.

Car apres tout Seigneur, ie sçay bien que les prieres que vous faictes à vostre Pere sont les mesmes que la Nature vous fait, pour conseruer ceste parfaicte vnion de vostre Corps si pur, avec vostre Ame si belle, afin que le trespas n'en rompe point l'estrainte. En effect vous deuez cela à vostre Sainte Humanité, d'employer tous les efforts de vostre voix, & de
vostre

vostre langue, pour obtenir quelque dispense de ceste amoureuse necessité, qui se veut abbreuuer de son sang innocent, autrement, on vous reprocheroit la haine de vous mesme, & elle ne peut compatir avec vostre Perfection; comme estant le plus parfait ouurage qui ayt esté iamais animé. Priez, priez donc Seigneur, puis que vostre adorable humanité vous en importune si fort. Allez pour la seconde fois plaider sa cause deuant vostre Pere Eternel, & il me semble que ie vous voy desia à genoux, & en action d'ouurir la bouche pour luy parler en ces termes, selon ma creance.

O Pere parfaitement aymable, & parfaitement aymé, ie vous demande pardon de la hardiesse que ie prens de vous importuner encore de la mesme priere que ie vous ay faicte de m'exempter de la mort, puis que de

toute eternité vous m'avez destiné dans vostre Prescience pour victime sur l'autel de la croix. Mais vous me permettez pourtant de vous représenter ceste amour extreme, qui me lie si estroitement avec moy-mesme, que ie n'en puis rompre les chaines que par la seul puissance de vostre commandement. Commandez donc tout ce qu'il vous plaira, afin que ie trouue ma consolation dans l'obeissance que ie vous ay vouee; ô diuines paroles!

Si vous n'auiez les oreilles bouchées, Messieurs les Courtisans, au son effroyable de vos luths, vous entendriez maintenant tous ces charmans discours, dont mon Sauueur faict resonner la melodie iusques dans le Ciel; Et sans doute vous seriez rauys par vn effort de pitié, ou d'estonnement, voyant cest aymable

ble Redempteur dans vn combat amoureux. Il desire mourir d'amour, malgré tous les efforts de l'amour qu'il doit à soy-mesme, & en ceste amoureuse dispute, la tristesse & la douleur possèdent egalement son ame: Car les plus purs sentimens de son cœur tiennent nostre party, & font pencher la balance de nostre costé. De sorte que quoy qu'il meure, par l'ennuy qu'il a de se resoudre à la mort, il se plaist à mourir deux fois, puis que l'amour qu'il a pour nous, en est la cause. De vous dire toutesfois, ce qu'il souffre durant le temps de ceste douce querelle, ie n'ay point des termes assez puissans pour exprimer la moindre de ses peines. Representez vous seulement que dans l'enuie qu'il a de mourir, son corps & son ame ne se peuvent resoudre à ceste cruelle separation, ny à subir la loy de l'adieu recipro-

reciproque que le trespas leur veut imposer. Tellement qu'il forge dans son sein tous les traits de son martyre, dont les douleurs ne se peuuent conceuoir que par luy seul.

Courtifans si vous entriez de pensee dans ce Iardin solitaire, vous changeriez bien tost de ton, & de voix, voyant mon Redempteur comblé d'ennuy & d'affliction. Ie veux croire que vous feriez vne nouvelle musique de souspirs, & de plaintes, par la seule imagination des tourmens que le Filz de Dieu endure. Toutesfois ie me trompe: Car vous n'ignorez pas la verité de ses douleurs, & l'assurance que vous en auez n'impose point silence à vos langues. Vous recommencez tousiours vos chansons d'infidelité, & de perfidie, tandis que mon Sauueur, cōme vn autre Cigne mourant, au bord du fleuue de Meandre, jette les derniers accents de sa mourante

rante voix sur le riuage du fleuve de ses larmes, s'efforçant en ceste action de pitié, & d'amour de charmer les ennuis de son Ame triste iusques à la mort, par la douce armonie de ses prieres.

O belle Ame! mais la plus belle qui fut iamais, moderez vn peu, s'il vous plaist, la violence de l'ennuy qui vous possede. Je sçay bien que vous aimez parfaictement ce Corps, où vous estes si estroitement attachee, comme estant mille fois plus pur que le Soleil, & mille fois plus beau encore; Mais ie vous supplie de considerer que vous ne luy direz qu'vn adieu de trois iours, & que toute la puissance de la mort & des Demons, ne peut prolonger d'vn seul moment ce petit terme de vostre absence. Souffrez donc s'il vous plaist, ceste separation, puis que les Prophetes nous l'ont annoncee. Que si
l'appr-

l'apprehension des maux que vostre Corps doit souffrir vous bouelle des-ja par aduance. Representez vous que l'exéple de son martyre, produira mille martyrs, & que la plus petite de ses douleurs, seruira de remede à nos plus grandes. D'ailleurs comme vous aymez parfaitement vostre corps, le Seigneur ayme de mesme ses autres creatures. Et nous verrons à la fin quelle de ces deux amours emportera la victoire.

Nostre Redempteur tousiours pressé de l'affliction qui le possede, ne pouuant se deffendre contre les ataintes de pitié, & d'amour dōt son humanité luy perce les entrailles. Il recommence encore ses prieres, avec plus d'effort que iamais; Seigneur continuez hardimēt de plaider vostre cause deuant vostre Pere: Car ie m' imagine que vous n'estez entré dans ce lardin du Paradis terrestre, que pour r'attacher

tacher à l'arbre de vie le fruit qu'Adam & Eve, en auoient derobé. Et en effect les maux sans nombre que vous auez des-ja soufferts, l'ont pendu à sa branche: Tellement que la Iustice diuine ne nous peut refuser son pardon, puis que la faute est reparee.

Chose estrange; mais admirable, l'amour dicte les paroles de la priere que nostre Sauueur fait à son Pere, & l'amour mesme empesche que ceste priere ne soit exaucee: Car il s'ayme si fort, & avec tant de raison, qu'il ne peut se resoudre à mourir; Mais aussi nos interets sont grauez si auât dans son sein, qu'il enuoye des-ja toutes ses pensées dans le tombeau, pour luy en preparer la place. De sorte que son cœur genereux soupire en vn mesme instant de deux differentes passions de tristesse, en l'apprehension de la mort, & de ioye en l'assurance de nous redonner la vie par son trespas.

Que

Que fera-t'il donc ? à quoy ce peut il
resoudre ? son Ame met en employ
toutes ses puissances , pour luy per-
suader de ne mourir point , & son
corps donne des langues à toutes ses
veines, & à tous ces arteres, pour luy
prescher la mesme chose. Je vous
laisse à penser de combien de maux
cest aymable Sauueur est atteint , du-
rant le temps que sa Priere frappe à la
porte des Cieux. D'un autre costé
l'amour de ses creatures l'enchaîne si
puissamment , & l'attire avec tant
d'effort sur le mont de Caluaire, qu'il
est contraint d'y enuoyer ses desirs
par aduance, attendant qu'on y traine
son corps, pour paracheuer le sacrifi-
ce de sa Passion. Quelle sera donc à
la fin sa derniere entreprise ? La vo-
lonté de son Pere en doit prononcer
l'arrest. C'est le diuin Pole qui seul
fait mouuoir l'eguile de son cœur,
& qui donne le bransle aux plus
nobles

nobles puissances de son ame. Et voycy l'Ange aussi qui vient de sa part luy presenter le Calice de sa Passion; O merueille inouye! dès lors que l'Ange luy eut fait ce riche present, & qu'il luy eut annoncé les agreables nouvelles de son prochain trespas. L'amour qui estoit tousiours aux escoutes, & qui faisoit sentinelle du costé du Ciel, pour en voir decendre cest ambassadeur, vuide toute sa troupe dans le sein de mon Sauueur. Je veux dire qu'il ouure à coups de traits toutes ses veines, & chascque fleche fait vne playe nouvelle. De sorte que sur le poinct que la tristesse le tenoit aux abois, pour le faire mourir de douleur, il se sent mourir d'amour, sans vouloir mourir pourtant, puis que ceste mesme amour luy prepare des nouveaux supplices; Mais combien de mysteres nous cache cest amoureux prodige.

B

L'ame

L'ame & le corps du Seigneur² estant malades d'une maladie d'amour, par les regrets amoureux dont ils se trouuent également atteints, à la veille de leur separation, & de leur depart. La crise d'une sueur d'eau & de sang, vient tout à coup apporter le remede. Tellement que mon Sauueur se trouue guery de ceste apprehension de la mort. Il n'a plus de passion que pour ressentir celle de ses peines.

Vous voulez donc, ô Pere bien aimé, luy disoit il selon mon opinion, que ie repande mon sang, vous voyez comme mes veines, aussi obeissantes que mon cœur, ont rompu leurs portes pour vous complaire. Au mesme instant que vous m'avez fait annoncer les nouvelles de ma mort, ie n'ay peu retenir ma vie, elle s'enfuit tousiours avec mon sang vers le mont de Caluaire où i'en dois rendre les abois. Et
auant

auant que ie vous face ce dernier sacrifice de ma vie, ie vous offre celuy cy de mon amour, pour vous temoigner mon obeissance.

L'Ange n'eut pas plustost présenté à ce doux Sauueur le Calice de sa Passion, de la part de son Pere, qu'il sue sang & eau. L'eau deuoit proceder de la source des larmes que le corps auoit produite, pour s'en seruir au depart de son ame, mais voyant qu'elle estoit resolue à ceste separatiõ, & que les adieux estoiet desia faits, il permet à la Nature de repãdre cete eau, cõme inutile à cest vsage. Le sang deuoit tirer sa source du cœur, cõme du lieu où le cõseil secret de le repandre auoit esté tenu, & le Ciel en ayãt des-ja fait sõner l'heure, il en auoit laché la bõde.

O vniue Redempteur de mon ame, de quel miracle d'amour estonnez vous d'abord & nos sens, & nos esprits sur ceste premiere marche de

l'eschelle de vostre Passion. Faut il donc necessairemēt que nous croyōs que vous nous ayez beaucoup plus que vous ne vous ayez vous mesme ? He en quel labyrinthe de vanité nous allez vous esgarer ? Car à quel prix mettrons nous nostre sang, si le vostre le rachepete ? Combien estimerons nous nostre vie ; puis que vous mourez pour l'exempter de la mort. Ne vous estonnez plus maintenant si animez de l'arrogance des Geants, nous accumulōs montagne sur montagne pour escheller le Ciel de vostre Gloire, puis que vostre amour nous a jugez dignes de l'acquérir au prix de vos tourmens, & de vos peines, dont le merite est infiny.

Mais pardonnez nous Seigneur l'audace de ces termes. L'estonnement de vos merueilles, rend nos langues participantes de la confusion de nos esprits : car sans mentir les honneurs

neurs dont vous nous comblez surpassent de beaucoup la force de nos iugemens pour le comprendre. De sorte que nous en demeurerons dans vn perpetuel silence, & moy dans vn continuel rauissement, ne sçachant que dire, ny que penser sur vn sujet, ou mes paroles, & mes pensees ne peuuent attaindre. Je poursuis mon dessain.

Beau Iardin que vos allees sont belles, puis que mon Sauueur en fait son Oratoire ; Que vos arbres sont bons, puis qu'ils portent si fecondement les fruiets de la Grace : Que vos fontaines sont admirables, puis que l'amour en est l'ouuriere : Que l'air qu'on y respire doit estre doux, puis que les Anges descendēt du Ciel pour en ressentir les delices. O ! que vostre terre produira maintenant des belles fleurs, puis qu'elle est arrouzee par des liqueurs si celestes. Beau Iardin

dis-ie encore, que vostre nom d'Oliue est admirable, puis que l'Oliuier est le symbole de la paix. Je ne m'estonne plus si mon Sauueur en qualite d'Am-bassadeur extraordinaire de la Nature Humaine, a voulu auoir audience de son Pere Eternel dans vos cabinets, à l'ombre de vos arbres, puis qu'il y de-uoit traiter la paix generale du Mon-de, & en signer les articles de son sang pour la rendre plus asseuree.

De moy ie veux croire que l'eau de la sueur que nostre Seigneur res-pandit produisit des soucis, puis que c'estoit l'eau de larmes. Et com-me le soucy regarde incessamment le Soleil, le cœur de mon Sauueur qui estoit la premiere source de ces pleurs, contemploit de mesme son Pere, ce diuin Soleil de Iustice, afin que ses actions, & ses pensees fussent continuellement esclairees de ses rayons. Et pour son precieux sang, il
ne

ne pouuoit produire que des roses, puis que mon Redempteur auoit be-
foing de leurs espines, pour s'en faire
vne couronne reseruant les roses à ses
esleus.

Que mon cœur donc soit tousiours
dans les Soucis, ou que les Soucis soiēt
tousiours dans mon cœur, puis que les
larmes de mon Sauueur les ont fait
naistre, & que comme le Soucy regar-
de continuellement ce bel Astre du
iour, que mon ame soit ceste fidele
Clytie, & que de mesme elle contem-
ple sans ceste ce diuin Soleil d'amour,
qui n'est point sujet aux Eclipses.
Que les Roses aussi dorefenauant,
soient les objets ordinaires de mes
yeux, puis que le sang de mō Seigneur
les ont produites, & que leurs espines
soient autant de lancettes qui percent
mes veines, afin que mon corps espu-
rant ses offenses dans son sang, com-
me dans vne fournaise, ie puisse auoir

part au merite de ce precieux que mon Createur a respandu, en expiation de mes crimes.

Ie reuiens à vous, ô doux Iesus! mais en quel estat estes vous reduit! vostre corps pleure le sang de tous costez, l'on diroit à vous voir que vostre face est toute de feu; Et en effect cela peut estre, puis que vostre cœur est tout de flamme: car si vous estes vne fournaise d'amour; est-ce merueille de vous voir jeter le feu de toutes parts. Tant plus ie medite sur les mysteres de vostre sueur sanglante, & plus i'y trouue de sujet d'admiration & d'estonnement tout ensemble. Voicy vne nouvelle verité que ie descouure.

Vous souffrez maintenant en idee tous les tourmens de vostre Passion, & pourquoy Seigneur, si ce n'est pour reparer le crime de nos pensees? De sorte qu'à cest effect vous donnez

l'art

l'art & l'industrie à vostre imagination, pour forger tous les instrumens de vostre sacrifice, & pour vous en faire ressentir toutes les douleurs; mais avec tant d'effort, & tant de violence, que vostre vie se va noyer dans son sang, si vous ne calmez l'orage que vostre amour a suscité, sur ceste mer Rouge de vostre sueur. Pourquoi Seigneur ? Pourquoi voulez vous souffrir tant de morts ? Ne sçavez vous pas que vous estes mort autant de fois que vous avez respiré l'air infecté de nos miseres ? Que vous estes mort de froid, dans la creiche, de lassitude, dans les chemins, de faim, dans le desert, & que vous mourez maintenant du regret de vous voir trahy par vn de vos Apostres, & abandonné de tous ensemble. Et non content encore vous mourez à ceste heure en imagination, & en idee; he! quand serez vous las de mourir?

Vous voulez sauuer le monde en mourant ; Mais le monde sçait que la moindre de ces morts que vous auez soufferte, est suffisante pour son salut. Donnez donc ceste à ces gennes, dont vostre amour vous tyrannise. Mais que dis-ie ? vos delices naissent de ceste tyrannie, vostre vie trouue son element dans ces morts, puis que vous nel' auez prise, que pour mourir continuellement. Faiçtes donc Seigneur s'il vous plaist, que ie meure avec vous de la sorte, & que d'ores-nauant ie tire mes plaisirs, de mes douleurs, & mes esbats, de mes peines. Donnez moy la liberte s'il vous plaist d'entrer dans ce beau Iardin, où vous auez fait esclore avec l'eau de vos larmes, les soucis de vostre tristesse, & avec la sueur de vostre sang, les roses de vostre amour, afin que ie puisse couronner mon cœur des mesmes espines dont vous voulez

lez couronner vostre teste. Mais il me semble que vostre sueur vos affoiblit. O Magdeleine ! où sont maintenant les riches torchons de vos cheveux, pour essuyer, non pas les pieds, mais la face de mon Redempteur.

Et vous, ô Vierge tres-pure, & tres-saincte ! il est vray que par vn rapport d'affinité de vostre belle humeur, & de vostre chaste inclination, avec les adorables de vostre cher Filz, vous ayez part à tous ses plaisirs, aussi bien qu'à toutes ses peines; de quelle amoureuse inquietude devez vous estre agitée maintenant, en la pensee de toutes ses alarmes qui metent en sueur & mon Dieu, & mon Maistre. Je veux croire que vous suez aussi bien que luy; mais d'une sueur differente : car il sue le sang, parce que nous en auons besoing, & vous suez l'eau de vos pleurs pour nous dōner de la pitié, n'estans point capables de vostre amour.

Pleurez,

Pleurez , pleurez donc , vos larmes sont trop iustes , & trop belles , pour en arrester si tost la course.

Au mesme instant que l' Ange presenta le Calice à ce doux Iesus , il le remplit du sang de sa sueur , & beut à mesme temps , à la santé de la nature humaine ; comme pour gage , & pour assurance , qu'il accompliroit bien-tost les promesses que ses Prophetes luy auoient faictes de sa part. Apres ceste actiõ si saincte , & si genereuse ; animé d'vn courage digne de luy , il vient retrouver les Apostres endormis , & en les esueillant encore , leur fait ceste reproche de ne pouuoir veiller vne heure avec luy.

C'est à vous Courtisans , que ces mesmes reproches s'adressent : Car au lieu de faire sentinelle dans ce Jardin , tandis que mon Sauueur acheue ce premier office de sa Passion , où vous n'avez pas enuoyé seulement,

vnc

Vne seule de vos pensees. Vous continuez la course ordinaire de vos debauches, chantant tousiours avec les Demons, de la joye qu'ils ont de voir le Fils de Dieu trahy, vendu, & sur le point d'estre liuré entre les mains des bourreaux. O effroyable chant! mille fois plus funeste que le croassement des Corbeaux. N'apprehendez vous point qu'une nuit éternelle, succede à celle où vous respirez maintenant? Ou que ces mesmes Astres qui vous esclairent, se metamorphosent tout à coup en foudres, pour punir vos impietez! De tout le monde ensemble il n'y a que les Scribes & les Pharisiens qui se resjouissent, dans le dessain qu'ils ont de faire mourir nostre Seigneur; Et ne puis-je pas soutenir que vous trempez à leur trahison, & à leur perfidie, puis que vous participez à leur joye, par vos chansons d'allegresse. O ames aussi noires que l'en-

fert

fer! vous ne considerez pas que le bruit de vos instrumens de musique, vous empesche d'oüir le tonnere de la Justice diuine, qui gronde sur vos testes. De sorte que tout en chantant vous vous approchez de la mort, mais d'une mort de damnation eternelle; Et où est ceste amour propre qui vous possede, si absolument? Vous vous aymez avec tant de passion, & toutesfois par vne passion contraire, vous ne souspirez que de la haine de vous mesme, courant à perte d'halene dans les Enfers. En quelle confusion ferez vous reduit au iour du Iugement, lors que ce mesme Sauueur, dont vous fuyez l'abord avec tant de mespris, durant le regne de ses afflictions, & de ses souffrances, vous reprochera en effect toutes ces chansons de perfidie, que vous chantez en signe d'allegresse, à la veille de sa mort. Vous deuez bien iuger que
que

que les seuls abysses des Enfers seront capables de cacher vostre honte, pour vn iamaïs : O cruel Iamaïs ! que les pensees de ton Eternité font de dure digestion !

Hommes du monde si vous consideriez qu'en ceste mesme heure de vos debauches, vn nombre infiny d'ames deuotes sont dás les Iardins sacrez de l'Eglise, en action d'imiter nostre Seigneur suant sang, & eau, comme luy, quoy que d'une maniere differente, puis que leurs larmes produisent l'eau de leur sueur, meslee avec le sang de leur disciplines. Je veux croire; mais ie ne sçay si ie me trôpe, que vous quitteriez vos luths à iamaïs, & que changeant de personnage, vous viendriez tenir vostre partie, en ce diuin Cōcert de penitence, pour participer aux benedictions dont le Ciel les cōble sans cesse, guerissant par cete douce sueur, routes les maladies de leurs ames.

Suez,

Suez, suez donc de la sorte, Courtisans, si vous desirez guerir de la maladie mortelle du peché, dont vous estes attaints, c'est l'vniue que i'y trouue. Nostre Sauueur ne meurt qu'afin de nous redonner ceste premiere vie de grace, que nostre premier Pere auoit vendue pour vn morceau de pomme. C'est à nous maintenant de la conseruer, & si nous desirons la rendre eternelle, il faut necessairement boire dans le mesme Calice où Dieu a estanché sa soif. Et souuez vous au moins de ceste faueur particuliere qu'il vous fait, de permettre que ce liure vous soit tombé entre les mains, pour vous en ramenteuoir la verité.



LE BREVIERE

D E S

COVRTISANS.

A P R I M E.

CHAPITRE II.

Tristis est anima mea usque ad mortem.



COVRTISANS n'entendez vous point la mesme cloche de la parole du Filz de Dieu, qui vous appelle encore à PRIME pour estre tesmoings en ce second Office de la Passion, de tous les tourmens, & de toutes les injures que

les Demons, & les Bourreaux également enragez, ont resolu de luy faire souffrir. Et il me semble qu'un bruit de cliquetis d'armes met des ja en alarme ses Disciples, & que ie voy Iudas, ce capitaine des traistres, qui s'auance effrontement, & qui porte ses leures impudiques sur l'autel sacré du visage de son Maistre, pour luy presenter en offrandre, vn baiser le plus desloyal qui ayt esté iamais donné: O infidele Apostre que fais-tu? Tu vends ton Sauueur; he comment veus-tu qu'il te rachapte? Tu l'estimes bien peu, & ton ame encore moins, puis que tout à la fois en le liurant aux Iuifs, tu te liures toy-mesme aux Diables. Tu ne le vends que trente deniers, & le moindre de ses cheueux dorez, vaut plus que tout l'or du monde; Que si l'auarice te commandoit absolument; que ne l'amenois tu en place marchande, pour le liurer selon les formes ordinaires,

dinaires, au plus offrant, & dernier enchérisseur, apres auoir declaré publiquement les merueilles qu'il auoit faiçtes, sans autre instrument que celuy de sa parole toute puissante. Et si tu n'eusses peu vendre vn si riche butin, les Anges sans doubtte, se fussent faiçts marchands pour vne telle conqweste. Mais perfide tu n'estois pas satisfait d'assouuir ton auarice ? Car tu l'eusses vendu à ses Amis, pour en auoir d'auantage, plustost qu'à ses ennemis. Tu voulois encore desalterer ta cruauté & ta rage, dans son sang innocent. O Barbare ! les Rochers trouuent quelque sorte de sentiment en leur insensibilité, pour rendre vn hommage de respect & de submission à leur Createur. Et ton ame plus dure que ces roches, cesse d'estre animee, pour cesser d'adorer ce seul adorable parmy les hommes. Et ioignant encore l'impudence, l'ef-

fronterie, & la temerité à ta trahison, tu portes tes leures profanes sur la bouche de celuy, dont les Seraphins ne peuuent supporter les regards. La Magdeleine s'est contentee de luy baiser les pieds. Sainct Iean ce grand Prophete, ne croyoit pas estre digne seulement de luy delier la couroye de ses souliers. Et toy, le plus infame qui fut iamais, tu approches le fumier de ta bouche puante des leures toutes de Roses & de Lis, de mon Sauueur. I'ay veu naistre pourtant des fleurs sur vn fumier. De sorte que si tu te fusses seruy de la vertu de son haleine, le vent eut produit dans ton ame quelque soucy de regret, & de repentir, de ton offense. Mais au contraire mesprisant cet honneur, tut'es rendu indigne de la grace qu'il pouuoit causer.

Courtisans combien de nouveaux baisers de trahison donnez vous à nostre
nostre

nostre Seigneur receuant d'une bouche puante & infectee du peché, son corps precieux & adorable. Vous detestez Iudas en son infidelité, & vous commettez avec luy le mesme crime: Que dis-ie le mesme crime? le vostre est bien plus effroyable encore: Car Iudas n'a trahy qu'une fois nostre Seigneur, & vous le trahissez tous les iours; comme si vous tiriez vanité de vostre perfidie. Il l'a védu pour trente deniers, & vous le vendez pour rien, le liurant de nouveau à la mort, par vos offenses mortelles.

Dés lors que le Signal du baifer est donné, les Bourreaux ne perdent point temps. Chascun se met en action de iouier son personnage, faisant à l'enuy à qui trouuera plus d'inventions, pour enchaîner estroitement ce doux Redempteur de mon ame. L'un luy jette vne corde au col, l'autre luy lie les bras, & les mains.

Celuy-cy luy met les fers aux pieds, & celuy là l'attache encore avec vne nouvelle chaine. Je ne scaurois dire maintenant, Seigneur, quel des deux est plus estroitement lié, ou vostre Cœur, ou vostre Corps. Toutesfois l'amour à des liens que le Temps, ny la Mort ne peuuent rompre: Il est donc croyable que vostre cœur est plus esclaué que vostre corps, puis que vous emporterez dans la sepulture, les chaines de vostre amour.

A suite de toutes ces actions de tyrannie on en produit des nouvelles de cruauté. Car ces bourreaux exercent leur rage avec tant de fureur, sur l'Humanité Saincte de mon Seigneur & Maistre, qu'ils le mettent tout en sang. Les vns d'une main sacrilege luy arrachent les cheveux à poignées: Les autres le font tresbucher à coups de bastons: Ceux-là luy esgratignent le visage, & ceux cy à force

force de le pousser à coups de pieds, le font cheoir souuent dans la bouë. Et tout cela se fait Messieurs les Courtisans à la mesme heure que vous dansez, & que vous tenez le bal ouvert dans vos Palais, & dans vos maisons de plaisance.

Quelle folle Comedie, & quelle sanglante Tragedie, se iouë tout à la fois sur vn mesme theatre. Vous avez les oreilles charmees de la douce melodie des Violons, & celles de mon Sauueur ne sont battues que du bruit des coups qu'on luy donne. Vous dansez de joye & d'allegresse, au son de ces agreables instrumens: Et mon doux IESVS, renouuelle sa sueur du Iardin des Oliues, à force de marcher plus viste qu'il ne peut, suant le sang, puis qu'il en est tout couuert, par vn effort de lassitude, qui luy faict tousiours seigner les playes, dont il est desja chargé.

O espouventable Tragedie! mais plus effroyable encore la Comedie que vous jouiez, Messieurs les Courtisans. Ne peut on pas soustenir qu'en ceste assemblee de bal, vous avez fait le complot avec les Scribes, & les Pharisiens, de mettre en croix nostre Seigneur? De mesme qu'en celle d'Herode le dessain fut pris de faire mourir S. Iean Baptiste. En quels termes vous defendrez vous de ses reproches au iour du Iugement? Car les Iuifs tiennent le bal comme vous, & du plus petit, jusques au plus grand, tous ensemble dansent de ioye, aux nouvelles de la prise du Seigneur; que si vous faites la mesme chose, ne peut on pas vous accuser iustement, & vous conuaincre encore avec plus de raison du mesme crime?

Vous dansez maintenant vne courante, & en cest instant on fait courre nostre Seigneur depuis vn bout de ville,

ville iusques à l'autre , & s'il perd la mesure de ses grands pas , pour se reposer, ou le remet en cadence à coups de barres. Il vous prend enuie de danser vne gaillarde, & on sonne toujours l'alarme aux oreilles de mon Dieu, afin que son ame soit incessamment comblee d'ennuy, & de douleur, jusques à la mort.

O Diuin Redempteur ! que deuiendrons nous à la fin, si vous prenez vengeance de nos crimes? Au mesme tēps que l'amour vous conduit sur l'autel, pour nous exempter du sacrifice. Nous nous amusons à courtiser ces Eues infideles; comme si nous auions dessain de les remercier de tous les maux qu'elles vous font endurer : & nous dansons encore avec elles ; comme si authorisant l'erreur de complaisance, de nostre premier Pere, nous voulions commettre ensemble vne nouvelle faute, pour vous faire mourir vne

rir vne seconde fois.

Pardon Seigneur, pardon, puis que des-ja les thresors de vos graces sont ouuerts , par l'ouuerture de vos playes. Vous auez le pinceau à la main , redonnez nous s'il vous plaist, les premiers traits de vostre ressemblance. Vostre Misericorde est en son regne, si la Crainte nous afflige, l'Esperance nous console. Mais trompeuse Esperance en la continuation de nos crimes. Esperer la grace dans le continuel deffain de mal faire, c'est blasphemer contre la Misericorde de Dieu, & attirer par force sur nos testes, les foudres de sa Iustice. Prends garde à toy Lecteur: car ceste verité hurte à ta porte.

Ces Bourreaux menent nostre Seigneur chez Anne, qui par mespris, le renuoye sans l'interroger à Cayphe son Gendre. Je vous laisse à penser si les rues de ce penible chemin fu-

rent arrousees du sang de cest
Agneau innocent, comme abandon-
né à la mercy de ces loups, qui de-
puis si long temps attendoient sa
proye. Le voyla deuant Cayphe
tout chargé de coups, & de chaines.
Ce Iuge aussi meschant que ses com-
pagnons, estant complices du crime
de sa resolution. L'interroge effron-
tement, & luy demande s'il n'est
pas ce faux Prophete, qui jette par-
my le peuple vne semence de fauce
religion. Nostre Seigneur luy res-
pond avec sa douceur ordinaire,
„ Qu'il auoit presché publiquement,
„ & que s'il doubtoit de la verité de
„ sa doctrine, qu'il prist pour Iuges
„ tous ceux qui en auoient esté les
„ auditeurs. A ces mots Malchus, l'in-
grat & le Barbare qu'il est, donne vn
soufflet à son Dieu, à son Createur,
à son Sauueur, & à son Medecin
tout ensemble; mais d'vne main sa-
crilege

crilege armee d'un gantelet de fer. Et le coup en est laché avec tant de fureur, & tant de force, qu'il renuerse par terre ce doux Seigneur, & luy fait cracher le sang à gros boüillons.

O Ciel ! comment croyray-ie que tu as des Foudres, puis qu'ils ne sont pas allumez pour reduire en cendres ce Scelerat. O terre ! adiouteray-ie foy à la verité de tes Abysmes, puis qu'ils ne sont pas ouuerts pour engloutir ce perfide. Et vous Anges & Archanges qui gardez les traits de la Iustice diuine; que ne les dardez vous en foule sur la teste criminelle de ce nouveau Cain ? Thrones, souffrez vous que vostre Majesté soit foulée aux pieds ? Dominations, ne voyez vous pas que le fondement de vostre Empire est tombé en ruine ? Puissances, à quoy reseruez vous vos efforts, apres vne telle injure ? Vertus vostre gloire est couuerte d'infamie, par celle

Celle que vostre Dieu endure ; quel sera vostre ressentiment ? Cherubins, ne voilez plus vostre face deuant ce Sauueur, puis qu'au lieu de vous esblouir par son esclat, il vous donne de la compassion, par ses miseres. Et vous Seraphins qui souspirez sans cesse de son amour ; ne changerez vous pas maintenant de souspirs, pour souspirer de la pitié de ses peines ? Mais que dis je ? O Ciel ! tu n'as plus des foudres, puis que mon Seigneur est descendu en terre pour en esteindre la flamme dans l'eau de ses pleurs. Terre tu ne peux ouurir tes abysses, puis que ton Createur en porte les clefs pendues à la ceinture. Et vous Celestes Esprits, Anges & Archanges. Vous n'avez garde d'elancer les traits de la Iustice diuine, dont vous estes gardiés, sur la teste de ce coupable, puis que son injure s'adresse directement à la Misericorde qui ne sçait que pardonner. Thro-
nes

nes, il est vray que vostre Majesté est
foulceaux pieds; mais c'est pour re-
hausser son lustre par son humilité.
Dominations, ie confesse que le fon-
dement de vostre Empire est en rui-
ne; mais c'est pour estre rebaty avec
plus de magnificence. Puissances,
vos efforts sont inutiles contre ce cri-
minel, puis que l'ombre de mon Sau-
ueur, met son corps à l'abry. Vertus,
quoy que vostre Gloire soit aujour-
d'huy pleine de honte, vostre patien-
ce vous seruira d'un plus riche orne-
ment, à l'exemple de mon Redemp-
teur. Vous Cherubins reprenez vo-
stre voile ordinaire, puis que vostre
diuin I E S V S tire sa lumiere de sa
confusion. Et vous Seraphins, sous-
pirez d'amour, plustost que de re-
gret, en la contemplation de vostre
Createur, puis que ses peines vo-
lontaires sont toutes amoureu-
ses.

La Pitié toutesfois me touche le cœur si vifvement, voyant mon doux Sauueur à terre, du coup de ce soufflet, que si mes larmes n'effaçoient ce que i'escriis, ie pleurerois sans cesse. Mais quels mysteres nous cache encore ceste sanglante verité? Adam dans le Paradis Terrestre donne vn dementy au Pere Eternel, disant dans son cœur qu'il ne mourroit pas, quoy qu'il mangeast du fruiet deffendu. Et voicy le soufflet de ce dementy que son cher Filz souffre sur la iouie. O effroyable Iniure, & plus admirable Patience!

Courtisans voila vn beau miroir; toutesfois si vous vous y regardez dedans, vous ne vous y verrez pas, parce qu'il ne represente que les humbles, & vous portez sur le visage tous les traictz de l'arrogance. Il me semble que i'entens le bruit d'vn soufflet dans ce mesme bal

où vous estes , quelque nouveau Malchus frappe peut estre vn innocent. Mais quel desordre, tout le monde met l'espee à la main pour venger cest affront ; He que faites vous ? Mon Sauueur est encore renuersé par terre, du soufflet qu'on luy a donné, & personne ne se met en estat de le venger, ou de luy tendre le bras seulement, pour le releuer. Et vous estes sur le point de vous couper la gorge, demandant satisfaction de l'injure qu'on a fait à vn estranger. Adressons nous encore à celuy qui a reçu le coup. Je veux que ce soit vn homme d'honneur, & de qualité. Il n'a pas plus de raison pour cela de se venger: Car s'il met en auant, cest honneur qu'il professe, depuis si long temps, avec tant de louange, & de reputatiõ; le veut il mettre en comparaison avec celuy de mon Redempteur, dont le plus petit esclat, s'il estoit opposé
aux

aux rayons du Soleil, feroit eclipser de honte ce bel Astre. Et voila sa premiere confusion, puis qu'auec cest honneur si diuin, & si fort interessé, mon Sauueur demeure à terre sous le faix de son infamie, sans porter les yeux sur le front de son ennemy, que pour en adoucir la colere, par ses pitoyables regards. O Bonté Infinie que tes reproches seront iustes en ce dernier jour, où la Iustice commencera son regne.

Courtisans, il ne faut point d'autres tesmoins pour vous conuaincre; Qu'un chacun mette la main sur sa Conscience, & qu'il confesse, puis qu'il est vray, que viuant à la mode, le Paradis est imprenable, & l'Enfer ineuitable.

Nostre Seigneur se releue avec beaucoup de peine, & d'une bouche enflée, & sanglante ne dit autre chose à celuy qui l'auoit frappé, si ce

n'est que s'il auoit mal parlé qu'il en preuast le mal, & que s'il auoit dict la verité, qu'il meritoit vn plus doux traitement. Quelles paroles de miel sortent de ceste celeste Ruche. le veux dire de la bouche de mon Dieu. Elle est toute de sang, & les discours qui en sortent sont tous de laiët. Il se plaint, mais ses plaintes sont si humbles qu'on diroit qu'il presente l'autre ioüe, pour receuoir vn second soufflet.

Mon Sauueur, sans mentir ie ne scay ou i'en suis, quand ie considere les Merueilles de vostre Amour, les Prodiges de vostre Humilité, & les Miracles de vostre Patience. Tous ces objets d'une Bonté Infinie, me feroient perdre l'Esperance de mon salut, dans la cognoissance que i'ay de ma malice. Si vostre pure grace ne fortifioit mon esprit; Car apres tout qui vous peut imiter en quelqu'une de ces actions, si vous estes inimitable en tou-

tes choses. On peut estre humble, il est
vray; mais humble cōme vous, l'Hu-
milité mesme n'a esté formee que sur
vostre exemple. On peut estre patient,
mais patient cōme vous estes, c'est vn
ouurage de vostre Toute-puissāce. I'ay
medité quelquesfois sur les actions de
vostre vie, & de vostre mort. Mais ve-
ritablement c'est vn si grād labyrinthe
de perfectiones toutes adorables, que ie
n'ose penser seulement d'y entrer, de
peur de me perdre en ceste seule pēsee.
Tout y est plain d'estonnement & de
merueille, mon Esprit y demeure touf-
iours confus, mon iugement troublé,
mes yeux esblouis, & tous mes autres
sens tombēt en foiblesse, par vn effort
de crainte & de ravissemēt tout ense-
mble. Car si ie vous adore dans la crei-
che couché sur le foin, parmi les bestes
Me voila d'abord hors de moy mes-
me, ne pouuant comprendre les mira-
cles de ceste soubmissiō: si ie vous rēds

les mesmes actions de respect, vous voyant dans les deserts, où apres auoir ieusné quarante iours, vous estes pressé de la faim: Je me perds encore en l'admiration de ceste souffrance volontaire. Si ie continue tousiours à vous faire les mesmes sacrifices, dans le Iardin d'Oliuet, ou l'Amour & la Crainte vous liurent vne si cruelle guerre, que vous sortez du combat tout chargé de lauriers, mais tout couuert de sang; n'est-ce pas vn nouveau Miracle de vostre Bonté Infinie qui met encore toutes les puissances de mon ame en desordre, ne sçachant que dire, ny que penser. Et maintenant quand ie vous contemple tout couuert de crachats, ayant les mains liees, & la corde au col. Où trouueray-ie vn flambeau pour m'esclairer dans l'obscurité de ces mysteres incomprehensibles de vos tourmens. Il faut necessairement que ie me con-

tente

tente d'admirer tout, dans ma foiblesse, d'adorer tout dans mon silence, & ne pouuant marcher sur vos traces, vous suiure de loing comme Sainct Pierre.

Cest Apostre tout plain de courage en la prise de son Maistre, s'escarte peu, à peu, & marche lentement, apres ceste troupe de bourreaux, qui entraînent mon Sauueur. Il paroît hardy dans le danger, & hors du peril, la crainte le saisit, & ie m' imagine que son cœur de glace, communiquant sa froideur au corps, le contraint de s'aller chauffer dans la premiere maison qu'il treuue, où il n'est pas plustost entré qu'vne simple femme l'attaque, le combat, & triophe de luy tout à la fois, par vn coup de langue: Car l'ayât interrogé s'il estoit de la compagnie de cest homme de Nazareth, qu'on amenoit en prison, il respond qu'il ne le cognoissoit pas, l'asleure vne se-

conde fois, & le soustient pour la troisieme. Et à l'ouye de ceste ingratitude, le Cocq chante de pitié, & esueille la conscience endormie de ce disciple. Lequel à l'instant mesme, se resouenant de la prediction de son malheur, force ses yeux de produire vne mer de l'armes, où le vent de ses sospirs excite vn tel orage, qu'on eut dit que sa vie cherchoit sa sepulture dans ceste eau.

Courtisans, combien de fois reniez vous avec S. Pierre nostre Seigneur, en parlant à ces Dames du monde? Vous leur dites effrontement que vous ne cognoissez point ce Dieu qui punit les Adulteres, les Incestes, & les Fornications. Vous leur en faites des sermens execrables. Et le Cocq a beau chanter, vous dormez toujours; ou si vous vous esueillez, c'est pour rire de vostre peché, au lieu d'en pleurer, à l'exemple de cest Apostre.

Mais

Mais ces ris se changeront vn iour en des larmes inutiles, & en des grincemens de dents de mesme nature. Ie vous en donne la preuoyance, euitez en le malheur.

Cayphe ne scachant quel pretexte treuuer pour condempner mon doux Sauueur, l'interroge de nouveau, & luy commande de la part du Souuerain Createur du monde, de luy dire s'il estoit filz de ce mesme Createur. I E S V S, Christ se voyant pressé de parler, puis qu'il y va de la gloire de son Pere, qui est la sienne mesme, luy respond, *Tu dicis*. Tu le dis, ie le confesse. A ces mots Cayphe en s'escriant se deschire le vestement au lieu de deschirer sa conscience criminelle à force de souspirs, & publie tout haut que cest homme a blasphemé, & qu'il ne faut point d'autres tesmoings, que ses paroles, pour l'accuser & pour le conuaincre.

Ha impie tu prens la verité à tesmoing de ta meschanceté, pour condempner l'innocence. Tu luy demandes son nom, il te respond qu'il s'appelle tout-puissant. Tu t'enquiers de sa qualité. Il t'asseure qu'il n'en porte point d'autre que celle de Filz de Dieu, & de Sauueur tout ensemble. Et tu veux qu'il meure parce qu'il n'a point menty. O Iuge detestable, on deuroit couvrir ton throsne de la peau de ton corps, en expiation des crimes de ton ame: Comme nous lisons dans les Histoires Prophanes d'un de tes compagnons, qui encourut le mesme supplice. Mais perfide, acheue, acheue d'ourdir la trame de tes meschancetez, l'Enfer sera ta recompense.

Voila la resolution prise de faire mourir ce doux IESVS, sur ce faux pretexte qu'il a blasphemé, & attendant le iour du lendemain, où l'on doit

doit executer cest arrest, apres auoir consulté vne derniere fois l'opinion de Pilate, on laisse toute la nuict ceste brebis, au milieu de ces Tigres. le vous laisse à considerer de quels supplices elle sera martyrisée.

Cayphe se retire avec tous ceux de l'assemblée, & nostre Seigneur demeure à la compagnie des Bourreaux qui le traitent à leur mode. Cela veut dire avec tant de cruauté, que le recit en emouuroit les Rochers de pitié. Je ne sçay toutesfois si vos cœurs de Roche seront touchez de quelque sentiment de compassion. L'un commence de luy arracher les poils de la barbe; l'autre luy ferre si fort la corde qu'il a au col, qu'on diroit qu'il le veut estrangler; Celuy là le traine par la sale, comme si c'estoit vn monceau de fumier: Et celuy cy luy crache au visage. Quel excez d'infamie! Il y en a qui ont laissé des disciples en ceste
opinion

opinion que le Soleil auoit des taches sur sa belle face; He qui ne le croira maintenant Seigneur, puis que vostre beau visage tout rayonnant de lumiere est taché de la noirceur de mille crachats. On croit encore que la Lune porte de mesme quelques marques noires sur le front; N'est-il pas vray aussi, puis que vostre chere Mere ceste Lune tousiours plaine de perfection a la face couuerte du noir de son affliction & de sa tristesse.

On exerce cependant toutes ces cruautez, & mille nouuelles encore, contre mon Redempteur, au mesme temps & à la mesme heure que vous dansez les bransles, Messieurs les Courtifans, dans les assemblees de vos bals. Vous dansez en troupe, pour nous tesmoigner que vous auez beaucoup de compagnons en vos damna- bles desseins; helas Seigneur! quel branle different vous fait-on dans

dans ce Consistoire d'iniquité, & d'injustice. Ces Barbares vous trainent de tous costez, & quoy que vous vous laissiez emporter aux mouuemens de leur fureur, il vous donnent des nouvelles leçons à coups de pieds, ayant des-ja lassé leurs mains à vous battre d'une autre sorte.

On vient danser le Balet maintenant; mais qu'est-cecy, il me semble que c'est vn Balet de Iuifs habillez en bourreaux, & que mon Sauueur est de la partie, puis qu'il est masqué, ie veux dire voilé. Et chacun en cadence le frappe à son tour, & d'une langue aussi sacrilege que la main, luy dit, qu'il deuine en qualité de Prophete, quel d'entr'eux a fait le coup.

O adorable Redépteur du Ciel & de la terre, d'as quel nouuel abisme de confusio allez vous engloutir mon Esprit en cete pésee de vostre aneantissement.

Vous voulez d'oc seruir de fable & de
ioüet

ioüet à vos ennemis ; He que deuiendray-ie avec ma vanité & mon arrogance, ne pouuant seulement souffrir que mes amis me gaucent ? Vous faites toutes fortes de personnages : apres auoir representé en ce premier acte de la tragedie de vostre passion le plus miserable homme qui fut iamais, vous assistez encore à la farce pour leur complaire ; Quel personnage plus vil, & plus abjet pourray-ie faire, Seigneur, pour vous donner du plaisir ? Il y a tantost trente ans que ie fais le personnage d'un pecheur ; Que sera ce de moy mon doux IESVS, si à la fin de la Tragedie vous prenez vos riches habits, pour représenter le personnage du Dieu des vengeancez ? Misericorde, misericorde ; Car si le plus Iuste tremble deuant vostre Iustice ; de quel frison seroit mon ame agitée, avec tous ses pechez.

Il est important de remarquer que les Bourreaux voilerent nostre Seigneur pour estre plus libres à luy faire toute sorte d'iniures, parce que son visage estoit animé de tant de Majesté & de tant de Grace, que ne pouuant donner de l'amour aux cœurs de fer & de diamant qui n'en estoient pas capables, il leur donnoit du respect & de la crainte: De sorte qu'ils luy couvrirent la face d'un voile.

Courtisans, toutes les fois que vous offensez Dieu en cachetes vous luy voilez le visage; mais c'est d'un voile transparant: car il n'y a point des corps opaques que les yeux de Lynx ne percent. Representez vous continuellement ceste verité, qu'il est temoing, aussi bien que Iuge de toutes vos actions, & vous changerez sans doute d'humeur & de courage, soit par respect, ou par crainte.

Après que ces Bourreaux se furent
ioüez

ioüez de nostre Seigneur, iusques à estre las de le tourmenter, & qu'ils eurent couru au Faquin contre luy, le prenant sans doute, pour vn homme de bois; tant ils auoient deschargé de coups sur les espaules, ils l'enfermerent dans le Cloaque du Palais de Cayphe, lieu destiné pour receptacle de toutes les ordures, attendant avec impatience, le lendemain comme le iour de sa mort.

Que me n'est-il maintenant permis, ô doux Sauueur, de balier ce lieu plain d'ordures avec ma langue, & de le lauer avec la derniere goutte de mon sang: Mais que dis-ie? Ce n'est plus vn Cloaque puis que vous y estes, vostre diuine presence change la nature de ses sales objets. C'est plustost vn nouveau Paradis, où les Anges mesme vous adorent avec leurs respects, & leurs soubmissions ordinaires. De croire aussi que vous soyez en

tenebres dans ce lieu plain d'obscurité. Le Soleil ne se peut iamais separer de sa lumiere, parce qu'elle luy est essentielle. Quelle apparance donc, que vous soyez entouré des ombres, vous dis-je Seigneur, de qui ce bel Astre du iour reçoit son esclat & son lustre; la Raison veritablement y contrarie; Mais vostre amour nous apprend, dans l'eschole de vostre Passion, que vostre volonté tenoit enchainée vostre Puissance, afin de boire toutes les amertumes qu'on versoit dans vostre Calice; ô nouveau Prodige de bonté!

Quoy donc Seigneur: vous avez voulu estre ietté sur le fumier, comme vn autre Iob; où me cacherayie de honte, moy qui ne me repose que sur des lits de fleurs? vous voulés que la pourriture & l'infection des ordures d'vn Palais vous soit vne agreable offrande de myrrhe & d'encens. Le palis desia de la crainte de vos foudres au

souuenir des parfums & des odeurs dont mon corps est idolatre.

Courtisans , ie vous presente vne copie de cest exploit d'assignation qui m'a esté signifié , afin que vous comparoissiez en ma place au iour de Iugement , pour vous deffendre des mesmes offenses de vanité , dont i'ay esté autresfois conuaincu , mais dont ie suis maintenant absouz , par la resolution que i'ay prise de ne les commettre plus avec l'ayde de Dieu. Tellement que c'est à vous à deffendre ceste cause , puis que ie n'y ay plus d'interest.

Je reuiens à vous, ô Vierge incomparable ! & en effect voz douleurs sont aussi sans comparaison, puis que vous auez eu vostre moitié des tourmens que vostre cher Fils a soufferts chez Cayphe , & souffre encore dans sa prison. Tous les coups qu'on luy a donnez ont rejaly dans vostre chaste

chaste sein. Si on a craché sur sa face, il me semble que la vostre est ternie des mesmes ordures, & maintenant qu'il est enchainé dans la prison, vos pensees qui luy tiennent vne fidele compagnie sont esclaves avec luy. S'il pleure vos yeux sont des fontaines; S'il soupire vostre cœur est l'Echò de ses soupirs, & s'il se plaint vos regrets frappent l'air, d'un mesme ton de pitié. Ce qui me fait croire que quoy que la passion soit toute pour luy, l'amour vous y faict trouver vostre part, comme s'il y auoit deux croix & deux morts à partager ensemble. Je sçay que l'amour aussi bien que la Nature vnit vos cœurs si estroitement, qu'il est impossible que le trespas frappe l'un, sans toucher l'autre. De sorte que ie vous voy reduite ô Reine des Vierges en mesme estat que mon Sauueur, puis qu'un mesme arrest, vous condamnera tous deux à la mort.

Courtisans representez vous quelque fois, la faleté du lieu où ces Fourriers d'Enfer ont logé nostre Seigneur. Vous faites vostre demeure dans des superbes Palais & mon IESVS n'a pour retraite qu'un Cloaque. Vos chambres esclatent en or, de toutes parts, & celle de mon Dieu n'est tapissée que de fumier. Vos lits sont tous de foye, & la couche de mon Sauueur est toute de bouë. O espouventable verité: car à l'heure de la mort, comment vous deffendrez vous cōtre ce facheux souuenir de tant de delices dont vous aurez dorloté vos corps, à demy pourris. Ce ne sont point des fables. Vous voyez en quel estat de misere vos pechez ont reduit ce diuin Redempteur. Mais vos ames sont bien plus miserables encore, puis que les Demons les attendent de pied ferme à la sortie de ceste maison de vanité qu'elles tiennent à lōuage, afin de les conduire

duire en Enfer où ils ont des-ja marqué leur logis; Non pas pour vn iour, pour vn mois, ou pour vn siecle, mais pour vne Eternité; O Eternité, Eternité que tes abismes sont profonds !

Confidez vn peu encore hommes du siecle ceste verité, que durant le temps de vos esbats, Il y a vn nombre sans nombre de Religieux qui sont captifs, à l'exemple de nostre Sauueur, dans la prison de leurs celules ayant le cœur enchainé de son amour, & la volonté esclaué sous les liens de leurs Superieurs, celebrant par ces glorieuses actions de seruitude, la memoire de la captiuité de leur Redempteur. Est-il bien possible que parmy vne si grande foule de soupirs profanes qui sortent incessammēt de vos cœurs, vous n'en iettiez au vent quelque nouueau de la compassion de vos propres miseres. Estre informez de tout ce qui se passe chez Cayphe, & sçauoir que le Re-

E 3 dempteur

dempteur du monde est enseuely tout viuant dans le tombeau d'un Cloaque, dont la puanteur est effroyable, ayant tousiours la corde au col, les mains liées, les pieds enchainez, le visage couuert de crachats & tout le reste du corps chargé de differentes playes, sans autre esperance que celle d'estre plus cruellement traité le lendemain. Et au lieu de vous laisser mourir de regret par la seule imagination de tous ces supplices qu'il endure. Continuer tousiours vos ris & vos dances: helas vous ne prenez pas garde que tout en dansant vous allez en Enfer, & que le Temps & le Diable vous y attirent à pas mesurez, afin que vous ne sortiez iamais de cadence. Je vous enaduertis encore de la part de ce mesme Seigneur que le peché de nos Peres tiennent en prison, admirez sa bonté, & confessez vostre malice.



LE BREVIERE

DES

COVRTISANS,

A TIERCE.

CHAPITRE III.

*Attendite & videte si est dolor sicut
dolor meus.*



COVRTISANS n'assisterez vous point encore à ce troisieme Office de la Passion que mon Sauueur va celebrer sur l'autel d'une Colonne, où il doit repandre de nouveau le

E 5

plus

plus pur sang qui luy reste apres tāt de playes, non pas par vne sueur d'amour; mais plutoſt par vne greſle de coups qui luy eſcorcheront la peau, qui luy perceront les veines, qui luy rompront les nerfs, qui luy briferont les arteres, & qui luy froiſſeront les os? Que ſi vous refuſez de porter vos yeux & vos penſees, à ce funeſte ſpectacle, preſtez au moins vos oreilles au recit de toutes les cruauitez qu'on a exercees contre ce doux I E S V S.

L'Aurore triſte, & larmoyante, paroit le lendemain ſur l'Emiſphere de Hieruſalem; & ſes ſombres rayons perçant le voile des nuages qui l'entourent, annoncēt la naiſſance du plus beau iour qui fut iamais, & du plus effroyable tout enſemble, puis que ſa lumiere, quoy qu'eſclatante de grace, ſorte du milieu des greſles, des eſclairs, & des foudres: Car ie voy ſon diuin Soleil tout couuert de ſang.

Je veux dire qu'au plus matin, la Vierge, ceste triste & larmoyante Aurore, se fait voir dās les rues de Hierusalē, pour apprendre des nouvelles de son bien-aymé. Et ses regards, perçant le voile de cristal de ses larmes, presagent aux ames deuotes la naissance du iour de leur salut; Mais iour plain d'Esclairs, & de Foudres, puis que son cher Filz, qui en est le Soleil, sort tout fraichemēt de la Mer Rouge de ses tourmēs, où il auoit fait dresser sa couche sanglante.

Les Bourreaux ne sont pas plustost esueillez qu'ils vont ouurir le Cachot, où ils auoient enseuely mon Redempteur, & le trouuant resuscité, apres tant de morts qu'il auoit souffertes ils se mettent en action de luy arracher la vie du sein par des nouveaux supplices, & leurs esprits sont des-ja occupez en l'inuention des instrumens. Ils commencent à le trainer chez Pilate, lequel d'abord
con.

contrefait l'homme de bien, temoignant à son action qu'il a deffain de rendre Iustice à cest Innocent. Il l'interroge, & luy demande *s'il est le Roy des Juifs.* Nostre Seigneur luy repond: *qu'il est Roy vrayment; mais que son Royaume n'est pas de ce monde.* He comment le peut on croire? ô doux Sauueur! Car ayant créé le Ciel & la Terre, vostre Empire n'a point des limites. Et toutesfois l'amour luy en donne maintenant, puis que vostre Puissance adorable, est esclaué dans les mesmes liens qui assubjetissent vostre Corps. *Vostre Royaume n'est point de ce monde,* afin que Pilate ne craigne point en vous, vn nouveau Cesar, pour estre puny de l'iniustice qu'il peut commettre. *Vostre Royaume n'est pas de ce monde,* puis que vous y auez souffert la faim, & la soif. *Vostre Royaume n'est pas de ce monde.* Si la couronne n'en appartient au plus miserable, dont vous faites

faites le personnage, sur le Theatre de ce Pretoire. *Vostre Royaume n'est point de ce mode*, puis que vous n'avez pour sceptre qu'un Roseau, & pour couronne que des espines. *Vostre Royaume n'est pas de ce monde*, parce que les Grândeurs n'en font que de vent, & la Gloire que de fumee: En fin *vostre Royaume n'est pas de ce monde*, d'autant que vous y estez né, que vous y avez vescu, & que vous y voulez mourir encore en sujet.

Pilate cependant admire tant de douceur sur son visage, tant de grace en son action, & tant de sagesse en ses paroles, qu'il ne peut plus celler la verité qu'il a recognuë de son Innocence. Il la publie tout haut, & soustient que cest homme est fauslement accusé, puis qu'il est impossible de le convaincre. Mais il me semble que la crainte qu'il a de Cesar l'empesche de parler hardiment, & de dire que ceste
mesme

mesme personne qu'on tient pour coupable est la vraye Innocence, & qu'au lieu de l'immoler, elle merite des sacrifices : Que si on doute de sa Puissance, qu'on prenne à tesmoing les morts qu'elle a resuscitez : Si on ne peut adjoûter foy à sa Bonté, qu'on interroge les muets à qui elle a donné la parole, pour la publier. Et qu'en fin les sourds auroient recouuré l'ouye au son de sa voix, & que l'esclat de sa seule Presence, auoit illuminé les aueugles.

Ha Pilate si tu eusses presché toutes ces Veritez qui t'estoient si apparentes, tu eusses imposé silence à ces langues de Vipere, dont les coups enuenimoient ton cœur par les oreilles. Toutesfois on ne t'eust pas creu : Car si t'eusses mis en auant que la Presence de mon Sauueur illuminoit les aueugles ; on t'eust peu respondre, & s'enquerir ; Pourquoi tu demeuerois dans

dans l'aveuglement de ton iniquité,
deuant ce diuin Soleil de Iustice?
Que si tu eusses soustenu encore, que
les sourds auoient recouuré l'ouye au
son de sa parole; Quelqu'un t'eut peu
reprocher ta malice, ne voulant pas
guerir ton ame de la surdité où ses
crimes l'ont reduite par le remede de
ceste Voix diuine qui resonoit si sou-
uent à tes oreilles. De maniere que
ta crainte, quoy que criminelle t'est
en quelque façon vtile.

Pilate ne sçachant par quel moyen
se recuser en cete affaire, où il ne vou-
loit point estre Iuge; enuoye ce
doux Sauueur à Herode, qui en fut
extremement aisé, comme curieux de
voir celuy dont la naissance auoit
cousté tant de morts, suiuant le cruel
arrest que son Pere en auoit prononcé
contre les Innocens.

Ce Prince s'informe à nostre Sei-
gneur de son nom, de sa qualité, & de
ses

ses actions, & luy dit encore qu'il a ouy parler de tous les miracles qu'il a faits, & qu'il en est vn des admirateurs. Ce doux IESVS ne respond point à tous ces discours: Mais chose estrange, en voulant cacher la verité de sa Grandeur par son silence, il en fait paroistre les merueilles par son humilité. O diuin Redempteur! vos oreilles ne se plaisent pas d'oüir le recit des miracles que vous avez faits, & vos actions sont toutes miraculeuses. Vous ne pouuez souffrir les loüanges qu'on vous donne, & le refus que vous en faictes, avec vostre grace ordinaire, vous rend si loüable, qu'on ne sçait comment dire, pour vous loüer dignement.

Herode importune tousiours mon Sauueur de luy respondre, & le prie de faire quelque nouveau Miracle, avec promesse de croire en luy, & de luy donner pour present, son Sceptre
& sa

& la Couronne. Mais ses prieres ne font point exaucees; quels diuins mysteres nous cache encore ce silence? La Parole est sans voix. Ce doux IESVS setait, apres auoir fait parler les muets, comme s'il craignoit en parlant, de conuaincre ceux qui l'accusent Herode le peut sauuer, il est vray; mais la qualité qu'il porte de Sauueur, luy est mille fois plus cher que la vie. D'ailleurs il faut necessairement qu'il meure, puis que son Innocence tient lieu de crime.

Ce Roy luy demande des miracles, & il ne considere pas que son silence est tout miraculeux. Que s'il desiroit toutesfois contenter sa curiosité, que ne le prioit il de faire le Miracle de sa Conuersion, le metamorphosant de beste en homme, & en homme juste, & raisonnable. Il croyoit tenter ce Seigneur en luy offrant vn Sceptre de bois pourry, & vne Couronne de terre

doree. A luy dis-je qui dispoſoit ſouuerainement des Empires, & des Royaumes. Pauvre abusé, il offroit ſes Grandeurs, & ſes Richesses, à vne personne, à qui elles appartenoient en propre, au lieu de luy faire present de son ame, cōme d'un chose dōt il pouuoit disposer absolūmēt. Je plains son malheur; mais ie condemne sa malice.

Herode picqué au vif du silence de nostre Seigneur, le renuoye à Pilate, apres l'auoir fait vestir par rusee d'une Robe blanche; comme si c'estoit un fol; quelle Merueille pourtant reluit en ceste action de mespris. On pare l'Innocent, des liures de l'Innocence: & l'on dōne à la Pureté ſes plus riches habits; Seigneur comment croiray-je que le Ciel est bleu, puis que vous estes tout blanc? On tient aussi que l'Astre du jour n'est paré que de lumiere; Et ie vous voy Beau Soleil, avec d'autres Ornaments. Ce qui m'estonne
encore

encore d'auantage, c'est que vostre Prophete nous assure que vous estes vermeil, comme la Rose; & toutesfois vous estes blanc, comme le Lis; Sans mentir le mystere en est beau: car vous estes blanc comme le Lis, dans ceste vallee de souffrance, puis que vous estes vn *Lis de vallee*; Et tantost sur la montagne vous serez vermeil comme la Rose, puis que vous estes vne Rose de montagne, toute entourée d'espines: O adorable Merueille!

Courtisans vous n'avez garde de porter le blanc de l'innocence, comme mon Sauueur. Vous aimez mieux le bleu, pour marque de la fidelité que vous avez voüee au Monde, puis que c'est la couleur des fideles. Vous cherissez l'incarnat, ceste couleur d'amour, estant passionement amoureux de la vanité que vous professez. Le verd ne vous est point desagreable, dans l'esperance de posseder tous ce

biens faux & imaginaires, dont vous estes idolatres. Le iaune vous plaist bien aussi, pour tesmoigner les plaisirs dont vous iouïssiez; Mais quelles couleurs porterez vous le iour de vostre trespas? Le crains que vous ne soyez tous couuerts d'orengé, dans le defespoir de vostre salut, & que vos visages bleus-mourant, comme mourant fideles au monde, ne fassent porter le noir à vos ames pour vn jamais.

Le voudrois bien scauoir encore; qu'est-ce que vous respondrez à nostre Seigneur, au iour du iugement, lors qu'il vous demandera compte de ceste belle Robe blanche qu'il vous a donnee au sortir des fontaines du Baptisme? Ne ferez vous pas honteux de luy dire que vous l'avez troquee avec le Diable, & que vous avez pris en eschange ceste noire de couleur de peché mortel, dont vostre ame est

couuerte? Arrestez vn peu vos Esprits en la consideration de ces discours, puis qu'ils vous touchent de si pres, tandis que ie suiuray mon chemin pour rencontrer nostre Sauueur.

Le voicy qu'on ramene encore chez Pilate: Et ce faux Iuge fait semblant de n'en estre pas bien aise, se voyant contraint, par interest de fortune, de condamner ceste Innocent à la mort. Il s'efforce toutesfois de persuader aux Iuifs, que cest homme n'est point coupable, & par vne nouvelle inuention, il fait dessain de le sauuer. La coustume estoit de deliurer vn prisonnier toutes les Festes de Pasques. Il donne donc le choix aux Iuifs de Barabas, & de nostre Seigneur; quel crime. Il met en comparaison vn voleur, & vn assassins, avec le Fils de Dieu: comme si ces extremittez si esloignees se pouuoient ioindre. La Terre, avec le Ciel, ou pour mieux

dire, l'Enfer, avec le Paradis. Ha ie decouure le secret. Barabas est cest Adam, ce voleur du fruiet de vie, & ceste alassin de toute sa race, & le voila en presence de la Iustice diuine avec IESVS-CHRIST. Le Coupable est absous, & l'Innocent porte la peine. Adam est exilé aux Lymbes pour quelques annees, & mon IESVS est condamné à la mort. Je veux dire que Barabas est banny hors de Hierusalem, & mon Sauueur hors du monde: mais ce ne sera que pour trois iours, en despit du Iuge detestable qui en doit prononcer l'arrest.

Courtisans, ne vous semble t'il pas que les Iuifs ont exercé vne cruauté inouye, & sans exemple, en ceste action particuliere de preferer Barabas, cest insigne voleur, à mon IESVS tout Innocent, & tout Iuste? Mais que direz vous si l'on vous conuainq du mesme crime enuers ce mesme Sauueur.

Sauueur. Car combien de fois preferez vous le seruice du monde, ce voleur, & cest a'assin, à celuy de Dieu, dont la bonté est infinie. Quand il s'agit de l'interest de l'vn ou de l'autre, vous criez avec les luifs, que vous estes pour Barabas, ie veux dire pour le monde. Et par ces actions de perfidie il ne tient pas à vous, que ce doux Redempteur ne meure encore vne fois, puis que vos nouvelles offenses, luy preparent des nouveaux supplices. Je m' imagine que vous changerez de ton, & de voix, à l'heure de la mort; mais il ne sera plus tēps: car apres auoir suiuy le monde avec Barabas, vous trouuerez l'Enfer au bout de vostre cariere. Je vous en laisse la meditation.

Pilate est bien estonné d'entendre les cris de ceste populace enragee, qui demande le sang de ceste homme Iuste. Il se resoud pourtant de leur en donner vne partie, & à cest effect, il

condemne mon Sauueur à estre flagellé à la discretion des Bourreaux: O inique sentence, & mille fois plus meschant encore le Iuge qui l'a prononcee ! Vit on iamais rien de plus inhumain que de liurer vn homme entre les mains de ses ennemis ? & où sont les loix qui en authorisent l'arrest ? Voila à quoy se terminent toutes ces fauces apparences de bonté, & de justice, dont ce detestable President couuroit, & ses paroles, & ses actions. Il tenoit pour l'Innocence, & toutesfois il condamne l'Innocent. Il ne trouuoit rien de reprochable en cest homme, & pourtant il le fait punir comme s'il estoit criminel. Ce n'est pas qu'il desire sa mort ; mais il expose sa vie au danger de mille morts, plus cruelles que la mort mesme. Il faisoit conscience de voir respendre le sang de l'Innocent, & il permet aux Bourreaux d'ouuir à coups de fouiets

toutes

toutes ses veines. Ha Pilate que ce sang te coutera bien cher.

Les Bourreaux qui estoient aux aguets & aux escoutes pour ouir prononcer cest arrest, se faisoient de ce doux Sauueur, & l'entraignent dans vn lieu destiné à donner la genne aux criminels, & à l'instant mesme le despoüillent à nud, & luy attachent les mains à vne Colonne.

Mais il me semble pourtant, mon diuin Redempteur, que vous n'avez pas encore quitté vostre Robe blanche, puis que vous estes plus blanc que iamais. Beaux Astres cachez vous de honte, en presence de ces chastes merueilles. Toutesfois leur esclat est assez puissant pour vous seruir de voile, contemplez les hardiment avec vos yeux ialoux, on ne vous verra pas. Si faut-il que ie die ceste verité. Que le Soleil ayant mille & mille fois parcouru les ronds espaces de sa carriere,

pour treuuer vn miroir capable de représenter sa beauté, il estoit encore en la mesme peine. Mais voicy vne glace miraculeuse, de Lis, de Neige, & d'Albastre qui le represente au naturel. Car ie voy que cest Astre se mire dans ce beau Corps de mon Sauueur, où il se contemple, avec les mesmes rayons qui l'environnent, avec tous les esclats qui le parent, & avec les doux brilans qui entourent sa teste. De sorte qu'on diroit qu'il est nuict par tout, fors que dans ce lieu, où le Soleil en se regardant dans sa source deuiet amoureux de luy-mesme, comme vn autre Narcisse; Mais voulez vous voir son naufrage, ie veux dire son Eclypse? Imaginez vous que mon Sauueur, ne pouuant plus retenir son sang, que l'amour faisoit des ja bondir dans ses veines, tourne tant soit peu ce miroir de son Corps du costé de sa Diuinité, & à
mesme

mesme temps ceste glace produit des rayons si esclatans, que le Soleil en demeure offusqué, & dans son esblouissement, il est contraint de paracheuer sa course. Mais la fin de toutes ces merueilles, est le commencement de ces cruautez, dont le recit amolira sans doute les plus barbares.

Après que les Bourreaux eurent appresté leurs foyets de corde, leurs chaines de fer, & leurs verges à ronces. Deux des plus inhumains gagnent le deuant, & la preceance pour représenter le premier acte d'une nouvelle Tragedie, & sans perdre temps deschargent le pesant fardeau de leur fureur, & de leur rage, sur le Corps sacré de mon Redempteur: Chasque coup fait vne playe, chasque playe produit vne fontaine de sang: Et les coups estants redoublez à tous momens, on ne voit que des nouvelles playes, & des nouveaux ruisseaux.

ruisseaux. Et en fin comme les coups sont sans nombre, on ne peut de mesme compter les playes, & ces fontaines, & ces ruisseaux de sang, font ensemble vne mer.

Ha Seigneur accordez moy ceste grace de me pouuoir sauuer à la nage dans ceste mer, puis que ie ne trouue point d'abry sur la terre, contre les foudres de vostre Iustice. Je tremble de peur, ie frissonne d'estonnement, & ie meurs d'effroy en la consideration de ma malice, & de vostre bonté. Quoy, vous conseruez si cherement mon sang tout brullé par le feu de mes passions, & vous respandez le vostre si pur, & si precieux avec tant de prodigalité, que la terre en est toute couuerte. Helas ! de quelque costé que ie me tourne ie voy les abysses ouuerts pour m'engloutir : Car comment entreray-ie dans vostre Paradis, si vous en ouurez vous mesme

me la porte avec la Clef de vostre Croix ? Vous souffrez qu'on decoupe vostre chair sacree à lambeaux, pour espargner la mienne toute noire de peché, & toute puante de pourriture. O doux Sauueur ! sauuez moy à quel prix que ce soit ; s'il faut estre escorché tout vif, i'en suis content, puis qu'aussi bien ma peau ne vaut rien : s'il est necessaire de noyer ma vie dans mon sang, donnez moy seulement le temps, s'il vous plaist, de l'espurer, afin que le naufrage en soit plus glorieux. Si ma teste doit estre couronnee d'espines, il y a plus de gloire que de douleur, puis que vous estes mon exemple. Et d'ailleurs mon corps ne peut refuser les espines, dont mon ame a cueilly les Roses. Faut-il estre cloué à vostre Croix ? ie m'en nuye des-ja en l'attente de rendre les abois sur vne si belle couche. Et ie vous supplie de croire que si ma volonté

lonté estoit toute puissante, pour vn moment, celuy cy où ie respire seroit le dernier de ma vie : Car ie mourrois sans doute de vostre amour, sur l'autel amoureux de la croix. Et afin que l'ardeur de mon zele, supplée au defaut de mon pouuoir, lisez en s'il vous plaist la verité dans mon cœeur, puis que les cabinets vous en sont ouuerts. Mais tous ces discours, & tous ces souhaits n'empeschent pas que vous ne soyez tourmenté iusques au mourir : car vous en mourriez sans doute, si vous n'auiez fait dessain d'endurer encore vn nombre infiny de nouvelles morts.

Ces deux premiers bourreaux auoient des ja lassé leurs corps à genner celuy de mon Sauueur. Ils auoient employé toute leur force à luy faire repandre tout son sang, & ils auoient perdu l'haleine en ce dessain, de luy faire perdre la vie. Les foyets de corde,

de, touchez de quelque secret sentiment de pitié, s'estoient rompus, & les cœurs de chair de ces Barbares demeurent en leur entier, & mon Redempteur le souffre pour souffrir d'avantage, sçachant que leur compassion, ne peut compatir avec son amour. Voyons au trauers de nos larmes, le second acte de ceste nouvelle Tragedie.

Deux autres Bourreaux, egale-
ment alterez du sang de cest *Homme Juste*,
viennent à leur rang, armez de chaines,
& tous deux sur vn mesme ton de
fureur, frappent en cadence ce bon
IESVS; mais avec tant d'effort, que
chasque coup espuise vne veine. Et
apres que le sang en est respendu, les
coups renouvellez en brisent les vais-
seaux. Et comme la Rage les anime à
faire des plus grandes breches, estant
toufiours en action, & en exercice,
ils battent en ruine ce Corps tout
adorable:

adorable : Car tantost ils en rompent les nerfs, & d'un mesme coup ils en ecrasent les arteres, puis d'un dernier effort, ils en froissent les os.

Courtisans que dites vous au recit de toutes ces cruauitez d'Enfer ? Mais plustost quel est vostre ressentiment en la seule pensee de ces supplices incognus, & inouis dont l'Humanité Saincte de mon Sauueur est bourrelée ? Vous voyez comme le peché de vostre chair a deuoré la sienne, iufques aux os. Vous vous baignez dans des fontaines d'eau de senteur, & mon IESVS dans les ruisseaux de son sang, ou plustost dans la mer. Vous parez richement vos corps, & de lin, & de foye, & l'on escorche celuy de mon Sauueur, luy arrachant l'habit de sa peau, pour voir palpiter ses entrailles. Vous prenez plaisir d'engresser ceste mesme carcalle puante, & mon Redempteur apres auoir donné toute sa chair,

chair, & tout son sang, il attend encore avec impatience les autres Bourreaux, pour repaistre leur furie de la moelle de ses os. Si l'on vous pique d'une espingle, vous en venez iusques à la cholere, de la cholere aux blasphemes, & des blasphemes souuent à la vengeance. Et mon diuin IESVS a des-ja digeré le premier mets de cordes, qu'on luy à presenté, en ce sanglant festin: Et du second des chaines, il en nourrit son amoureuse enuie, sans ouurir la bouche que pour soupirer de la pitié de ces ames crimineles, qui bourellent son Corps. Vn regard vous offense, vne parole de raillerie seulement met vos esprits en desordre. Et ie contemple mon adorable Sauueur bafoué, enchainé, & battu iusques au poinct d'agoniser dans les douleurs qui tiennent son cœur & son ame à la genne Si l'on respand sans y penser vne goutte d'hui-

le sur vos beaux habits, ou si l'on fait
rejalir dessus vn peu de bouë: Vous
voila aux injures, de là, aux dementis,
& des dementis, sur le pred, pour vous
couper la gorge. Et mon Createur
voit d'vn œil sec respandre son sang,
& d'vn mesme œil vous regardez en-
core effrontement son beau visage
tout couuert de la bouë des crachats;
Quelle honte vous fera ce? en quelle
confusion ferez vous réduits? & de
combien d'inutiles regrets aurez vous
le cœur blessé, & l'ame atteinte en
cest effroyable moment, où il faudra
rendre compte de tous ceux qui l'au-
ront deuané. Veritablement ie ne
sçay de quelle trempe sont vos es-
prits: mais il faut que ie confesse, que
toutes les fois que ie pense à ce der-
nier instant, qui doit presider à mon
repos eternal, ou à ma perte, de mes-
me nature, le sang me gele dans les
veines, par vn frisson de peur, & d'ef-
froy.

froy, qui met toutes les puissances de mon ame en alarme. Je ne sçay où i'en suis, tout me deplait, & si ie pouuois fuir loing de moy-mesme ie serois tousiours à la compagnie des Douces pensees de la mort, dont ie vous ay fait present: Car apres tout il en faut venir là. Vostre bonne mine, vostre riche taille, vostre reputation, vostre grandeur, vostre bel esprit, & toutes vos richesses ensemble ne vous exempteront point du trespas. Il faut en fin arriuer au lieu, d'où l'on s'approche continuellement. Vous mourez sans cesse, & le vent de vostre haleine, qui est l'horloge de vostre vie, vous en marque les momens à tous momens, afin que vous scachiez à toute heure, quelle heure il est, pour n'estre pas surpris du temps, qui va si viste. Je vous donne encore cet aduertissement.

Ces forgerons d'enfer estant enco-

re lassez de battre sur cette enclume, avec les marteaux de leurs chaines, leur fureur s'augmente, à mesure que la force leur deffaut: car ils voudroient remporter le prix sur leurs compagnons, en reduisant mon doux Sauueur, aux derniers abois; par l'industrie de leur cruauté. O adorable amour! que tes merueilles m'estonnent. Ce diuin Redempteur ne se lasse point de souffrir, & ces bourreaux sont lassez de le tourmenter; Quel est vostre deffain Seigneur? quelque parfaite que soit vostre Nature, il faut en fin qu'elle succombe sous la gresse de tant de coups. Vous n'avez plus de peau, & moins encore de sang, puis que toutes vos veines sont en pieces, vos nerfs rompus, & vos arteres brisez: Que vous rest-t'il encore pour auoir tant de courage? peut estre vn peu de moelle. Mais voicy des chiens enragez, qui viennent ronger

ger les os, de la chair qu'ils ont deuoree.

Deux autres Bourreaux se presentent, à leur tour, pour s'efforcer d'emporter la victoire par la deffaicte de mon IESVS. Et de l'entue venant aux effects, ils emploient leurs premiers efforts en ceste entreprise. Les instrumens dont ils se seruent ne sont plus de corde ny de fer, parce que les cordes se rompent, & que le fer meurtrit la chair seulement, sans faire des grandes playes. De maniere qu'ils choisissent des longues verges à ronces, dont ils luy percent les os: O Dieu de Bonté, & de Patience! Avec combien de differentes chaines nous atirez vous à vous? Car apres vous estre redeuables de la Creation, & de ce dessein de Prescience, où de toute eternité nostre Redemptiō a esté determinee, vous estes descendu en terre pour en ressentir toutes les miseres, sans autre

raison que celle de vostre pure volonté, & sans autre volonté, que celle de vostre amour, & non content encore, vous nous marquez les traces du chemin du Ciel, à la veille de vostre départ, avec tout le sang de vos veines, afin que nous ne puissions pas nous egarer que par malice. Que faut il faire Seigneur, en recognoissance de tant de bienfaicts? de vous louer incessamment, les termes nous manquent: De vous presenter des larmes, nous n'en auons pas assez pour pleurer nos pechez, & pour nostre sang, il appartient à vostre seule Iustice en expiation de nos crimes. Faiçtes donc en nous, Seigneur, tout ce qu'il vous plaira digne de vous, puis que la seule volonté que nous auons de vous remercier de tant de faueurs, est vne ouurage de ceste mesme Bonté, qui nous les a si prodigalement de parties. Allez plus auant, si ce chemin vous plait.

Ces Bourreaux recourent des nouvelles forces de la foiblesse de mon Redempteur : Car croyant à chasque coup qu'ils luy donnent de luy arracher le dernier soupir des entrailles, ils rassemblent tout leur vigueur en leur action. Mais c'est en vain, l'amour de mon I E S V S, soutient elle seule dans son cœur tout l'effort de ces cruelles attaques. Je dy dans son cœur, parce qu'on l'a chassée des veines, des nerfs des arteres, & des os. Tellement qu'elle n'a point d'autre retraite que ce Cœur Genereux, d'où elle resiste puissamment contre tous ses ennemis. La nature foible, & desarmée, a beau perdre courage : Cette amour, toujours inuincible, luy redonne à tous momens des nouvelles forces pour triompher de ses vaincqueurs. Mais durant cette sanglante guerre, de la Cruauté, contre l'Amour. En quel

estat vous voy-je reduit mon doux Sauueur?

Peut-estre on s'est estonné dequoy i'ay mis en auant que le Soleil s'estoit miré dans vne glace de Lis, de Neige, & d'Albastre, figuree par le Corps de mon Redempteur; qu'on ne s'en estonne plus: Car comme le Lis se flettrit, cete Glace s'est flettrie: comme la Neige se fond, cete Glace s'est fonduë, & comme l'Albastre se ternit, cete Glace s'est ternie, & si vous ne le croyez pas, jettez les yeux sur cet ay-mable Seigneur; que dis-je? quel œil pourroit porter ses regards sur vn objet si deplorable, sans perdre la veuë à mesme temps? Informez vous en donc à ces Bourreaux: Mais qui oseroit prester l'oreille au recit d'une verité si funeste, sans se resoudre à la mort? Croyez le donc, & ne vous en enquezrez pas d'auantage; Pourrez vous bien aussi le croire & ne mourir point de regret,

regret, ou de pitié? Je vous en laisse le hazard, puis que la mort en est si glorieuse.

Beau Soleil tu peus bien perdre la curiosité que tu as de te mirer dans le miroir du Corps de mon Sauueur, puis que la glace en est rompuë en tant de pieces, que la plus petite n'en paroît pas.

Mais c'est vous belle Lune, qui pouuez darder vos rayons d'argent dans ce Miroir, quoy que la glace en soit brisée. Parce que comme vous receuez vostre lustre de la lumiere de cet Astre diuin, que la Cruauté veut faire eclypser, il faut necessairement qu'il vous esclaire, pour vous rendre esclatante. De sorte que sa lumiere estant offusquee par cete effroyable tempeste que les Demons & les Enfers ont fait naistre, vous participez à son obscurité. Toutesfois il n'est point enuironné des tenebres, puis

G 5

qu'il

qu'il est tout rouge, comme tout enflammé d'une amoureuse ardeur. Ce qui me fait croire que vous estes de mesme toute couuerte de feu, dont il est embrasé.

Je diray maintenant, selon ma pensee pour expliquer cete allegorie, que la tres-Saincte Vierge ressentoit viuement sur son chaste corps, par la seule vertu de son amour extreme, les mesmes douleurs que son cher fils enduroit: Car se representant dans son imagination tous les supplices dont on gennoit mon doux Sauueur. Cete parfaite amour qu'elle auoit pour luy, agissant à son ordinaire, d'une façon toute diuine, avec la force de l'idee, elle se sent escorcher la peau, rompre les nerfs, briser les veines, & froisser les os, sans repandre vne goutte de sang. O Amour, Amour! tes ceuures sont trop admirables pour nos foibles esprits.

Qui

Qui douteroit aussi que cete adorable Mere fut exempte du tourment que son bien-aymé enduroit, puis que la chair de l'un, estoit la mesme chair de l'autre, & que tout le sang du Filz, estoit fortý des veines de la Mere. De maniere que si l'Aimant fait mouuoir le fer, & l'Ambre la paille, par vn effort d'affinité, n'est il pas plus croiable que ces deux cœurs sacrez du Filz & de la Mere ne pouuoient receuoir de l'alteration, sans le ressentir egale-ment par vne mesme atteinte. I'ay peur de m'esgarer.

En fin apres que ces Bourreaux ont lasé leurs corps à deschirer, & à mettre en pieces celuy de mon Sauueur par six mil coups, tous acerez, comme des flesches, ils prennent plaisir à le contempler en cet estat deplorable, disputant à l'enuy, quel d'entr'eux luy auroit fait les plus grandes playes.

Courtifans mettez d'accord des Barbares , en leur soustenant , puis qu'il est vray , que vos crimes ont esté les foüets, & les bourreaux qui ont tourmenté de la sorte cet ayable Createur. Mais apres l'auoir confessé, qu'vn cuisant regret , & vne sensible repentance , vous face pleurer par les yeux , tout le sang que vous auez dans les veines. Vous voyez en quel estat de misere , vostre chair impudique a reduit cete chair innocente & sacree de mon IESVS. Sera t'il possible qu'apres vn si funeste spectacle, vous recommenciez l'exercice de vos lubricitez ordinaires. Que si l'amour que vous deuez à ce doux Sauueur, par reuanche, & par mille autres raisons encore, ne vous semble pas assez puissant , que l'amour de vous mesme vous y contraigne ; peut estre que de ce venin , vous ferez de la Terriaque.

Dés lors que mon I E S V S est delié,
il tombe à terre de foiblesse; Qu'est
cecy, mon Redempteur, il semble
que vous donniez la victoire à vos
ennemis, & vostre amour en ades-ja
trionphé. Ha! c'est vn strategeme
de cete mesme amour: car elle vous
fait choir sans doute dans vostre sang,
afin qu'il rentre dans vostre corps
pour le repandre encore vne fois dans
des nouveaux supplices. Le change-
ray de termes, puis que ma plume ne
peut voler si haut.

Mon Redempteur demeure long-
temps à se releuer, comme s'il prenoit
plaisir de se baigner dans cete mer de
sang, dont luy-mesme est la source.
Et à l'instant qu'il est debout, on le
couure à demy d'vne robe de pour-
pre. C'est maintenant qu'on peut dire,
Seigneur, que vous estes tout rouge;
mais rouge cōme la Rose, puis qu'en
effect vous estes vn buisson de roses,
entouré

entouré d'espines : Car ie voy qu'on vous en met sur la teste la couronne.

On fait assoir mon Sauueur sur la selete ; comme si on luy vouloit prononcer son arrest de mort. Mais c'est à dessain de luy mettre vne pesante couronne d'espines sur la teste, & afin qu'elle tienne plus fort, on en fait entrer les pointes aigues dedans, à coups de bastons. De sorte que son front est entouré d'une nouvelle couronne de ruisseaux de sang.

Courtisans ne palirez vous pas maintenant de crainte, ou ne rougirez vous point de honte, en la contemplation de mon Sauueur ? Vous voyez comme trois Bourreaux, faisant l'office de Chirurgien luy lauent la teste, la frisent, & la peignent à leur mode. Son sang est l'eau, dont on la laue, les marteaux sont les fers dont on la frise, & les ronces en sont les peignes. Mais quels differens personnaiges faites

faites vous? On frise vos cheueux, pour deseicher l'humidité de l'eau d'ambre, dont ils ont esté arrousez. Et ceux de mon Sauueur degouttent le sang en abondance. On peigne les vostres pour les rendre plus beaux, & l'on arrache ceux de mon Sauueur, pour en ternir l'esclat & le lustre. De sorte qu'ils saignent des deux costez. Vous faites coler vos mustaches sur vos iouës, & ajuster vos barbes avec des fers à compas; & mon Redempteur n'a pas vn poil à son menton, & vous voyez encore les marques sanglantes de cete ignominie.

Que direz vous en mourant? & que ferez vous apres vostre mort? Auez vous donc resolu de courre le hazard de la damnation eternelle, dont la pensèe seulement a quelque chose d'aussi effroyable que l'Enfer mesme? Vous vous amusez a lauer vos testes, c'est donc pour abreuer leurs pous:

Vous

Vous les poudrez aussi, afin de leur donner sans doute à manger; n'est-ce pas vn bel exercice? Employer la moitié d'une iournee à se preparer pour aller à la chasse des ames avec les Demons; quel mestier est cela? Vous le sçaurez au iour du Iugement, ie ne vous dis autre chose.

On vous salue cependant, mon Sauueur, en qualité de Roy des Iuifs, & permettez moy de vous saluer en qualité de Roy des Miserables, puis que vostre couronne est toute de douleur, & vostre sceptre, tout de mespris. Ie ne laisseray pas toutefois de vous honorer dans vostre ancantissement, avec tous les respects d'une ame qui vous adore, & avec toutes les soubmissions d'un cœur passionné de vostre amour. Car ne sçay-je pas bien que les cercles des Cieux, sont autant des couronnes, qui environent vostre teste, & que
vostre

vostre toute Puissance, est vostre sceptre ordinaire : Que si vous auez choisy les espines, c'est pour couronner vostre amour à la fin de la Carriere, puis que vostre vie toute amoureuse, a guidé continuelement vos pas dans vn chemin parsemé de Ronces. Ce qui me fait croire que vous estes vn Buisson ardent, mais ardent d'amour, & vostre adorable Humanité vn Bouquet d'espines. En effect, ne puis-je pas souttenir que vostre Conception est vne espine, ayant commencé de souffrir en imagination, & en jdee, dans ce premier moment de vostre vnion hypostatique. Que vostre Naissance est espineuse, puis que vostre Berceau a esté fait d'espines aussi bien que de foing & de paille, à cause du froid que vous auez enduré. Que vostre Enfance est vne nouvelle Espine par vostre fuite, & par vostre bannissement. Que

H

vostre

vostre adolescence est encore vne espine qui n'ait de la sueur de vos trauuaux, nourrissant vostre corps des peines qu'il endure. Que vostre age viril est vne autre espine qui croit dás le dezert où vous jeunez quarante jours. Et maintenant pour paracheuer vostre cariere vous vous faites encore couronner d'espines. Combien de Merueilles nous decouurira cete Verité.

La Terre ayant esté maudite par vostre Iustice, elle est condempnee à ne porter que des Ronces, & des Espines. Et vous-mesmes ayant pris la peine de la labourer l'espace de trente ans, & dauantage, elle ne vous a produit que les fruits de sa Malediction : Mais Seigneur vous en faiétes vne recolte generale, & apres les auoir mises en vn monceau, vous les chargez sur vostre teste. De sorte que la Terre se pare tous les-jours de mille fleurs

fleurs nouvelles, qui ne se flétriront
iamais.

Helas diuin I E S V S, qui voudra
maintenant des Roses, vous voyant
couronné d'espines. Je ne m'estonne
plus si les fleurs ne durent qu'un ma-
tin, elles suivent le sort du mespris
qu'on fait d'elles, à vostre exemple.
Tellement qu'elles se flétrissent de
honte, plutost que de fragilité.

Ditez moy Beaux astres qui ver-
sez charitablement la Rozee de vos
benignes influences sur toutes les
choses Crees: Pourquoi auez vous
exercé vostre vertu sur ces Ronces, &
sur ces Espines qui entourent la teste
de mon Sauueur, puis que c'est le pro-
pre de vostre gloire de seruir à cet
vsage. C'est l'amour sans doute qui
vous y a forcé, affin que ce Roy des
amans fut couronné des espines Roya-
les: Les plantes ont choisy les espi-
nes pour leur Reyne, puis que la

Royauté leur appartient.

Doux Sauueur ne vous estonnez pas si les hommes vous presentent des espines, puis que ce sont les fruiçts de leurs trauaux, & moins encore vn Rozeau, si culx mesmes sont des Rozeaux par leur legereté, & par leur inconstance. Ilz vous saluent comme Roy, & sans y penser, leur mespris rend hommage à la Verité.

Mais que ne puis-je, o doux Redempteur, puis que vous aymez les Rozeaux, vous offrir celluyde mon cœur, affin qu'il changeat de nature dans vos mains toutes puissantes : au moins prens-je la hardiesse de vous presenter les Espines du regret de mes offenses; affin qu'apres que vostre Misericorde les aura metamorphosées en Rosés, ie les apande à vos pieds, par vne action de recognoissance.

Courtisans ie vous laisse deuant les yeux ce Portrait de l'humilité de
mon

mon Sauueur, affin que vostre ambition trouue ses limites dans cet objet, & que vostre arrogance soit assouuie par force, voyant son tombeau ouvert. Car que pouuez vous desirer du monde, si son Createur s'en est reserue les seules espines; qu'elle sera vostre esperance, si ce mesme Createur a tout creé pour son supplice. Vous voyez qu'il n'a rien de propre que ses douleurs, & quoy qu'elles soient extremes, son amour trouue des inuentions pour leur donner de l'accroissement.

Finissons ce chapitre, pour assister à ce quatriesme office de la Passion, que mon Sauueur va celebrer deuant Pilate.

non s'achetent plus de votre amitié
 l'ordonne les heures d'iceux
 de que vous auez pour l'heure
 est loez, voyant les temps
 est. Car que pour vous de
 l'heure, l'ordonne les heures
 de la vie, l'ordonne les heures
 de l'ordonne, il ce l'ordonne
 trouvez pour son supplice. Vous
 voyez qu'il n'a rien de propre
 douleurs & de ceux de l'ordonne
 l'ordonne, l'ordonne l'ordonne
 l'ordonne pour donner de l'ordonne
 l'ordonne

l'ordonne de l'ordonne pour l'ordonne
 de ce l'ordonne de la l'ordonne
 que mon l'ordonne de l'ordonne
 l'ordonne

H 3



LE BREVIERE

DES

COVRTISANS.

A SEXTÉ.

CHAPITRE I V.

Ego sum vermis & non homo.



ON Sauueur celebre
ce quatriesme office de
sa Passion par son si-
lence, croyant que ses
douleurs seront plus el-
loquentes que ses paroles. Il faut donc
que nos l'armes, & nos soupirs, nous

H 5 ser-

seruent des voix pour tenir nostre partie en ce pitoyable concert de musique que ce doux I E S V S fait à son Pere, pour apaiser sa Iustice. Courtisans ie vous y inuite de sa part, puis qu'il ne s'agit que de vostre Intherest.

Pilate met en vuë nostre Seigneur sur les degrez de son Pretoire aprez qu'il fut flagelé, à dessain, sans doubte, de donner de la Pitié aux Iuifs, & luy mesme n'en a point. *Ecce homo.* *Voi-la l'homme* leur dit il; Mais quel homme est-ce? Vn homme d'ordinaire a des cheueux à la teste. Et l'on ne voit rien dessus son chef, que de ronces & des espines; comme si c'estoit le Tronc d'un Buiffon. Il a vn front, & les marques seulemēt n'en paroissent pas. Il a des yeux, & celuy cy, nous fait voir à leur place deux fontaines de sang. Il faut necessairement qu'il aye des jouës, vn nez, vne bouche, & vn
man-

manton. Mais de si prez qu'õ regarde, on ne voit autre chose qu'un móceau de fumier fait de crachats. Il faut encore qu'un homme aye vne langue pour parler, & des bras & des jambes pour s'en servir à leur vſage. Et il ne se presente rien à nos yeux qu'une masse de chair, tout sanglante, dont on ne peut distinguer les parties du tout, par un nombre infiny de playes, qui en rendent l'objet effroyable.

Ecce homo. Voila l'homme Pour- tant diët Pilate seroit ce donc vous mon Redempteur ; Et où est ceste belle cheueleure d'oree dont les brillans rendoient la Nature si jalouse, n'ozant s'outtenir que c'estoit un ouvrage de ses mains. Où est ce front dont la Majestè faisoit cacher de honte le Soleil. Où sont ces beaux yeux dont les regards faisoient naistre mille beaux jours de benediction, & de grace, dans les ames. Où sont ces jouës

tout

toutes de lis & toutes de Roses, où sont ces leures, tous d'œillets. Ou plustost où est ceste bouche, dõt l'aleine seulement pouuoit resusciter les mortz, & la moindre parole d'vn mesme coup faire trembler le Ciel, la Terre, & les Enfers. Où sont ces belles mains encore, dõt les plus petitz ouurages, estoïent des grandes Merueilles, où sont ces pieds sacrez qui affermissoiēt les eaux, & qui animez d'vne action de misericorde aloiēt incessamēt à la chasse des ames. En fin où est ce corps adorable qui faisoit tousiours vn Paradis du lieu qui le contenoit. Le torrent de toutes ces Merueilles s'est ecoulé, sans nous laisser d'autres marques que celles de l'amour, qui en estoit la source.

En effect Seigneur, il ne paroît rien de vous que l'amour, puis qu'au trauers de vos playes amoureuses on voit vostre cœur amoureux qui souspire incessamment d'amour, aprez vne mort semblable, ne pouuant mourir, que

comme il a vescu. Pardōnez moy si ie vous mescognois en cet estat deplorable, où mes seuls pechez vous ont reduit, d'autant qu'il me semble que vous vous mecognoissez vous mesme, azant des-ja changé le nom d'homme en celuy d'un vermisseau.

He quoy mon Sauueur vous n'estez pas satisfait d'estre liberal iusques à la derniere goutte de vostre sang. D'estre patient iusques à lasser vos ennemis; d'estre humble, iusques à estre foulé aux pieds; d'estre misericordieux, iusques à nous dōner par amour, plustost que par Iustice, vostre vie, dont la premiere respiration estoit plus que suffisante pour nostre salut. Vous voulez encore changer ce nom d'homme, aprez en auoir souffert toutes les miseres, & prēdre celuy d'un vermisseau.

Mais i'en decouure le secret? o doux
I E S V S : Car scachāt que nous sommes
tous des pecheurs, & que c'est nostre
nom

nom propre, puis que nous naissons coupables, l'amour vous metamorphose en vermissseau, pour vous faire ronger nos consciences crimineles jusques qu'elles en viennent au Repentir. O diuin Redempteur de nos ames ! vous nous comblez de tant de Biens tout à la fois, qu'il nous faudroit vne Eternité pour penser seulement aux moyens de nous en reuencher. Tirez donc vostre fatisfaction de vostre Bonté, puis que nostre foiblesse nous sert d'excuse. Et quoy que vous ayez changé de nom, permettez moy de dire de vous avec Pilate: *Ecce homo. Voila l'homme.*

Ouy *Voila l'homme* Courtisans à qui vos cheueux frisez ont fait arracher la cheuelure. *Voila l'homme* à qui vostre visage fardé le plus souuent, comme celuy des Dames, a fait cracher sur sa belle face. *Voila l'homme* à qui vostre peau si delicatement nourrie a fait

fait escorcher la fiemme. *Voila l'homme* à qui vos Habitz de parade font porter vne Robe de pourpre doublee de son propre sang. *Voila en fin l'homme*; à qui vos plaisirs coutent si cher, que ses yeux & ses veines, sont également secs, & arides, n'ayât plus d'eau, ny de sang, pour repandre. Toutefois ie veux croire que l'amour n'a pas encore laché sa derniere bonde.

Que Repondez vous à tout cela, hommes du Siecle? ce ne sont point des discours d'affeterie, & des paroles de Compliment. Voyez, confidez, & contemplez cet objet de compassion, qui vous conuainq d'inhumanité. Cet objet d'amour qui vous apele mille-fois Cruels. Cet objet d'humilité, qui crie vengeance au Ciel de vostre arrogance. Vous auez la teste couuerte d'un riche chapeau de castor, & celle de mon Redempteur n'est parée que d'espines. Vous auez
la

la barbe bien aiustee, & mon IESVS n'a pas vn seul poil au menton, luy ayant esté tous arrachez. Vos corps de bouë esclatent de tous costez d'or, & de foye, & Celuy de mon Sauueur est tout sanglant, n'ayant pour couuerture que ses playes.

O Dieu de Misericorde, ne prendrez vous iamais les foudres de vostre Iustice pour punir ces ames impies, qui ne sont capables, ny d'amour, ny de pitié. Toutesfois Seigneur vous vous estes fait lier les mains, pour nous temoigner que vostre puissance est enchesnee avec elles. Car l'heure est venue, non pas pour faire des Miracles, en redressant les Boiteux; mais plustost pour tomber soubz la grele des coups qu'on vous donne. L'heure est sonnee! non pas pour illuminer les auueugles; mais plustost pour estre auueuglé vous mesmes pas le sang qui decoule à
ruif-

ruisseaux de vostre teste. Le Temps est espiré non pas pour rendre l'ouye aux sourds; mais plutoft pour escouter les iniures & les blasphemes. La saison dis-je est venue, non pas pour guerir les Paralitiques, mais plutoft pour l'estre vous mesme, comme captif, & enchesné. Voicy le jour où vous debuez paroistre en publicq, non pas en qualité de Monarque du Ciel, & de la Terre, mais plutoft en qualité d'eselave, portant par risée, & par mespris vn sceptre de Roseau, & vne couronne d'espines: en fin c'est à ce coup que vous debuez non pas resusciter les mortz, mais plutoft mourir vous mesmes. Il me semble pourtant; O doux IESVS, & il est vray, qu'en toutes ces actions de foiblesse, & de seruitude, vostre Puissance souveraine estale au jour ses plus grands Miracles: Car la Merueille est bien plus grande, de vous voir abatu soubs

les coups qu'on vous donne avec vostre force indomptable, que de vous voir redresser les Boiteux. L'estonnement aussi doibt estre bien plus grand, de vous voir, comme auueuglé par vostre sang, vous dis-je qui estes la diuine Splendeur du Pere, que d'estre temoing lors que vous rendez la lumiere aux auueugles. Vostre Patience est bien plus admirable à ouir les iniures, & les blasphemes, dont vos ennemis blessent vos oreilles, que vostre pouuoir en redonnant l'ouye aux sourds. L'action est bien plus Miraculeuse de vous rendre Paralitique, dans vos chesnes, que d'en guerir les Malades. Et nos Espritz demeurent bien plus ravis en la meditation de vostre aneantissement, qu'en l'admiration de vostre Grandeur infinie, puis qu'elle vous est propre & essentielle. Tellement Seigneur que vous paroissez aussi Miraculeux

culeux dans ce funeste Concistoire, au milieu de voz supplices, que sur la Montaigne de Thabor, environé de vostre gloire.

Voila l'homme. dict Pilate, en effect cet vn homme, mais tout Miraculeux, comme estant engendré dans l'Eternité sans Mere, & dans le Temps sans Pere. *Voila l'homme.* Mais quel homme? vn homme tout diuin, puis qu'il est Dieu & homme tout ensemble.

Voila l'homme. mais vn homme in-
peccable, & toutesfois puny pour le
peché. *Voila l'homme* qui doibt juger
tous les hommes vn jour: prens garde
à toy Pilate.

Voila l'homme. O Pere Eternel, qui
non content d'auoir estaint les fou-
dres de vostre Iustice, dans les premie-
res l'armes de son Enfance, fait vne
nouuelle mer de son sang pour les y
abismer dedans. *Voila l'homme,* qui a
entrepris de nous faire vne Echele

pour echeler le Ciel de vostre Eternité. Et il s'en va paracheuer son ouurage sur le mont de Caluaire, où l'esperience de son industrie sera admiree en faisant monter aprez luy, vn larron dans ce ses-jour Glorieux. *Voila l'homme* encore, O Pere adorable, qui se dit nostre Caution, & vostre Fils tout ensemble. Pour nostre Caution on le peut croire; mais pour vostre Fils, qui osera se le persuader en l'estat où il est reduit. Car vous l'auiez engédre de toute Eternité, impassible, immortel, & tout puissant, & ie le voy foible, souffrant, & mourant. Mais qu'elle nouvelle Merueille, cete foiblesse, cete souffrance, & cete mort, nous persuadent avec trop de Raison qu'il est vrayement vostre Fils, coegal en substance : à vostre sacree personne, au lieu de nous en oster la Creance : parceque son amour toute puissante l'affoiblit, parceque son amour

infi-

infinye le fait endurer, parceque son amour immortelle, le fait mourir. De sorte que cette amour diuine qui le possede a tant de raport, & tant de conuenance à vostre diuinité qu'il faut necessairement que ce soit vne mesme chose avec vous mesme. Ce qui me fait adorer cet homme Dieu, de la mesme fasson que ie vous adore, puis que c'est vostre Fils vnique. Sa couronne, son sceptre, sa Robe, ses playes, & toutes les douleurs, ont beau cacher à mes yeux, les diuines Merueilles qu'il enferme dans son ame. En quelque posture que son Corps se trouue, mon cœur est tousiours sous ses pieds, affin de rendre vn continuel hommage de soubsmif- sion à son humilité. I'iray tousiours plus auuant.

O Pierre *Voila l'homme* que tu as adoré sur les eaux, & que tu as renié sur la Terre. *Voila l'homme* que tu as

declaré Fils de Dieu, & dont bientoſt apres, tu as defaduoué la cognoiſſance. O Pierre, dis je encore, vne fois, *Voila l'homme*, qui ioint la mer de ſon ſang, au ruiſſeau de tes l'armes, pour leur donner le merite de ta grace. Ie ſcay bien que tu pleures touſiours, & que tu ſoupires continuellement : Mais ie ſcay bien auſſi que tes pleurs, & tes ſoupirs ſeroient inutiles, ſi Dieu ne les offroit en ſacrifice, avec ſa vie à ſon Pere Eternel. *Voila donc l'homme*, que tu ne cognoiſſois pas, lequel portant plaide ta cauſe: change la nature de tes l'armes, & pleure de joye, auſſi bien que de Regret.

Adam *Voila l'homme*, qui vient arozer de ſon ſang cet arbre de vie, affin d'y faire renaître la Pomme que tu en as derrobée. *Voila l'homme*, qui eſt deſcendu eſpreſſement du Ciel en Terre, pour ouurir les portes de ta Priſon, avec la clef de ſa Croix. *Voila l'hom-*

l'homme, qui apres auoir acquité tes debtez, par le seul acte de sa Volonté, vient expirer de douleur, par amour, sur le mont de Caluaire. *Voila l'homme*, qui apres t'auoir créé dans vn Paradis, vient n'aistre dans vn Estable, & maintenant veut mourir sur vn Poteau.

Voila l'homme, qui pour rachepter tes enfans se vèd luy mesme. Et affin qu'ils ne mangent plus du fruit deffendu, il leur laisse sa chair pour viande, & son sang, pour breuage; que peus tu desirer d'auantage?

O heureux Lafare, *Voila l'homme*, qui apres t'auoir fait sortir du Tombeau, y veut entrer luy mesme. *Voila l'homme*, qui par amour ne peut souffrir que tu sois mort, & l'amour mesme luy fait endurer mille mortz, attendât son dernier trespas. *Voila l'homme*, qui pleure sur ta sepulture, & qui s'en va d'vn œil sec sur le caluaire, cōme s'il n'estoit capable

de compassion que pour autruy : Ha que ton fort est glorieux!

Esprits heureux , *Voila l'homme* dont vous avez publié la Naissance avec tant de pompe, & tant de Gloire. *Voila l'homme* dont l'esclat qui l'environoit sur la Montaigne de Thabor, vous rendoit inuisibles. Je n'en-ue point maintenant l'insensibilité que vous avez aux douleurs, puis que mon Sauueur souffre leur Tirannie.

Vierge Toute Sainte, & toute adorable. *Voila l'homme*. Mais ie n'ose vous dire que cet celuy la mesme que vous avez porté neuf moys dans les entrailles, & dont vous avez si chèrement elleué l'Enfance; Quelle apparence aussi de le croire: Car vostre Fils a des cheueux plus beaux, que les plus belles choses du monde. Il a vn front où les Majestez de la Terre & les Graces du Ciel sont chacune en son Trofne. Il a des yeux si eclatans, &

fi

si doux, que leurs regards, ont quelque chose d'aussi agreable que les delices mesme du Ciel. Le reste de son visage est vn nouveau Parterre de Fleurs toutes diuines: Comme aussi les autres parties de son Corps, chacune a le partage de sa perfection.

Et en cet object qui se presente deuant vos yeux, on ny voit rien qui ne soit effroyable, & plus digne de pitié, que d'enuie. Toutesfois, Vierge tres chaste, considerez *cet homme*, & remarquez, s'il vous plait, qu'encore qu'il n'aye plus de cheueux, sa teste n'est faicte que pour porter vne couronne de gloire immortelle, plustost que celle d'espines qu'on luy a donnee, Et quoy que son front soit couuert de sang, ses Majestez & ses graces toutes sanglantes donnent encore de l'admiration, aussi bien que de la Pitié. Ses yeux ont beau estre couuerts du nuage de mille crachatz,

leurs regards esclatans percent la nue,
cōme vn Soleil enfermé dedás; de for-
te qu'ils en font plus admirables. Que
si vous ne voyez pas les œilletz, & les
Roses, parmy les ordures, qui cachent
son visage, vous en sentez au moins
l'odeur. Si ses playes de mesme vous
deparēt si fort la beauté de sō corps, el-
les vous peuuēt aussi seruir de fenestres
pour voir soupirer son chaste cœur de
vostre pitié, & de nostre amour. Telle-
mēt qu'il vo^o est impossible de le me-
scognoitre, pour si miserable qu'il soit.

Voila donc l'homme, o femme Mira-
culeuse. Mais plutoſt voila vostre Fils.
Celuy la mesme, dont les Prophetes
ont annoncé la Naissance, & toute la
nature a celebré, avec tāt d'allegresse.
Voila l'homme. Ce Fils vnique du Pere
Eternel, & le vostre tout ensemble.
Vous l'avez veu tout neud en naissant,
parmy les Brebis, vous le voyez enco-
re en mesme estat parmy les Loups,
qui attendent le reste de sa proye.

Où pourrez vous maintenant trouver, o Reyne des ames affligees, assez de larmes, & assez de soupirs pour pleurer, & pour soupirer, à legal de vostre affliction, & de vostre tristesse. Toutefois les nuages de vos douleurs sont trop grands pour se resoudre en pluye & en vent, si ce diuin Soliel d'amour ne les perce de ses regards pitoyables. Consolez vous donc vous mesme, & demandez du secours à vostre propre force, puis qu'elle est indöptable. Les hōmes ne sont point capables de vous donner de la consolation, dans la me-cognoissance où ils sont de la grādeur de vos peines. De la demander aux anges; eulx mesmes la voudroient recevoir de vous, s'ils estoiēt sensibles aux douleurs. Je vous laisse dōc dās la meditation de vos tourmēs, puis que vous auez l'Esprit assez fort pour vaincre leur Tirannie. Je ne scaurois m'arrest^{scaber}er dans vn chemin si rabouteux.

Riche,

Riche, *Voila l'homme* dont la pau-
 ureté est si grande, qu'il n'a plus de
 peau sur la cher, ny plus de cher sur
 les os.

Auare *Voila l'homme*, si liberal de
 son sang que la Fontaine en sera bien-
 tost tarie.

Superbe *Voila l'homme*, humilié
 iusques à la mort.

Gourmand *Voila l'homme*, qui te
 donne son Corps à manger, & son
 sang à boire.

Ambitieux *Voila l'homme*, qui se
 contente d'une couronne d'espines, &
 d'un sceptre de Rozeau.

Cruel *Voila l'homme*, qui na pas eu
 pitié de soy mesme, pour auoir com-
 passion de toy.

Vindicatif *Voila l'homme*, qui ne
 pardonne pas seulement à ses mem-
 bres innocens.

Cholere *Voila l'homme*, qui at-
 tand avec inpatience qu'on de trempe
 dans

dans son Calice, le Fiel de ta fureur,
& de ta rage, pour en estancher sa
soif.

Impatient *Voila l'homme*, dont la
Constance incomparable te con-
vainq de lacheté.

Lubrique *Voila l'homme*, qui con-
dempne sa cher toute pure, & toute
chaste d'estre dechiree à lambeaux
iuge quels supplices les demons
doibuent preparer à la tienne impu-
dique & toute noire de crime.

Mes Dames *Voila l'homme*, qui
pour vous donner de l'amour s'est
paré aujourd'hui : sa couronne est
toute d'espines ; mais ce sont les espi-
nes de vos Roses. Son sceptre est de
Roseau, pour marque de seruitude
plustost que de souueraineté, comme
estant vostre esclave. Il porte vne
Robe de pourpre, à cause qu'elle est
de la Couleur de son amour. Et si vous
en doutez encore, vous voyez de
com-

combien de playes mortelles, vostre amour l'a bleffé. Pouuez vous refuser vos cœurs à vn amant si fidelle, il ne vous promet rien veritablement en ce monde que des Miseres, & des douleurs. Mais il vous prepare en l'autre, vne gloire, qui n'aura iamais fin. Vous voila au choix de deux amans. Car si vous iettez les yeux d'vn autre coté vous verrez cet hōme de bonne mine, & richement paré, qui se presente à vous. Ses cheueux sont frisez, & poudre cōme les vostres: sa barbe est vne eschole à Chirurgiēs, tant elle est bien ajustee, son rabat de point coupé, & to^o les riches habitz luy dōnēt des graces veritablemēt dignes d'estre admirees. Et avec tout cela encore il est passionnement amoureux de vous si vous voulez adjoutter foy à ses sermens. Il vous assure qu'il a le cœur ^{saucé} natrē de toutes partz, & qu'il souffre plus de maux en vous ayment, qu'il ny a de

navré

de suplices cognus au monde. D'ailleurs dans le malheur où il est, il vous promet des felicitez sans nombre. Mais l'aduenement en est incertain, & la courte duree infalible. Il se fait fort de vous rendre contentes en ce mōde, ie vous diray toutesfois en passant que c'est vn vendeur de fumece. Car tous les plaisirs y sont faulx, & les maux veritables. Il ne tiendra qu'à vous pourtant de le croire; quel party prendrez vous? D'vn costé *Voila l'homme*, qui n'a que des cloux, & des espines à vous dōner. Et de l'autre, *Voila l'homme*, qui vous presente de riches sceptres, & de semblables courōnes. D'vn costé *Voila l'homme*, qui ne peut vous faire loger icy bas que dans vn estable, où dans les desertz. Et de l'autre, *Voila l'homme* qui vous mōtre ses superbes palais ouuerts pour y faire vostre premiere entree. D'vn costé *Voila l'homme*, qui ne peut vous donner à manger que du fiel, & à boire que du vinaigre, Et

Et de l'autre, *Voila l'homme* ; qui vous inuite à des festins plains de magnificence, où toutes sortes de metz delicieux seront seruis prodigalement. En fin d'un costé *Voila l'homme*, qui ne scauroit vous offrir vne plus riche couche que celle de sa croix, pour y espirer avec luy de douleur. Et de l'autre. *Voila l'homme*, qui vous fait dresser vn liêt tout de Fleurs, pour y dormir à vostre aize, & pour y mourir plus delicieusement encore à ce qu'il dict. Il faut que ie vous represente egalement tout ce qui en est, afin que vostre choix soit plus libre.

Ce premier homme que vous voyez, tout couuert de sang, n'a Veritablemēt à vous dōner que des cloux, & des espines ; Mais ce sont des cloux de diamant, avec lesquels le Soleil est attaché à son Ciel, & des espines, dont les Roses ne se flettrissent iamais. L'autre homme de si bone mine en

vous

vous offrant des sceptres d'or, & des couronnes de mesme matiere, il ne vous present que de la Terre, puis que tout l'or du monde n'est autre chose.

Ce premier homme ne vous peut faire loger avec luy que dans vn estable. Mais les anges y descendent du Ciel pour le visiter; ou dans les desertz, Mais le Pere y vient luy mesme chanter ce beau motet de Musique en son honneur: *C'est icy mon Fils bien aymé, en qui ie prens mon plaisir.* Que si l'autre vous fait montre de ses superbes Palais, les foudres y entrent par les fenestres, & la mort par la porte; ce pauvre homme ne peut vous donner à manger que du fiel, & à boire que du vinaigre, ie le confesse. Mais ce fiel & ce vinaigre sont mille fois plus doux en effect, que l'Ambroise & le Nectar des Pouëtes ne sont delicieux en imagination. L'autre vous peut

bien repaistre dans ses festins des viandes que le monde produit, mais toutes ensemble ne sont que pourriture, & de cete verité, l'experience vous put encore au nez. Cet homme affligé en fin n'a que la dure couche de la croix pour vous y faire dormir, & mourir, Mais c'est vn nouveau char d'Helie qui nous mene en Triomphe dans le Paradis. Et l'autre vous fait parade d'vn liét de Fleurs où, l'on a vn repos qui dure autant qu'elles, & les espines des regretz qui nous demeurent, nous suiuent dans l'Eternité, pour en estre bourrelez eternellement.

Voila le Portrait tiré aprez le Naturel, de la grandeur, & de la puissance de ces deux hommes. C'est à vous maintenant à choisir celuy des deux qui vous est le plus agreable.

Helas combien y a t'il d'Eues infortunees qui tournent les yeux, & le cœur tout ensemble vers ce viel

Adam

Adam, ce malheureux Courtisan, qui perdit les bonnes graces de son Roy, le premier jour de sa Creation. Mes Dames, de quel auueuglement auez vous les yeux bandez? vous suiuez ce miserable Adam pour dinner vne seule fois avec luy; Encore ne vous veut il rien donner à manger qu'une Pomme empoisonnee. Et vous abandonnez vostre Createur, & vostre Sauueur qui est decendu exprez du Ciel en Terre pour vous offrir luy mesme vne seconde fois son Paradis. Vos lachetez sont trop crimineles, ie crains que l'Enfer n'en soit la punition.

Courtisans qu'elle sera vostre excuse au jour du iugement? vous n'oserez plus dire à l'exemple du Paralitique, que vous n'auiez point d'homme, puis que *Voila l'homme*, qui s'offre de vous ietter dans la Pisci-

ne de son sang innocent, pour guerir vos ames de la Paralifie de leurs offenses mortelles.

Demons, *Voila l'homme*, qui avec son sceptre de Roseau, & sa couronne des pines vous va faire la loy. *Voila l'homme*, qui avec ses mesmes chesnes vous va enchesner, & vous reduire à vostre premiere seruitude. *Voila l'homme*, dont les tourmens vous preparent des geennes Eternelles. *Voila l'homme*, dont la desfaiete vous mene en Triomphe. *Voila en fin l'homme*, dont la mort vous tient lieu de honte, & de confusion.

Ecce homo. Voila l'homme, dict Pilate aux Iuifz vne derniere fois. Et à mesme Temps ce peuple enragé fait retentir en l'air ces cris effroyables, *Tolle, Tolle, crucifige*. Qu'on l'eclogne de noz yeux *cet homme*, & qu'on le traine au suplice, nous ne serons point
con-

contans, si nous ne le voyons attaché à vne croix.

De tels, ou semblables discours animez de fureur, cete populace auueugle, & brutale, assiege de si prez les oreilles de Pilate, qu'il ne scait à quoy se resoudre. Les cris se renforcent à tous momens, & la crainte qu'il a de deplaire à Cesar, l'attaque d'un autre coté si vifurement, qu'il chancelle en la premiere resolution qu'il a prise, de ne condempner point ce doux I E S V S. En fin le plus fort l'enporte, l'intherest de sa Fortune luy est beaucoup plus cher que celuy de son salut, parmy vn nombre infiny de differentes pensees qui agissent son Esprit, il minute l'arrest de mort contre cet innocent.

Et de la pensee venant aux effectz il le prononce publiquement avec les formalitez ordinaires. Et pour faire

voir qu'il y a esté forcé, & qu'il n'authorise point cette violence il se fait apporter de l'eau, & se laue les mains; Quelle folie de lauer le Corps; pour blanchir l'ame.

Ha Pilate, si tu voulois rehussir en ton entre-prise tu debuois faire produire à tes yeux, vne fontaine de l'armes, & t'y noyer dedans de regret, & de repentir d'auoir condempné cet Innocent. Tu te contentes de lauer tes mains pour te lauer des Reproches, que les Iuifs desauueuglez te pourroient mettre en auuant. Mais comment te deffendras tu contre celles que ta conscience criminele te fera vn iour. Tu te metz à labry de la pluye, & tu n'aprehendes point les foudres du Ciel, qui grondent des-ia à tes oreilles. Que ton sort estoit heureux si tu ne te fus esgaré volontairement dans le Dedale de ta malice.

Je reuiens à vous mon Redempteur pour vous demander Iustice des crimes que j'ay commis, puis que Pilate m'a absoubs malgré moy: Car ie suis ce Barabas comme voleur de vos bien-faitz, comme alassin de mon ame, & comme seditieux contre ma Raison. On me bannyt seulement aprez auoir fait toutes sortes de m'aux, & l'on vous condempne à la mort pour auoir fait tous les biens du monde.

I'appelle de cet arrest d'injustice, deuant vostre Iustice, affin que ietiène vostre place, & que de la sorte vous soyez banny de Hierusalem, & de toute la Iudee, puis que cette Terre ingrate ne vous produit que des espines: & moy cōdemné à la mort, puis que la moindre de mes offences m'en rend coupable. Ha Seigneur ie voy bien que vostre amour vous empesche d'inthe-

rinier ma requeste , elle veut que vous
mourriez , & que ie viue. *Je viuray*
donc , o mon *Iesus* , mais ce sera en
mourant sans cesse du regret de vo-
stre tres-pas. *Je viuray* donc , mais
d'une vie mille fois plus cruele que
la mort mesmes au souuenir des
cruautez qu'on a exercees cõtre vous.
Je viuray donc , mais ce sera d'une
vie de soucy aussi amoureuse que
languissante regardant sans cesse des
yeux de mon ame le Soleil de vo-
stre croix , pour en receuoir les
doucees influences. *Je viuray* donc,
mais d'une vie de Roses , ayant touf-
iours le cœur dans vos espines , &
vos espines dans mon cœur. *Je vi-*
uray donc en fin , puis que vostre
amour le veut , Mais ce sera de la vie
du Cameleon , le vent de mes sou-
pirs me seruira de Nourriture. De
forte qu'estant priué de l'honneur
de

de vous accompagner dans vos supplices, cete consolation me demeurera que vos supplices m'accompagneront tousiours. Benissez en l'Esperance que j'en ay, o doux Sauueur, affin que les effects cautionnent bientoist mes paroles.

Le voy mon Sauueur qui se hatte de partir pour aller au Caluaire, suiuous le au moins de pensee, puis qu'il ne veut point de Compaignon en ses Trauaux.

K 5


L E



L'ÉPIGRAMME

de votre reconnaissance dans vos
prieres, etc. consolation de devoirs
ici de vos devoirs en second
parlement pour les devoirs en
l'histoire que vous o'avez
pour les devoirs en second
de votre mon de votre de votre
de votre mon de votre de votre
vous le au moins de votre de votre
de votre mon de votre de votre
de votre mon de votre de votre

Tirant





LE BREVIERE

D E S

COVRTISANS.

A N O N E.

CHAPITRE V.

O Crux ab Aeterno praparata, & concupiscenti animo desiderata.



Et icy encore où il faut garder par force le silence , puis que les paroles sont inutiles pour exprimer ce qu'on ne peut comprendre. C'est icy où il faut necessairement que les larmes,

mes, les soupirs, & les regretz facent l'office de la langue pour raconter par ces muetz langages de pitié, & de tristesse, tout ce que nos yeux verront de funeste, & tout ce que nos oreilles entendront d'effroyable, & tout ce que nos Esprits conceuront de cruel, & d'inhumain, en ce cinquiesme office de la Passion, où mon Sauueur doit celebrer luy mesme ses funerailes.

Quel bruit, quel tumulte, & quel Tintamarre entend t'on dans les Rues de Hierusalem, au Recit, & aux nouuelles de cet arrest de Mort, que Pilate a prononcé Contre mon IESVS. Mais cet vn bruit de cris de Ioye, mais cet vn Tumulte, animé d'alegresse, & vn Tintamarre de Tambours, de Clairons, & de Trompetes, qui apellent les officiers de Iustice, chacun à son debuoir.

On ne vit iamais tant d'instrumens de mort, avec tant des feux de
ioye.

ioye. D'un coté ce ne sont que lances, qu'espees, qu'armetz, que cuirasses, que Bouchiers, qu'echeles, que Marteaux, que cloux, & que cordes. Et de l'autre tout est plain de Rameaux verdoyans de Fleurs, de fruitz de couronnes, de guirlandes, de chars de Triomphe, d'instrumens de Musique, de festins, de dances, & de mascarades. Les Seigneurs, & les Dames courent des-ja aux fenestres, & leurs valetz à la Rue. Les artisans ont des-ja quitté leurs ouurages, & leurs boutiques, pour voir trainer cet aigneau à la Boucherie. Les femmes portent leurs nourrissons à cet spectacle, avec autant de ioye, que si c'estoit à des nopces. Et les autres enfans qui peuuent marcher sont assamblez, en diuerses troupes à tous les Carrefours de la Ville, pour attendre, comme des leuriers en lesse, la proye au passage, & la relancer, au bruit effroyable de leurs huees, où plu-

plustost de leurs aboyemens, à de nou-
 ueaux chiens destinez au cornage.

Mais que faites vous mon Redem-
 pteur, tandis qu'on prepare sur le
 mont de Caluaire ce funeste Theatre,
 où vous debuez représenter le der-
 nier acte de la Tragedie de vostre
 Passion. Personne ne se peut apro-
 cher de vous, pour vous offrir quel-
 quel'arme de vostre compassion, où
 quelque soupir du ressentiment de
 vos peines. Vous estes seul, ie dy
 seul: Car vous tirez le Rideau de vo-
 stre Humanité adorable deuant vo-
 stre Pere Eternel, & cet Esprit diuin
 tout plain d'amour, qui ne sont qu'une
 mesme essence aüec vous mesmes,
 pour ne gouter pas les delices eter-
 nelles, de leur gloire semblable, en cet
 estat de douleur où vostre amour
 vous tient enchesné.

Vous estes donc seul, o doux IES-
 S V S ; vous dis-je qui remplissez
 le

le Ciel, & la Terre, de vostre immensité; Ha que vostre amour est ingenieuse à faire à tous momens de nouveaux Miracles. Vous estes seul dans ce Concistoire d'iniustice, parce que vous y estes moqué, mesprisé, & battu. Mais quand il faut aller à des Nopces, vous menez vostre chere Mere, & vos disciples. Vous estes seul, quand on vous doibt trainer au supplice; Mais quand vostre Peré vous doibt glorifier, vous estes accompagné; Ne sont ce pas les Merueilles ordinaires de vostre amour. Aussi les veus-je adorer à mon ordinaire.

Mais il me semble que i'entendz sonner l'heure de l'execution. Et ie voy vn grand nombre de Bourreaux enpressez à garotter de nouveau cet adorable Sauueur, & à charger sur ses Espauls ce pesant fardeau de la Croix.

Les Poëtes feignent qu'Atlas portoit le Ciel sur son doz. Et vous estes ce veritable Atlas, o mon IESVS, qui portez le Ciel de la Iustice diuine sur voz espaules, avec tout le monde ensemble, puis que tout le monde est coupable. Je ne m'estonne point, si vos pieds chancelent soubs ce faix, considerant que le moindre peché mortel est capable, par sa pesanteur, d'attirer vne ame iusques au centre de la Terre. Vous voila prest à partir. Les sergens, & les compagnons des Bourreaux se sont des-ja aduancez pour rendre le chemin du suplice libre.

He quoy Seigneur. *Vous allez donc à la mort sans moy ;* Que voulez vous que ie face de ma vie, puis que cet vn funeste Flambeau d'un Phare trompeur, qui en se consommant attire le monde au naufrage. *Vous allez donc à la mort sans moy ;* & quand verray-
ic

ie la fin de mez jours, pour voir celle de mes offenses, puis que ie vous offense continuellement. *Vous avez donc à la mort sans moy.* Et pour quoy permettez vous que ie respire encore le mesme air que j'ay infecté par mes crimes? n'a y-ie pas assez vielly dans ce malheur? *Vous avez donc en fin à la mort sans moy.* Accordez moy au moins cete grace, que ie ne viue dorésenauant que pour vous, affin que ma vie vous soit agreable, puis que ma mort vous deplait. Je ne scaurois souhaiter maintenant autre chose.

Courtisans vous allez monter dans vos Carosses, ou dans vos chars de Triomphe, pour vous faire voir dans les Rues d'une nouvelle Hierusalem, avec vos pompes & vos magnificences ordinaires. Tandis que mon Redempteur vous suit à pied, tout chargé de playes, tout couuert de sang, & de bouë, & portant encore l'arbre

de sa croix sur ses espauls. Le voila à ce coing de Rue, qui passe deuant vous. Commandez au moins à vostre cocher d'arrester, voulez vous que les cheuaux le foulent encore aux piedz, de mesme que font vos Ames à toute heure. Mettez maintenant pied à terre pour dire à Dieu des yeux, de cœur, ou de la pensee à cet amoureux Sauueur, qui s'en va de ce pas mourir pour vo^{us}.

Mais quel excez de fureur vous possede; quelle manie vous transporte, de quelle froide trempe sont vos cœurs? Vous ne bougez de vos places, à peine tournez vous la teste pour le regarder seulement. Et que puis-je dire contre ces actions d'inhumanité, & de perfidie, dont le seul recit seroit capable de faire trembler les demons. Le Soleil inanimé, s'arreste au millieu de sa Carriere, par le seul commandement d'un des seruiteurs de ce grand Dieu. Et vous passez en carrosse effrontement

tement deuant luy, sans luy faire la reuerence que de la teste, & sans le saluer, que du bout du chapeau.

O Souuerain Createur du monde, ie ne m'estonne plus si les peines de vos Enfers sont eterneles, puis qu'à moins d'une eternité de supplices, ces crimes ne scauroient estre suffisamment punis. Ie m'estonne bien plustost en la consideration de cette gloire infinie que vous nous prometez en eschange d'une l'arme de regret, où d'un seul soupir de Repentance. Tout est également adorable en vous Seigneur.

Courtisans, vous estes tous les iours temoins de ces Verites, que ie vous ay mises en auant: Car combien de fois rencontrez vous au chemin de vos promenades le S. Sacrement, qui est ce mesme Sauueur qui s'en va au Caluaire, sans que vous preniez la peine le plus souuēt de faire arreter vos Carosses, ny

de mettre pied à Terre. Que si vous le saluez du chapeau, par coustume, vous en faires bien autant à vn Sauetier par ciuilité. Iugez quels chastimens meritent ces irreuerences.

Tous les ieunes Garçons de la Ville de Hierusalem, animez d'une rage semblable à celle de leurs Peres, chassent à coups de pierres ce doux Seigneur, sur le point qu'il se veut arrester, comme affoibly du fardeau de sa croix. D'autant qu'elle est si pesant, quelle a des-ja deuoré d'un costé la chair, & les os qui la portoient. Et le sang qui decoule à ruisseaux de cete nouvelle playe luy ostant peu à peu la force qui luy reste, il tombe souuent accablé sous sa charge.

Je ne laisse pas pourtant de vous adorer, o grand Dieu, avec vostre toute puissance dans vostre foiblesse: Car si ie vous contemple des yeux du Corps,

Corps, tombé & gifant dans la bouë,
le vous admire à mesme Temps des
yeux de l'Ame, dans le sejour glo-
rieux de vostre Eternité. Si ie vous
regarde au trauers de mes l'armes, par-
my ces Bourreaux alaitant de peine,
& de lassitude: le vous contemple
en cet instant, au trauers de la foy que
vous m'auetz donnee parmy les le-
gions de vos Anges, en action de re-
ceuoir le continuel hommage de
leurs respectz, & de leurs louanges.
Tellement Seigneur que de quelque
liuree de misere, & de douleur que
l'amour vous deguise, vous serez touf-
iours le seul que mon cœur aymera,
& l'vnique, dont mon ame sera eter-
nelement esclau.

Que faites vous maintenant digne
Mere de mon Dieu? qu'elles peu-
uent estre vos actions, & vos pen-
sées, en cete saison où l'on eguise le
glaiue qui vous doibt percer le cœur,

de vous annoncer les tristes nouvelles de ce funeste arrest de mort, que Pilate a prononcé contre vostre cher fils. Le bruit de cete Verité à des-ja couru par toute la Terre; il retentit des-ja dans le Ciel, dans les limbes, & dans les Enfers. Ce qui me fait croire que vous n'en doubtés point, ou que si vous en estes encore dans la doute, le premier que vous r'encontrerez en vostre chemin, vous en rendra trop asseuree.

Il arriue aussi de la sorte: Car cete Vierge si Sainte courant les Rues de Hierusalem; pour aprandre des nouvelles de son bien aymé, trouue à chaque pas qu'elle fait en auuant, des temoins de son malheur. Et comme elle est en impatience, cherchant cet vnique object de ses affections, quoy que sa rencontre soit l'autel, où elle doit estre immolee de tristesse & de douleur, ses moites yeux le decourent

rent de loing parmy vne foule de Bourreaux qui l'environnent.

Que scaurois-ie dire maintenant pour vous exprimer la moindre partie de ce que ceste adorable Mere, endure, à la vuë de ce fils tout diuin. La nature n'a point des langues assez fecôdes qui puissent raconter le plus petit sentiment de ses douleurs. Et les Espritz doibuent cherir leur confusion, & leur silence dans le mesme deffaut où ils se trouuent, ne pouuant, ny n'osant penser de pouuoir iamais conceuoir quelque foible idee de ses souffrances. Les anges mesme n'en scauroient dire ce qui en est. Il n'appartient qu'à ces deux cœurs sacrez de *Iesus*, & de *Marie*, de publier avec le lágage de leurs soupirs la verité de leur *Maitire*. Ce n'est pas que nous ne puissions nous en imaginer quelque chose, pour nostre satisfaction; Mais ce sont des plaisirs de songe, qui s'euanoissent au reueil de la

Raison. Je veux dire que le respect & la soubmission en ces diuines pensees, est la plus Noble, qui puisse occuper, & contenter nostre Esprit. Je veux vous faire voir pourtant le portrait de mes conceptions sur ce sujet; quoy qu'il soit infiniment eloigné de mon pouuoir pour le comprendre.

Cette Vierge desolée, animée d'un courage égal à son amour, fend la presse de ces fatelites qui entourent de tous cotez, mon Redempteur, & sans trouuer de la resistance, se iette à ses pieds. Sa langue veut parler, mais son cœur qui souffre à l'égal de ce qu'il ayme a tant de choses à dire, qu'il soupire cōtinuellement pour exprimer en son langage, l'excez de sa tristesse, & de sa douleur: Et ses yeux impatiens de parler à leur Soleil, ne peuuent point attendre que le cœur ayt cessé de se plaindre, ils repandent mille ruisseaux de

de l'armes, mais chasque l'arme est vne harangue en misteres de compassion, & de regret. De sorte qu'elle est contrainte de se taire, puis que ses pleurs, & ses sanglotz parlent pour elle, malgré elle. Son Ame parle encore par les regards, mais si puissamment, & avec tant d'Elloquence, qu'elle seule est capable d'en publier la perfection, si son humilité ne l'oblige à se faire.

Mon diuin IESVS, qui est plus amoureux, & plus affligé, comme ayant vne puissance plus noble, quoy que l'objet soit moindre repôd en mesme langage à tous ces discours du cœur; à toutes ces parolles des yeux, & à tous ces entretiens de l'ame, pleurant, soupirant, & regardant sans pouuoir iamais denouer la langue. De sorte qu'il mele ses pleurs amoureux avec les l'armes toutes semblables de sa Mere, d'où procede vne fontaine d'a-
mour

amour, où se mirant tous deux ils voyent reciproquement la grandeur de leur affection, & celle de leurs peines. Le vent de ses sanglotz se joint aussi à celuy des soupirs de cette Vierge, & tous ensemble font naistre vn si funeste orage sur cete fontaine, qu'on diroit qu'ils y cherchent dedans leurs n'aufrage. Et leurs regards encore animez d'vne passion mutuele, decouuroient en 'sunissant les plus secretes douleurs dont ils estoient tirannizez. C'et en cette récontre que l'amour fait paroistre les plus grāds efforts de sa puissance: Car la Mere passionemēt amoureuse du fils luy veut dire à Dieu. Et ce fils qui ayme parfaitement cete Mere, voudroit aussi prédre cōgé d'elle: Mais l'amour les red egalemēt muetz, & toutes-fois; quelle Merueille, ce silence amoureux est si elloquent, qu'ils se separent sans parler, & si ils n'ont rien plus à dire, Amour, Amour, ie ne me lasseray,

l'assery iamais d'adorer tes Miracles.

Les Bourreaux cependant, pour ne dementir point cete qualité qu'ils portēt, entreinēt mō Sauueur au supplice avec tant de violēce, que la Vierge ne le peut suivre que de loing; encore at elle de la peine de treuuer le chemin libre, parmy la foule du peuple, qui acourt de tous cotez à cet expectacle.

Les charitables Dames de Hierusalē portees d'vne sainte Curiosité, sont de la partie, en ce penible voyage du Caluaire, dont elles arrosent le chemin de leurs larmes, touchees d'vne genereuse cōpassiō. Et cōme il s'en trouue vne parmy elles attainte de quelque maladie, elle s'auance, & present vn voile à nostre Seigneur, lequel s'en essuyāt le visage, y marque dessus tous les traitz, & le luy rend à mesme temps. Mais ce present fut accompaigné de ce luy de sa guerison. Ha Veronique te voila guerie, & si ie te trouue aussi
ma-

malade que iamais : Car ce diuin Medecin en guerissant ton Corps, a blessé si viuement ton ame, que tu en soupireras iusques à la mort; Mais ceseront des soupirs d'amour, qui te produiront des delices semblables. Je te laisse en la consideration de ta bone fortune.

Courtisans, ne vous semble t'il pas que cete Dame doibt estre bien riche, par le present que mon Sauueur luy a fait de son portrait? Mais vous debuez bien estre plus riches encore, puis que ce mesme Sauueur se donne tous les iours à vous dans le Sacremét de l'autel. Ce n'et point vne ombre, c'et vn Corps; ce n'et point vn crayon, ou vn image, c'et vne ame, & vne Diuinité tout ensemble. Et toutes-fois vous estes Miserables avec vn si riche Thresor. Que si vous en voulez scauoir la Raison, vos ames criminelles vous les représenteront à toute heure.

Nostre Seigneur n'est pas plustost arriué au pied de la Montaigne du Caluaire, qu'il tombe de foiblesse encore vne fois ; Mais disons plustost que son amour l'affoiblit. Parceque voyant dans sa presciéce qu'un nombre infiny d'ames viendroient iusques au pied de cette Montaigne , figuree par l'Echele de Iacob , sans passer plus auuant.

Et la Representation de cette verité, mettant de nouueau son cœeur à l'agenne , il sucombe soubz la violence des douleurs. L'impatience toutesfois qu'il a d'acheuer ce sacrifice de sa vie, luy donne des nouuelles forces pour monter sur cete Montaigne de douleur , & chasque pas qu'il fait en auant marque autant de vertus qui sont autant d'Echelons de cete Echele mystique de Iacob , par où necessairement il nous faut monter , si nous voulons estre sauuez.

Vn seul homme se trouue, par Rencontre dans toutela Ville de Hierusalem qui aide à porter la croix, à nostre Seigneur; se treuuera t'il encore vn seul Courtisan parmy vn si grand nombre, dont les cours des Rois sont plaines, qui presente ses espauls à ce fardeau. Je scay bien que les enuieux, les auares, les orgueilleux, & les manthirs du monde, & de la chair, portent leur croix, mais cet sans I E S V S CHRIST. D'où vient que leurs trauals, limitez dans le Temps, se rendent eternels dans l'Eternité.

On en voit d'autres, qui aux iours de penitence chargent leurs espauls d'vne pesante croix de bois, s'imaginant qu'ils sont parfaits, à l'egal qu'ils sont chargez. La perfection de la vie Chrestienne ne conciste pas en ces actions de pieté, où la vanité se glisse souuent. Porter le mespris du monde dans le cœur, & l'amour de son
pro-

prochain dans l'Ame, c'est porter la Croix de bonne grace; Mais il faut que ce mespris, & cete amour nous accompagnent dans le Tombeau. Je veux dire qu'il faut porter cete Croix, iusques au hault de la Montaigne, à l'exemple de nostre Sauueur.

Car ie le voy, ce doux I E S V S, tout suant sur le mont de Caluaire, & tout courbé encore soubz la pesanteur de sa Croix. Il me semble que c'est vn nouveau Isac, chargé de bois qui doibt seruir au sacrifice. Je le voy encore alaitant soubz ce fardeau aprez auoir monté la Montaigne de Mara, ie veux dire, du Caluaire. Mais, o Pere tout puissant, si le zelle du ieune Isac vous a esté si agreable, aprez auoir veu sa teste, & son cœur egalelement humiliez soubz le glaiue d'Abraham, que sa seule volonté vous a seruy de victime, ayant reuocqué l'arrest de mort, que vous auiez prononcé con-

tre luy. L'amour, l'obeissance, & l'humilité de vostre cher fils ne sont elles pas assez grandes, pour vous obliger à luy faire la mesme grace voyant que luy mesme a porté sur ses espauls, comme vn autre Isaac, le bois de sa croix, qui est le bois du bucher, où sa vie vous doibt estre offerte en holocauste. Ha Pere Eternel, comme vous n'avez pas moins d'amour que luy, n'estant en essence qu'vn mesme Dieu, avec luy, vous agreez qu'il nous ayme iusques au point d'en mourir, puis que son amour, qui est la vostre mesme, n'a point de limites. Je garde tousiours le silence, en la meditation de ces diuins misteres.

Cete Sainte Mere est encore au pied de la Montaigne, ayant esté retardee en chemin par les foibleesses, où sa douleur extreme la reduisoit à tous momens: Et quoy qu'elle soit des-ja hors d'alene, par sa lassitude,
l'amour

l'amour l'a fait marcher si legere-
ment, qu'elle ne sent point la Terre
sous ses piedz ; comme si elle fou-
loit des-ja le Ciel, parauance.

Mais où allez vous si viste ; o
Vierge adorable, si l'amour vous a
presté des ailles pour auancer vostre
chemin, cete mesme amour vous les
redemande maintenant, car quelle
aparance qu'avec tant d'amour vous
puissiez souffrir de voir mourir l'vni-
que objet de vos affections. Arretez
dōc vn peu vos pas. Si vous vous apro-
chez dauantage de cete fournaiche
d'amour, vous courez d'anger d'estre
reduite en cendres ; He que seroit ce
de nous, si en perdant le fils, la Mere
ne demeueroit au monde pour no-
stre Consolation. Pardonnez moy
l'audace de ces discours Vierge admi-
rable. Vostre pied peut bien bron-
cher en ce chemin raboteux, que vous
tenez. Mais vostre Esprit est trop par-

fait, pour rendre vos actions sujettes à la sensure: suiuez vostre route, il faut necessairement, que vostre Corps s'aille ioindre à son Ame.

Les Bourreaux depouillent encore à neu mon Redempteur sur le Mont de Caluaire. Et comme le sang des playes cole sur la cher sa Robe, elles se renouellent, en la luy arrachant auéc violence; Mais que peut on adjouter à ses Tourmens, pour les rendre plus extremes.

Le Pretoire de Pilate vous a des-ja veu tout nud, o diuin I E S V S, Et maintenant vous vous exposez en vuë à toute la Nature. Ce qui me fait croire que le Ciel & la Terre doibuët auoir emprunté des yeux, pour vous contempler; Mais que dis-je, si le Ciel auoit des yeux, il les auroit des-ja abismez dans l'Ocean de ses larmes, touché de vostre compassion. Et si la Terre de mesme auoit la faculté de
vous

vous voir, elle seroit des-ja dans le frisson de la fiebure, qui luy doibt bien-tost arriuer, tremblant de pitié, & d'estonnement.

Courtisans, voicy encore vn nouveau sujet de Confusion: vous seriez honteux d'aller à la messe avec vn rabat sale ou avec vne freise qui ne fut pas bien tendue. Et mon Sauueur s'expose à la risec du monde par sa nudité; de quel voile assez obscur cachez vostre honte, en cet epouventable iugement. Seigneur faites s'il vous plait, que mon cœur soit tousiours nud, & qu'il ny aye iamais aucun repley qui le couure. Que mon Ame aussi soit de mesme toute nue, & sans cachete, affin qu'elle vous soit plus agreable. Je vous en offre les veux.

Quel nouveau Spectacle donne de l'effroy, & de l'espouuant à mō Ame; ie voy mon Sauueur estandu sur la

couche de sa Croix, & trois Bourreaux, également inhumains en actiō d'y clouer ses piedz sacrez, & ses mains adorables. Le bruit des marteaux frappent cependant d'vn mesme coup & le cœur, & les oreilles de la Vierge. De forte que ces Bourreaux sans y penser, clouent tout à la fois, sur vn mesme poteau, & le fils, & la Mere. Toutes-fois il ny a que les piedz & les mains de mon Sauueur qui soient percez. Il est vray; Mais quoy que les playes de la Vierge soient inuisibles, elles ne laissent pas d'estre aussi grandes que celles de mon I E S V S, & de causer vne semblable douleur. Tellemēt que si le fils est attaché à la croix, la croix est attachee à la Mere; le fils repend encore deux fois le sang de la Mere puis qu'aprez l'auoir receu d'elle, il le repand, comme sien. De forte que la Vierge seut espuiser ses venes, à mesure que le sang decoule de celles de son fils.

Ce

Ce fils encore meurt deux fois, & pour nous, & pour sa Mere, pour nous, d'amour, & pour elle de douleur ressentant vifuellement les siennes. Et cete Mere en reuanche, souffre deux differentes mortz, mourant par amour, de voir mourir tout ce qu'elle ayme, & d'affliction, voyant espirer dans les tourmens, celluy qu'elle a eleué dans les delices. Qui pourra comprendre les Miracles de cette amour? On ne peut rien ajouter aux tourmens de la Mere, & les peines du fils sont en leur estremité. Qui nous dira donc combien la Mere souffre; & qui nous voudra esprimer la grandeur des supplices, dont le fils est marthirisé. Je recognois ma foiblesse, j'aduoue mon impuissance, & publie hardiment la confusion, & le desordre, où mon Esprit se trouue: passe plus auuant qui ozera.

A peine ay-je repris le vent de mon

alene pour respirer dans l'effroy, & dans l'espouuante, où i'estois, que ie tombe encore en pamoison à l'objet de mon diuin Sauueur, que i'ay veu, ce me semble, pendu à la croix & elleué en l'air. Mais dans l'estonnement où ie suis encore, la liberté de parler m'est restee pour m'escrier! Ha beau Soleil! vous avez dōc commencer vostre cariere dans le Ciel de la Iustice diuine, affin de nous donner vn iour tout esclatant de grace. Que dis-je le Ciel du Soleil tourne tousiours, & vostre croix, qui est vostre cercle, demeure fixe & sans mouuement. Vous estes ce Soleil de Iosué arresté au milieu de vostre couche, pour esclairer la des-faite de vos ennemis, à qui vostre mort prepare vne eternelle sepulture: ie ne m'estonne plus encore si l'air remplit tout, puis que vous vous estes fait elleuer en l'air! Ha beaux oyseaux que les espaces de vostre

stre empire sont glorieux, puis que vostre Createur mesprise le seshour de la Terre, & celluy de l'onde, pour loger dans vos grands Palais.

Vous voila donc; o mon IESVS, sur cete couche Royale, que vous vous estes preparee de toute eternité dans vostre prescience.

Vous voila en fin monté sur cet arbre de vie, dont Adam auoit derrobé la pomme, affin de la rattacher vous mesme, à la veuë de tout le monde.

Vous voila sur ce Trofne de Misericorde, où vous vous estes souhaité avec tant de passion, pour intheriner nos lettres d'absolution, & de grace.

Vous voila au plus haut de cete Echele de Iacob, pour nous ayder à monter dans le Ciel de vostre gloire.

Bel astre du iour, ie ne m'estonne point de ta fuite; la honte, la pitié, ou l'estonnement sont assez puissans pour te chasser.

Estoiles ne versez plus vos influences sur la Terre, ce Soleil d'amour qui se leue sur cete Montaigne, arrose toute la Nature d'une si celeste liqueur, quelle ne produira plus que des Fleurs & des fruitz.

Vous fontaines & Ruisseaux Rebroussez chemin & fuyez le sein de vostre Mere, pour vous ioindre au giron de vostre Pere, puis que c'est vostre vniue source.

Et vous, o mon Sauueur, ie ne m'estonne pas si vos mains sont clouees, puis que l'aimant attire le fer: Car vous estes vn vray aymant qui attirez par amour ces clous, affin d'en porter les amoureuses blessures. Attirez donc mon cœur, s'il vous plait, puis qu'il est d'une aussi froide trempe: ie m'en reserueray l'Esperance comme i'en ay le desir.

Ie vous adore sur cete croix adorable où vous estes pendu pour mes feulz pechez: Car ie veux croire que ie
vous

vous ay plus offencé moy seul, que tout le monde ensemble. Vous avez beau estre esclave, ie vous adore, comme tout puissant. Vous avez beau estre moqué, & mesprisé, tous mes nerfz, toutes mes veines, tous mes artheres, mon Cœur, mon Ame, & tout ce qui est en moy, est continuellement rabaislé, & humilié deuant vostre diuine Majesté, iusques au centre de la Terre. Ie ne vous offre rié, parce que ie n'ay rié digne de vous, fors que l'Esperance que i'ay en vous mesme, comme infiniment Misericordieux, & moy extremement Coupable.

Courtisans, ie n'ay plus de voix, l'ancre me deffaut, & la plume me tombe des mains : voyez, & contemplez ce tout que i'ay à vous dire.



LE BREVIERE

DES

COVRTISANS.

A VESPRES.

CHAPITRE VI.

*Pater dimitte illis, quia nesciunt quid
faciunt.*



COVRTISANS, n'assisterez vous point encore à ce dernier office de la passion, où mon Sauueur employe les derniers effortz de sa voix mourante
pour

pour demander à son Pere le pardon
de vos crimes. *Pere pardonnez leur.* Il n'a
rien de libre que la langue, & il se feroit
de sa liberté, pour rompre vos fers,
& vos chesnes, en disant tousiours,
Pere pardonnez leur. O diuin IESVS!
ie reuiens dans mon premier eston-
nement: mon Esprit offusqué de l'es-
clat de vos misteres, n'est plus capa-
ble de raison; ie n'en scais où i'en suis,
quand i'entends d'vn costé ces hom-
mes du monde qui crient, *qu'on vous
face mourir.* Et vous, mon Sauueur,
de l'autre qui demandes à haute voix
leur grace pour les faire viure eter-
nellement; les Bourreaux crient qu'on
le cloue à vn Poteau, & le patient clo-
ué crie qu'il meurt pour eux; à con-
dition qu'ils vivent. Les coupables
demandent le sang, & l'innocent le
repand pour effacer leurs crimes. *Pe-
re pardonnez leur;* Et craignant enco-
re que les foudres du Ciel ne reduisent

en cendres ces Ames cruelles, & impies, il pleure pour en esteindre les feux. *Pere pardonnez leur*: Car quoy que le sang d'Abel respandu vous aye autres-fois demandé *Iustice*, le mien ne vous demande que *Misericorde*. *Pere pardonnez leur*. Que s'ils ne vous offrent point des soulpirs de repentence, ie vous presente des larmes de *Compassion*, affin que vous ayez pitié d'eux. *Pere pardonnez leur*. Quoy Aaron en vous donnant de l'encens seroit exaucé: Hé comment me pourriez vous refuser la grace que ie vous demande, puis que ie vous donne tout le sang de mes veines, *Pere pardonnez leur*. Les espines que ie porte sur la teste, les cloux qui me percent les mains, & les pieds, & en fin toutes les playes, dont i'ay le corps couuert, sont autat de langues qui vous en prient. *Pere pardonnez leur*. Car vous scauez, bien que c'est l'amour plustost

que la cruauté qui m'a reduit en l'estat où ie suis. Pardonnez les donc par amour, puis que mes blessures sont toutes amoureuses. Ie suis bien aise que vous n'avez pas exaucé mes prieres dans le iardin, puis qu'il ne s'agissoit que de mon interest. Mais maintenant qu'il y va du salut de ces pauures creatures, ne me refusez pas, s'il vous plaist, cette grace que ie vous demande: *Pere pardonnez leur.* Vous les avez creez à vostre image, & à vostre semblance; voudriez vous destruire l'ouurage de vos mains? *Pere pardonnez leur.* Que s'ils ne vous offensent que par l'iniure qu'ils me font; Souffrez, s'il vous plaist, que l'eau de mes larmes en efface la tache, ie ne leur demande rien, *Pere pardonnez leur, ils ne scauent ce qu'ils font.* Ces Iuifz tousiours enragez apres auoir laché tous les traits de leur fureur contre ce doux IESVS,

ils

ils se seruent encore de leurs langues Venimeuses pour affliger ses oreilles, par mille sorte de blasphemes. Situ es tout puissant, disent ils, descend de la Croix, & nous t'adorerons. Seigneur permettez moy, s'il vous plaist, de vous dire avecq eux, que vous descendiez de vostre Croix, non pas pour faire paroistre vostre puissance, puis que ie n'en doubte point; mais plutost pour me donner vostre place, comme estant deux fois coupable, & du mal que i'ay fait, & de celuy que vous souffrez. Telement que ie vous prie de descendre de ce poteau, afin que i'y monte, pour y estre attaché.

Courtisans, ozeres vous bien porter encore la passion de vengeance dans l'Ame, voyant ce doux Sauueur aux abois de la mort, & en action de s'escrier, & de demander la vie pour ces Bourreaux qui la luy arrachent du sein, peu, à peu, afin de le faire mou-

rir mille fois d'vng seul coup. Vous voyez comme dans la seruitude de ses tourmens, n'ayant à vous donner que des sanglots & des larmes, il s'escrie en pleurant. Et prie son Pere, qu'il vous pardone, cōme s'il auoit des-ja oublié toutes les iniures que vous luy auez faictes. C'est pourquoy il demāde vostre grace à son Pere, pour luy tesmoigner, qu'il vous a des-ja pardōnez.

Quoy donc vous tremperez vos mains dans le sang de vos ennemis, tandis que mō Redempteur repand le sien en sacrifice sur l'autel de la Croix, pour obliger son Pere à faire grace à ceux qui le crucifient? Vous irez vous assassiner sur vn pred, tandis que ce mesme Redempteur, arrose son visaige de ses dernieres larmes, pour appaiser le iuste courroux de son Pere?

Pardonnez leur dit il; Et vous criez comme les Iuifz deuant vostre ennemy, *qu'il meure.* Quel langaige tiendrez

drez vous aux abois de la mort: Car si vous demandez pardon, quelle apparence que Dieu vous l'accorde, apres l'auoir refusé à tout le monde. Vous respirez continuellement dans le dessein de vengeance, & vous voulez mourir vengé & pardonné: iugez que seroit ce de vous dans voz fureurs; & dans voz rages, si vostre pouuoir suiuoit vostre volonté. La Terre n'auroit pas assez d'abimes pour engloutir voz ennemis. Et mon Sauueur avec sa toute puissance au milieu de ses tourmens n'a de voix que pour crier: *Misericorde, en faueur de ses ennemis. Pere pardonnez leur.*

Ames du monde, ioignez vos prieres à celles de mon Sauueur, & dittes avec luy, que vous pardonnez à vos ennemis, afin qu'il vous face vn iour misericorde. Quelle grace pouuez vous esperer, si vous n'en faictes point vous offences vn Dieu, &

ce mesme Dieu vous pardonne, & si vostre semblable vous choque tant soit peu, vous hasarderez vostre vie, pour luy oster la sienne. Iugez sans passion, si ce crime peut estre iustement puny, que dans les Enfers.

Pere pardonnez leur, dict ce doux
 IESVS : *Car ils ne scauent ce qu'ils font.* Mais comment direz vous cela de nous ; o adorable Sauueur, puis qu'au mesme temps, que nous vous adorons sur l'autel de vostre Croix, comme createur, & comme Redempteur, nous offensons vostre diuine Majesté avec toutes sortes de mespris, par nos offences morteles. Si les Iuifz sont en quelque fasson auueugles dans leurs actions ! Nous pouuons nous preualoir de leur auueuglement, puis que le Flambeau de la foy nous esclaire. Implorez donc Seigneur s'il vous plaist nostre grace, de vostre Pere tout puissant, non pas,
 com-

comme Ignorans, & comme auueuglez, mais plutoft comme trop scauans en nostre peché, par la cognoissance que nous auons de nostre malice. De forte, Seigneur, que l'enormité de nos crimes vous oblige à changer les termes de vostre requeste, & de vostre priere, & à dire : *Pere pardonnez leur, parce qu'ils scauent ce qu'ils font.* Il est vray Seigneur nostre malice n'est point auueugle que du costé de vostre grace, ne pouuant estre esclairee, dans les tenebres qui l'environnent tousiours que par les feux de nos passions, mais elle y voit assez clair pour cognoitre son peché. Ce qui le rend si enorme que la peine n'en peut estre qu'eternelle, & vostre seule misericorde, est cette estoile de mer qui nous donne l'esperance du port, parmy les escueils & les orages d'un grand nombre de crimes à tous momens renouuelez.

Car quoy que les attributs de vostre Iustice & de vostre misericorde soiēt également infinis en vous, ne faisant qu'une mesme chose avec vous mesme. Il me semble pourtant; Si vous me permettez de le dire, que vous estes seulement tout misericordieux, puis que vostre Iustice mesme, n'est que misericorde. Si les Flammes des Dammes pouuoient parler, elles publieroient vostre bonté, plustost que vostre Iustice, parce que leurs ardeurs ne sont pas si extremes, que les pechez que vous punissez par elles, sont grands.

Misericorde donc Seigneur, puis que vous estes tout misericorde. Vous priez pour ceux qui vous ont crucifié, & priez donc pour moy; Car mes pechez vous crucifient tous les iours. Que si vous ne priez que pour ceux qui ne scauent ce qu'ils font: Il faut que ie vous aduoue Seigneur que veritable-

ritablement ie ne scay ce que ie fais quand ie vous offence ; ie scay bien selon ma faſſon de conceuoir, dont la foy m'a donné la puissance, que i'offence vn Dieu en vous offençant. Mais ie ne cognois rien de vostre diuinité, que ce seul nom de Dieu. Ce n'est pas que j'en aduoue que le Ciel, la Terre, & tout ce, qui est en la nature sont les ouuraiges de vos mains, & que dans la perfection de ces œuures ie n'adore vostre puissance. Mais tous ces effectz, quelques admirables qu'ils soyent, ne nous disent rien qui aye du rapport à la grandeur, & à la Majesté de leur cause. De sorte que si mon Esprit pouuoit penetrer les Cieux ; comme celuy de ce premier Martyr qui se fit vne echele de pierre, pour monter dans vostre empiree, il seroit continuellement en action d'encencer vos autels, & de benir vos temples, plutost que de les profaner.

Je ne scay donc ce que ie fais Seigneur : quand ie vous offence ie veux dire que ma volonté qui ayme naturellement le bien, comme son vnique obiect, a vne cognoissance si Imparfaite de vostre bonté, qu'elle s'esgare tousiours dans les voyes de mon salut, suiuant le bien faux, & Imaginaire, au lieu de veritable & du permanent, dont vous estes la source.

Ie ne scay ce que ie fais quand ie vous offence il est vray : Car comment se pourroit il faire que ie fusse raisonnable, sans raison, & que mon Iugement ne fut point alteré dans le desordre, & dans la confusion des pechez que ie commetz tous les iours. Je me mets donc du nombre de ceulx pour qui vous priez Seigneur ! quoy que ie sois mille fois plus coupable, Mais cet aduantaige me demeure dans mon malheur, de Scauoir que vostre misericorde est infinie,

nie, & que mes offences sont limitées. De sorte que l'esperance de ma guerison, adoucit la rigueur de mes maux.

Je vous prie donc, o doux Sauueur, avec le bon larron, de vous souuenir de moy, dans le mesme dessein que j'ay de dérober vos bonnes graces. *Souuenez vous de moy*, dict ce larron, parlant à mon I E S V S, puis que vous m'avez créé à vostre semblance, à fin queles Demons ne se preualent point de vostre ouurage. *Souuenez vous de moy*. Puis que vous estes descendu esprez du Ciel, en terre pour me rachepter: voudriez vous qu'un si penible voyage me fut inutile: *Souuenez vous de moy*, ie ne vous demande autre chose: Car vostre souuenir est ma gloire, & mon Paradis. *O diuin Larron*, que tes crimes ont esté heureux, dans leurs supplices, puis qu'en te faisant condempner à la Croix, son poteau

poteau te fert d'eschele pour monter au Ciel, *O admirable Larron!* mais plus admirable encore la volerie, puis que tu voles le Paradis, & par vn stratagemme, digne de toy seul, tu trouues l'inuention d'en crocheter les portes, pour y entrer le premier. *O fortuné Larron!* Tu fais autant de miracles, que tu prononces de paroles: Car les prononçant avec vne foy, toute miraculeuse, & avec vne amour, toute semblable, ces parolles sont si puissantes, qu'elles remportent l'Eternité pour triomphe. *Hacher Larron,* dis-je encore, que ton sort seroit digne d'enuie si le bien s'en pouuoit esperer. Car quand ie considere que de toute Eternité cet adorable Sauueur t'a eleu, & choisy, dans sa prescience pour estre Compaignon de son Martyre, & au mesme temps heritier de sa gloire, par vn seul acte d'Amour, & de foy, mon esprit se perd delicieusement dans la meditation

tation de cette bonté infinie, qui s'est
delectee à te combler de bonheur. Tu
ne demandes point à ce tout puissant
qu'il prolonge ta vie, puis que tu
meurs de joye, mais seulement, *vn*
souuenir. Tu ne pretens point de ce
createur du Ciel, & de la terre, des
grandeurs, n'y des richesses, puis que
ta pauvreté te rend la plus riche du
monde, mais seulement *vn souuenir*,
sans mentir. Je m'estonne de tes dis-
cours. Tu ne pries point ce grād Dieu
de te pardonner & de t'aymer, mais
seulement, *De ce souuenir de toy*. Et
toutes fois tes prieres sont acompaig-
nees de tant d'amour, & de tant de
grace, que ce doux IESVS te dōne tout
à la fois, Et son cœur; & son Paradis.
Comment dira-yie pour exprimer la
grandeur de tes felicitez, puis qu'el-
les ne souffrent point de comparaison
qu'avec elles mesmes: de dire que tu
es heureux comme Abraham, ce n'est
que

que représenter', vne partie de ton bonheur, puis que ce S. Patriarche soupire encore dans sa captiuité, durant le temps de ton triumphe. De mettre en auant que tu es le fauory & le bien-aymé du Seigneur, cōme Dauid: il faut que ce royal Prophetete quiete la preceance, puis que ses fers, & sa prison, n'ont point de rapport à la gloire de ta Franchise, n'y à la grandeur des delices dont tu jouis. chose estrange, ce larron meurt en larron apres auoir faict ce mestier toute sa vie. Il n'a vaicu que de Brigandage, & il vole encore en mourant, mais qu'elle volerie peut il faire, ayant les mains, & les pieds clouez. Son esprit luy dicte cete ruse de voler le Ciel, en presence de son Createur, & il rehusit si heureusement, qu'au lieu d'estre chassé de Paradis par son larrecin comme Adam, le Paradis au contraire luy demeure pour recompense de ses

ses Voleries. Seigneur, ie veux estre Larron, non pas comme Adam d'une Pome, non pas, comme Rachel, d'une Idole, non pas comme Daud, d'un peu d'eau. Mais plutost comme ce Larron crucifié, affin de me rendre riche à iamais par mes voleries, puis que le prix est d'une gloire eternelle.

Seigneur, dict ce cher Larron: Souvenez vous de moy quand vous serez en vostre Royaume. Mais pourquoy dict il, quand il sera en son Royaume? le secret en est beau. Cest qu'il apprehende que ce Sauueur ne le comble de plaisir, & de felicité en ce monde, où il ne veut plus viure, voyant que son Seigneur est aux abois de la mort. De sorte qu'il le prie de se souuenir de luy quand il sera en son regne, cest à dire, dans le Ciel, parce qu'il ne pretend rien de la terre. O subtil Larron! que tes artifices sont admirables, puis que par ton Industrie, toute miraculeuse,

tu derrobes les affections de ton Dieu, iusques au point de le forcer amoureusement à te dire: *Au iourd'huy tu seras en Paradis avec moy.* Quelles charmantes paroles. Helas Seigneur permettez moy s'il vous plaist, de vous représenter dans mon estonnement, que vous n'avez pas parlé de la sorte, à vostre bien aymé, ce glorieux S. Estienne Capitanie des Martyrs. Quoy que l'amour qu'il auoit pour vous, fut mille fois plus dure que la pierre; N'ayant iamais peu estre ebrâlé dans sa constance à coup de pierres! Que s'il a veu en mourant les cieux ouuertz? Ce larron y est entré dedans auuant que mourir, faisant sa premiere entree dans vostre cœur, où il a trouué son Paradis. Vous avez dict de S. Iehâ Baptiste apres l'auoir santifié dez le ventre de sa Mere: *Que c'estoit le plus grand, & le plus heureux de tous les hommes.* Et toutesfois il me semble que

que ce larron est elleué dans vn trof-
ne de gloire plus eminent, puis que ie
le contemple assis à vostre coté sur
vne couche royale toute pareille à la
vostre, au mesme instant que ce
grand Prophete respire dans les lim-
bes, le doux air de l'esperance de son
salut. Quelle grace où l'on ne peut
penser sans se perdre dans l'estonne-
ment de sa grandeur : Car tout y est
egalement adorable, & incompre-
hensible. Mais il est important de
considerer que la misericorde de Dieu
n'est pas comprise par le nombre,
bornee par la fin, n'y racourcie par la
mesure. Elle est tousiours aux escou-
tes des soupirs de repentance. Elle
n'impose point à ce larron conuertý
le iune, ny le cilice, parce que la foy de
son cœur, & la confession de sa bou-
che, mettent son sang à si haut prix,
qu'il remporte toutes sortes de cou-
ronnes. S. Cyprian s'estonne, & dit,
O que

que les larrons sont punis de mort pour leurs voleries, & rebrigand à la vie eternelle pour recompence.

Au iourd'huy tu seras en Paradis avec moy, dites vous, à ce larron. Quel pris d'honneur incomparable : Mais qu'elles peuuent estre les œuures pour l'acquérir? Ce larron se tourne deuers vous pour vous admirer: la merueille n'en est pas grande, puis que vous estes si admirable. Son cœur soupire à mesme temps de vostre amour, où en est l'estonnement puis que vous estes aymable en perfection. Sa langue à suite public vostre gloire, les rochers insensibles en font bien autant. Et pourtant vous luy dites : *Qu'il sera au iourd'huy avec vous en Paradis.* Quel excez de recompence! S. Iehan, vous a admiré auuant sa Naissance, lors que vous estiez encore dans le ventre sacré de la Vierge. Et depuis cet heureux moment, son cœur a esté
comme

comme vn autre soucy , tousiours en soucy de vous contempler , comme son Soleil. Dauid vous a tant aymé, que vous l'avez appellé vostre bien aymé ; & si vostre amour , ne leut fait mourir , il est croyable qu'il eut esté comme immortel. Les trois Roys vous ont adoré dans vn estable, & sur vn trosne de foing, & de paille, & avec tout cela ils souffrent encore les peines de leur exil, de mesme que S. Iehan , & ce Royal Prophete. Il commence à decouurer le mistere.

Ce larron veritablement n'a fait que tourner les yeux vers vous , pour vous admirer , mais ses regards d'admiration , qu'il vous iette , dans les miserables volontaires où vous estes reduict, meritent plus d'autels, qu'il n'y a des temples sur la Terre. Son cœur blessé de vostre amour, en soupire seulement, il est vray, mais ses soupirs amoureux n'ont point de prix, par-

ce qu'il vous ayme parfaitement dans les aparances sensibles de vostre impuissance, & de vostre foiblesse: sa langue aussi n'a point esté muette pour publier vostre gloire. Je l'aduouë, encore, mais ç'a esté au mesme temps que les Iuifz preparoient vn tombeau pour l'enseuelir, ie veux dire que si les Roys ont adoré ce diuin Soleil en son Orient, les sacrifices, que ce larron luy rend, sur l'autel de la croix, sont beaucoup plus glorieux, puis qu'il l'adore en son Occident.

Je veux croire, toutes-fois, o doux Sauueur, que vous eussiez donné vostre Paradis à tous ces grands Prophetes ensemble, si la porte en eut esté ouuerte. Et ce larron vous ayant demandé l'entree sur le point que vous auiez la Clef à la main, vostre bonté infinie ne la luy a peu refuser.

Au iourd'huy tu seras en Paradis avec moy. Il me semble qu'on ne scauroit
par-

parler assez dignement des merites de ce larron: Car sans mentir il fait en si peu de temps, des si grandes Merueilles, que les termes nous manquent pour en publier sa gloire. Abraham, Esaye, Moyses, & Ezechiel, eurent vne grande foy. Le l'aduouë, mais l'vn parloit tous les iours à Dieu, l'autre l'auoit veu en sa majesté, celuy là l'auoit contemplé dans le buisson ardant, & celuy cy enuironé de ses Seraphins; mais ce larron n'auoit iamais parlé à nostre Seigneur, que pour le prier de se souuenir de luy; il ne l'auoit veu que sur le buisson sanglant de sa Croix, & entouré de Bourreaux au lieu de Seraphins; Et toutes fois, quelle Merueille! il croit de cœur, & confesse de bouche, que ce Redempteur est tout puissant, quoy qu'il soit esclaué: De sorte qu'il Metamorphose dans son Esprit le poteau où mon Sauueur est

cloué en vn throsne de gloire, l'adorant dans les supplices, où il le voit agoniser avec autant de respect, & d'amour, que s'il estoit assis à la dextre de Dieu son Pere : suiurons nostre route.

Il en y a qui nous ont laissé par écrit ceste pensee, que l'ombre de mon Sauueur, eut cette vertu, d'illuminer l'Esprit de ce larron, & en cela, le merite de la cause, nous oste l'admiration de l'effect, tout en est croyable. Mais ie puis dire, que si l'ombre de mon Redempteur est capable d'animer le cœur de roche de ce larron, de denouer sa langue, & de luy dicter des paroles si puissantes; Quels miracles ne peut pas faire en nous ce corps precieux, & adorable, de mon Sauueur, que nous receuons tous les iours? Et toutes-fois, nos cœurs demeurent dans leur insensibilité, & nos langues dans leur begayement, où si nous parlons

lons c'est pour forcer nostre Seigneur à nous oublier, plustost qu'à se souuenir de nous. Courtisans ie vous laisse encore cete verité pour entretien.

Stabat Mater, dolorosa iuxta Crucem.

La Mere de mon Sauueur demeueroit ferme au pied de la croix. Ha fille de Sion, ie puis bien dire hardiment avec le Prophete Hieremie, parlant de vous que ie ne scay à qui vous comparer en vos ennuys, si ce n'est à vous mesme, puis que les douleurs que vous souffrez, ne se peuuent endurer que par vn cœur genereux, comme le vostre: la cruauté n'a rien d'inhumain, les supplices n'ont rien de rigoureux, & toutes les morts du monde n'ont point d'aigreur, ny d'amertume, qui se puisse comparer aux douleurs, dont vous estes attrainte. Car qu'est ce qu'il y a de cruel comme la Tirannie qu'on exerce contre vous? quel supplice est rigoureux à l'egal de

vostre tourment, & quelle mort peut auoir l'Amertume, dont vous estes abreuee? ie tiens qu'il est impossible de penser viuement à la grandeur de vostre affliction, sans en mourir de pitié, ou de douleur. Mais ce trespas me semble si doux, que ie voudrois l'encourir à toute heure pour pouuoir mourir autant de fois que vous auez ietté de soupirs, & repandu des larmes. Et ne pouuant en auoir que le desir, il mourra aumoins avec moy.

On lit d'Agar, que voyant son filz aux Abois, le courage luy deffaut dans la perfection de son amour, ne pouuât iamais se resoudre à le voir mourir; il me semble pourtant que cete foiblesse de courage temoignoit la force de son affection, puis que par vn excez d'amour, elle ne peut voir mourir ce luy qu'elle ayme par exces.

Mais voicy de differentes merueilles, sur vn pareil sujet. Agar plaine d'a-
mour

amour pour son fils le delaisse en mourant, affin de temoigner cete mesme amour, par sa fuite. Et la Vierge, cete fidele Amante, qui ne viuoit que pour aymer son adorable fils, demeure au pied de la croix où il est erucifié, pour mourir mille fois de regret, en le voiant mourir vne seule fois de douleur. Iugez maintenant quelle de ces deux doit emporter le prix de l'Amour. Voicy vn nouveau sujet d'estonnement.

Parce que le fils endure les tourmens de la Mere, cette verité est le plus cruel de tous ses supplices. Et de mesme aussi, parce que la Mere souffre toutes les peynes du fils, il se sent genner d'un nouveau Marthire, qui ne se peut exprimer. En quels termes parleray-je donc de vostre affliction, o Vierge desolee, si sa grandeur rend les Anges muetz? On voit bien que vos yeux repandent des

larmes, mais on n'en cognoit pas la source. On peut bien aussi entendre le doux bruiet de vos soupirs, Mais leur iuste violence est aussi secreete qu'extreme. De sorte qu'on ne peut mediter sur la nature de vos larmes, parce que la plus petite goutte est capable de noyer les plus subtilz Esprits. Et il en est de mesme de vos soupirs, on n'ose s'etudier à cognoitre leurs efforts, puis que le moindre coup de leur vent met en desordre toutes nos pensees. Publiez donc vous mesme vos douleurs, o Vierge desolee, ie vous le dis encore, si vous voules, qu'on les cognoisse. Mais comment les publierez vous, si leur exces les rend muetes. Et quand vous les publieriez; comment pourrions nous conceuoir leur grandeur? Vous en demeurerez donc, s'il vous plaist, dans vostre silence necessaire, & nous dans l'humble confession de nostre foiblesse.

I'en-

I'entends toutes-fois que mon Sauueur parle à vous, ne romprez vous point vostre silence, *Femme voila ton fils*, dit il, de S. Iehan, & à toy mon bien aymé, *Voila ta Mere*. Mais il me semble, o Vierge-sacree, que ces paroles au lieu de vous denouer la langue, vous ferment la bouche: Car quelle estränge Metamorphose, Vous auez vn Dieu pour fils, & ce fils tout diuin se Metamorphose tout à coup en vn simple homme, ie veul dire que le Createur deuiet Creature, en donnant son nom, & sa qualité de fils, à son Disciple. Comment pourrez souffrir ce changement, o Mere desolee, auuant que la mort vous rauisse vostre cher fils, par vn excès de douleur, ce mesme fils se rait luy mesme par vn excès d'amour, vous donnant pour fils celuy de ses affections, affin que vous ne perdiez la qualité de Mere. *Femme voila ton fils*. Mais quelle
appa-

apparence Seigneur que cette Vierge, toute sainte, & toute adorable, qui vous a donné son Cœur, & son Ame pour gaige de son Amour, puisse contracter vne nouvelle amitié, pour ce nouveau fils, que vous luy dōnes. Vos perfections, Seigneur, s'opposent à l'obeyssance, qu'elle vous doibt: Car elle ne peut aymer en qualité de Mere, qu'un fils, qui soit parfait, cōme vous; Et d'autant que vous estes incomparable en toutes choses, ses affections vniques, ne peuuent auoir d'autre obiet que vous. Et toutes fois vous dites, o doux IESVS, *Femme voila ton fils.* elle ayme beaucoup mieux estre priuee de fils pour trois iours, qu'en prendre vn nouveau durant vostre absence: Que si vous le desirez absolument donnez luy vn autre cœur, & elle contractera d'autres affections pour vous complaire, Mais si vous ne changez son humeur, & son inclination, la parfaite

faite volonté, qu'elle a de vous obeyr, luy demeurera inutile: *Femme Voila ton fils.* Ha Vierge quel eschange faites vous au jourd'huy, ce fils engendré de toute eternité par son Pere Eternel, est Metamorphosé maintenant de nom, en vn de ses Disciples: Car il porte la qualité de vostre fils. Et vous celle de sa Mere. *Femme voila ton fils!* He commēt vous dira ton, *Plaine de grace*, dans la disgrâce où vous estes. *Que le Seigneur est avec vous*, puis qu'il vous laisse, entre les mains de son Disciple. *Que vous estes benite sur toutes les femmes*, au bruiēt des maledictions qu'on vous donne. *Et que le fruiēt de vostre ventre est comblé de bonheur*, le voyant pendu à vn arbre, sur lequel toutes les malignes influences du Ciel tombent en abondance. *Femme voila ton fils*, Elle aura donc deux fils, o diuin IESVS: Car quoy que vous mourriez sur la croix, vous viurez eternelement, & dans son

cœur,

cœur, & dans son Ame; Et comment voulez vous que durant vostre vie elle se dye Mere de deux fils, puis que vous estez son vniue. *Femme voila ton fils*, cete Vierge, tousiours adorable, reçoit vne nouvelle qualité de Mere, pour accepter ce nouveau fils; & au mesme temps que son oreille est frappee de la triste armonie de ces diuines paroles, son cœur est blessé d'un trait d'affection, mais d'une affection de Mere, pour ce S. Disciple, puis que son fils l'a honoré de ce nom. Quelle obeysance! Toutes ces felicitez ensemble sont comprises en ceste seule qualité qu'elle porte, de Mere du fils de Dieu, & au plus fort de ses afflictions, elle agree le rauissement qu'on luy faict de ce titre, receuant avec humilité pour fils, vne creature, estant Mere du Createur. Ce diuin IESVS, desirant faire vn nouveau Testament en faueur de la Mere, & de S. Iehan, ne scait

sçait que leur donner. Mais comme l'amour luy donne cette enuie de leur faire vn present, l'amour mesmes luy en donne l'inuention, vnissant d'aliance cete Vierge, avec ce Disciple, & cete vnion qu'il fait, est vn present si riche, qu'il n'a point de prix: Car ce doux Redempteur en donnant à sa Mere son Disciple, il luy donne tout ce qu'il ayme, & de mesme aussi donnant sa Mere à son Disciple, il luy fait vn present de Dieu: Quel miracle de grace, en son excez!

Mais quelles amoureuses Merueilles reluisent en ce commandement amoureux de mon Sauueur, & en cete obeissance toute semblable, de la Vierge. Ce fils se voyant attaché à vn poteau, s'efforce d'en oster la honte à sa Mere, en luy donnant vn autre fils, comme s'il estoit honteux luy mesmes, d'auoir vne Mere, en ce deplorabile estat, où il est réduit. Voila
pour-

pour quoy il dit, *Femme voila ton fils.*
 Car ie ne suis pas celuy que les Roys
 ont adoré, sur l'autel de ton Giron,
 Mais plustost celuy que les Iuifz im-
 molent sur l'autel de la Croix. Ce qui
 m'oblige à t'appeller, *Femme*, dans
 mes douleurs, & à te donner vn au-
 tre fils dans mes miseres. Ie veux bien
 te recognoistre pour Mere, dans le
 temple, sur la Montaigne de Thabor,
 ou sur le riuage de fleuve Iordain,
 mais non pas dans le Iardin d'Oliuet,
 mais non pas dans le Pretoire de Pi-
 late, mais non pas sur le mont de
 Caluaire. *Femme voila donc ton fils!*
 Car quel honneur te fairois-je de t'ap-
 peller ma Mere, me voyant cloué à
 vn poteau, entre d'eux larrons. *Fem-
 me voila donc ton fils*, affin que l'igno-
 minie de ma mort, ne reialisse point,
 sur ta vie. *Femme voila ton fils.* Iusques
 au iour de ma Resurrection. Il faut
 que mon Disciple porte ce nom de
 ton

ton fils , & toy celuy de sa Mere , durant le temps de mon absence. Mais voyons maintenant le reuers de la medaile.

Le fils veut honorer la Mere , en luy donnant vn nouveau fils , Et la Mere glorifie le fils , en receuant pour fils, son Disciple; d'autât qu'elle, s'humilie par cet eschange qu'elle fait du fils de Dieu au fils de l'homme. Le fils dans sa bassesse, veut elleuer sa Mere, en luy ottant ce nom ; & la Mere par son humilité , veut agrandir le fils; se disant Mere de son seruiteur. Quelle attaque? Mais quelle deffence, où l'amour triumpant, paroît vaincu, & où l'humilité vaincque, emporte la Couronne. Le fils crucifié appelle Femme, sa Mere, affin qu'on la mefcognoisse pour Mere, Et la Mere mourante pour son fils luy rend ce glorieux titre de Mere, qu'il luy a donné, se jugeant indigne de le porter , ou si

P. elle

elle le porte encore, pour luy complaire, ce n'est plus d'un Dieu & homme, mais d'un homme seulement.

O adorable combat, où le vainqueur est defarmé, & où le triomphat reçoit la loy, au lieu de la donner, de sorte qu'au milieu des Trophees, le prix est toujours à disputer; & si tout deux l'ont remporté. La victoire esgaree, ou plustost separee d'elle mesme, voyant deux Victorieux, ne scait à qui se donner pour se reunir à soy. Si le fils triomphe, la Mere en a tous les honneurs. Tellement que si l'amour ne partage la gloire Immortele qu'ils ont acquise, qui en pourra estre l'arbitre! Mais que peut faire aussi l'amour, dans vn combat, où l'humilité donne les Couronnes. Il n'appartient qu'à eux mesmes, ie veux dire à ce fils tout diuin, & à cete Mere toute adorable, de partager entre eux la gloire de leurs amoureux débats. Alons à la fin.

Sainct

Sainct Iehan, dans les agonies d'une vie languissante, qui ne respire que l'air de la mort sans pouuoir toutes-fois mourir se sent tout à coup ravir le cœur, par un transport de ioye; quoy qu'il soit comblé d'ennuy, à l'ouye de ces douces paroles: *Femme voila ton fils.* Il voudroit continuer de pleurer pour tesmoigner la iuste douleur qui le possede. Mais les delices secretes de son Ame, tarissent malgré luy la source de ses pleurs. De sorte, qu'il soupire: & l'on ne scauroit iuger maintenant, si c'est de ioye, ou d'ennuy; de ioye le suiet qu'il en a, en est puissant; & de tristesse, la raison en est forte: Car d'un costé comment peut il estre insensible aux douces felicitéz, dont il se voit comblé, ayant pour Mere, la Mere de son Dieu. Et de l'autre, comment peut il resister aux attaintes de supplices que ce mesme Dieu endure, en sa presence.

Sans mentir, ie ne scaurois dire quelle de ces deux passions le possede, ou la ioye, ou la tristesse. Toutes-fois comment se peut il rejouir d'un bien, dont la gloire est incomprehensible. Il est croyable qu'il cherit trop ses douleurs pour en perdre le sentiment. L'amour qu'il a pour son Maistre, ne peut donner de l'interuale à ses regrets. Tellement qu'il recoit cete Mere desolee pour Mere de ses afflictions, & luy se dit fils de sa douleur, puis que tous deux sont blesez d'un mesme traict de martyre. Je veux aler encore plus auuant.

Prestez silence, Car mon Sauueur s'escrie, *Mon Dieu, Mon Dieu, pourquoy m'avez vous delaisé?* Quelles paroles plaines d'estonnemét, & de merueille. Que voulez vous dire mō Sauueur? Commét est-ce que vostre Pere, vous peut auoir delaislé, puis que vous estes vne mesme Essence avec luy.

Com-

Comment vous peut il abandonner, puis que vous faites vn seul Dieu avec luy mesme, & le S. Esprit? Que s'il delaisse vostre humanité, dans les supplices de la Croix, vous en auez prononcé l'arrest contre elle, de toute Eternité. Vostre Pere vous permet de souffrir tout ce que vous voulez endurer. Tellement que s'il vous abandone dans les douleurs, c'est apres que vous vous estes liuré à leur Tirannie. *Mō Dieu, pourquoy m'avez vous delaisé.* Mais vous me permettez, s'il vous plait, de vous demander, pourquoy vous vous delaissez vous mesmes: Car apres auoir repandu vostre vie dans vostre sang, vous en conseruez encore les dernieres gouttes dans vos entrailles pour r'animer vos maux, en prolongeant le terme, où ilz doibuent finir. *Mon Dieu, pourquoy m'avez vous delaisé.* C'est le langage sans doute que vostre humanité tiét à vostre diuinité,

plutoſt qu'à voſtre Pere, plus que vous ayez abandonné voſtre corps à toutes ſortes de ſupplices, ſans luy donner aucun ſoulagement. Quel excès de rigueur, exercez vous contre vous meſmes, o doux IESVS : Car en ce meſme temps d'agonie, où vous tirerez aux abois de Martyre, & de douleur, vous iouiſſez plainement de la gloire, qui eſt propre, & eſſentielle à voſtre Diuinité. Mais l'amour que vous nous portez, vous rend ſi cruel à vous meſmes, que vous ne voulez pas permettre, qu'un ſeul rayon de cete gloire eternelle réalifſe ſur voſtre Ame, de peur que voſtre corps n'aye quelque interuale en ſes ſupplices. D'où vient que vous vous eſcriez encore par amour : *Mon Dieu pour quoy m'avez vous deſia delaiſſé.* Il me ſemble que ie n'ay pas aſſez ſouffert, & vous me liurez à la mort. Retardez en ſ'il vous plaiſt l'heure encor vn peu, afin

affin que i' espreuve la rigueur de quel-
que nouveau tourment. *Mon Dieu*
pour quoy m'avez vous delaisé si tost.
Car i' en suis aux derniers abois. Tou-
tes mes douleurs vont finir, avecq
ma vie! He que feray-je du courage
qui me reste, & de la constance que
i'ay à souffrir mille fois d'avantaige.
Mon Dieu pour quoy donc me delaissez
vous. Versez, versez, tant qu'il vous
plaira de l'amertume dás mon Calice,
ie ne desire qu'à croistre mes tour-
mens, pourveu que vostre Iustice en
exempte, pour iamais, toutes ces Ames
que j'ay rachaptees. O amour aussi
adorable que ce mesme Dieu, que
nous adorons, puis qu'il n'est autre
chose qu'amour. Toutes les fois que
ie medite sur la grandeur de tes Mer-
veilles, iem'egare tousiours, ou plu-
tost ie me perds dans mes pensees.
Mais cet egarement, & cete perte, me
sont si agreables, que ie ne desire point

de me retrouver. Deuoilons cependant les misteres de ces paroles.

Hugues de Saint Victor, discourât sur ce sujet, represente subtilement, & avec des beles raisons, Que le Pere n'a pas abandonné son fils, par la priuation de sa diuine presence, ou en separant l'vnion, qui estoit indiuisiblement entre l'une, & l'autre nature diuine, & humaine. Car cela estoit impossible, & ie vous enuoye chez S. Thomas pour en voir des nouvelles raisons, qui soustiennent la mesme Verité. Le Pere abandonne son fils dans les tourmens. Ie veux dire son humanité, la priuant de consolation. Et: en cela comme la Iustice du Pere & celle la mesmes du fils, puis que le fils, & le Pere n'estoiēt qu'une mesme essence, avec le S. Esprit: ce fils condépnoit luy mesmes cete humanité qu'il auoit prise, à tous les tourmens de la Croix. De sorte qu'il ne se plaignoit que pour
faire

faire voir sensiblement par ses cris, que ses douleurs n'estoient pas feintes ; & que veritablement il souffroit beaucoup plus qu'on ne scauroit s'imaginer. En effect le fardeau de noz crimes luy pesoit si fort, que son corps estoit accablé soubz le faix.

Courtisans il fault en fin se rendre à l'effroy des iugemens de Dieu, puis qu'ilz sont si epouventables. Quel soulagement pouuez vous esperer en vos afflictions voyant mō Redēpteur priué de consolation, au plus fort de ses tourmens. O Dieu des vengences que ta Iustice est redoutable ! Car quand ie considere, ton fils vnique cloué à vn poteau, & en actiō de ietter au vent les derniers soupirs de sa vie dans les geennes, dont il est martyrisé, sans auoir aucune interuale, & sans relache, comme si ses creatures, ne le recognoissoient plus pour souuerain. Je ne soupire qu'après le fumier de

Job, ne desirant d'autres faueurs, que les miserables, puis que ce sont vos liures. Abandonnez tât qu'il vous plaira mon corps aux douleurs, pourueu que vous soyez le Pole de l'eguille de mon Ame, ie me baigneray de ioye, dans les larmes de mes ennuis. Alons à la fin.

Il me semble que i'entens mon Sauueur, lequel alteré des larmes de ses ennemis, frape de sa voix leurs cœurs de roche, pour en faire sourdre des fontaines. Mais leur malice rend cete roche si aride, que mon Redempteur s'escrie en vain : *I'ay soif*. Helas mō Dieu ! Si vous ne voulez pas boire d'autre eau, que cele des larmes de vos ennemis, ils vous laisseront, sans doute, mourir de soif, par ce qu'au lieu de se repentir du mal qu'ilz vous ont fait, ils preparent des nouueaux Instrumens, pour vous faire endurer des nouueaux supplices. *I'ay soif*, dict

ce diuin IESVS. He quoy Seigneur n'estez vous pas cete source d'eau viue, qui ne se tarit jamais? Beuez donc dans vos fontaines, desalterez vous dans vos ruisseaux. *I'ay soif.* Et c'est vous qui donnez à boire à tout le monde, & qui produisez autant de sources, que vous auez de playes. *I'ay soif:* Quelle apparence puis que vous estez vn eternal Ocean sans fonds, & sans riuage. *J'ay soif,* & qui le pourra croire, Seigneur, puis que vous n'auetz pas encore vuidé le Calice de vostre passion? *J'ay soif,* Pere Eternel, n'entendez vous pas vostre fils, qui vous demande à boire? luy refuserez vous vne goutte d'eau, dans la resolution où il est, de vous offrir la derniere goutte de son sang? Vostre Prouidēce donne du pain à Helie; ne donnera t'elle pas aussi de l'eau à vostre fils? I'adore dans mon humilité, tout ce que ie ne puis comprendre. *I'ay soif.* Esprits heureux,
qui

qui hors du temps agissez sans le tēps;
 que ne venez vous seruir vostre Crea-
 teur en ce superbe festin qu'il fait à
 son Eglise. Voila la septiesme fois qu'il
 a demandé à boire sans que pas vn de
 vous tous luy en presente. Toutes-fois
 vostre impuissance vous sert d'excuse:
 Car n'ayant point del'eau qu'il demã-
 de, vous luy presentez pour satis-
 factiō, l'obeyssance de voz volontez.
I'ay soif. Beaux astres, que ne resoudez
 vous en larmes, les soupirs de la Terre
 pour desalterer vostre Createur. *I'ay
 soif.* Cieux, s'il est vray que vous soyez
 liquides, que ne vous repandes vous
 sur le Paradis de cette Montaigne, affin
 que mon Sauueur se desaltere dās vos
 ruisseaux, quoy qu'il en soit luy me-
 sme la source. *I'ay soif.* Rochers, la
 vergede Moyses, aura t'elle plus de pou-
 uoir, que la voix de mon Sauueur,
 pour vous faire ouurir le sein, qui ca-
 che mille beles fontaines? *I'ay soif.*
 Ruis-

Ruiffeaux , & fleuues , qui sortant du giron de vostre source , reuenez dans ce mesme giron par le chemin, que la nature vous montre. Suiuez donc maintenant ce mesme instinct, & laissez vous guider naturellement, dans le sein de vostre vraye source, que l' amour rend si seiche, & si aride, qu'elle n'a pas vne goutte d'eau. *Pay soif.* Courtisâns, c'est à vous que mon Iesus demande à boire, vous vous enivrez, tandis qu'il meurt de soif: l'un boit à la santé du Roy, vn tonneau de vin, l'autre à la santé de sa Maistresse vne Cuue. Celuy la noye sa vie, & sa raison, dans son verre mourant estouffé, soubz la Vendenge de son breuage, & celuy cy, apres auoir infecté le vin qu'il a beu, en rend le poison de tous costez; comme si le tonneau estoit creué. Et tout cela se fait à la vuë de mon Sauueur agonissant de soif, sur l'arbre de la Croix.

Croix. *J'ay soif*, dit ce doux IESVS & pas vn de vous, Courtisans, ne luy presente vne goutte d'eau pour rafraichir seulement ses leures. Vous aymez mieux boire à la fanté des Demons, qu'à celle de vostre Redempteur: Quel crime inouy! *J'ay soif*. Toute la Terre est couuerte du vin, que vous auez regorgé, & mon IESVS a la langue toute seiche d'alteration: Quel nouveaux prodige d'inhumanité! *J'ay soif*. Vous vous abismez dans la mer rouge de vos ivrogneries, & mon Createur expire de soif sur le riuage. Les termes me manquent pour donner vñ nom à cete offence.

Courtisans, ie ne vous conte point de fables, combien de fois voyez vous nostre Seigneur aux portes de vos Palais, & de vos Maisons, qui vous demande, par la bouche d'vn autre pauvre Lazare, vne seule goutte du vin, dõt vous abreuez par mespris,
la

la Terre, aussi bien que les miettes, qui tombent soubz vos tables; Mais quelle ingratitude! vous luy refusez, & l'un, & l'autre, ayant mieux nourrir vos chiens, deuenant bestes avec eux, pour trop boire, que donner vn morceau de pain, & vn verre d'eau, à vostre Dieu, à vostre Createur, & à vostre Sauueur, représenté au naturel par les pauures. Iugez quelle sera vostre confusion, en cet epouuentable iour plain d'effroy, & de misere. Vos consciences criminelles doiuent arreter voz Esprits, sur ces importantes pensees.

l'ay soif. Dict tousiours mon Sauueur, o Vierge trespure, & tressainte, n'avez vous pas quelque peu d'eau pour d'esalterer vostre cher fils. Je voy bien que vous pleurez amerement pour faire vne fontaine de vos pleurs, mais vos yeux ne produisent que des larmes d'amour, & mon I E S V S, ne
peut

peut estancher sa soif, que dans des larmes de Repentence. De sorte qu'il s'escrie continuelement, *J'ay soif!* Ha mes yeux, puis que l'eau caue la pierre; que ne nous fondez en larmes sur mon cœur de Roche, pour amolir sa durté, & pour le rendre fecond à produire vne nouvelle fontaine de pleurs, *J'ay soif:* Que n'es tu Metamorphosee mon Ame en vne viue source de repentence, pour arroser de tes ondes, cet adorable Paradis du corps de mon Sauueur. *J'ay soif.* Je scay bien Seigneur, qu'il y a long temps que vous me demandez à boire, comme à vne autre Samaritaine, mais si vous ne frappez vous mesmes avec la verge de vostre Croix, le rocher de mon cœur, vous n'en tirerez iamais de l'eau, pour vous defalterer.

O Amour que tes flammes sont ardantes! puis que tu deseches si fort les entrailles de mon Sauueur, que
le

le martyre de sa soif le tient aux agonies. Ce diuin I E S V S , tout embrasé du feu de son amour , demande de de l'eau pour en accroistre l'ardeur, comme s'il croyoit que ses flammes n'eussent pas assez de violence pour reduire son cœur en cendres. *J'ay soif*, dit il : Car ie brulle trop l'entement, iettez vne goutte d'eau dans la fournaise amoureuse de mon sein , la mort dont ie meurs , est trop douce. Mais ne dites plus cela, Seigneur, puis qu'on verse dans vostre calice du fiel, & du vinaigre , pour vous la rendre amere.

Quelle effroyable ingratitude, apres que ceste langue sacree de mon Dieu, a brisé les chesnes de son silence, pour implorer la grace de ceux mesme qui la tenoient en captiuité. On luy donne pour recompence du fiel & du vinaigre.

Mais quelle adorable amour ! De

Q

toutes

toutes les parties du Corps , ce doux I E S V S , n'a rien de fain que la langue, & il employe ses dernieres paroles, pour demander du fiel, & du vinaigre aux Bourreaux ; comme s'il aprehendoit de mourir sans ressentir l'amertume de ce dernier supplice.

Courtisans , que pouuez vous pretendre du monde, si Dieu mesme qui l'a creé, y meurt de soif. Enyurez vous, tant qu'il vous plaira, dans vos festins: vous vous trouuezerez si alterez à l'heure de la mort, non pas d'une soif d'amour, cōme mō Sauueur, mais d'une soif de regret inutile, que vous en mourez eternellement. Ne souffrez point que ie sois vostre Cassandre.

O Dieu de mon Ame en quels termes me pourray- ie plaindre dorenavant, das les miseres où vostre Justice me peut reduire à toute heure, vous voyant rendre la vie à mille mortz tout à la fois. Il ny a pas en

en vostre corps vn nerf, vne veine, ny vn arthere, qui n'aye espreuue les rigueurs de mille supplices La langue seule vous restoit exēple de douleur, & elle mesme s'est decelee, en demandant à boire, affin qu'on luy dōnat du fiel, detrempé dās du vinaigre. Helas Seigneur, il ne faut point d'autre medecin, pour nous guerir de nos maux, que la meditation de ceux que vous auez endurez: Car si vne douleur de migrene nous saisit par la teste, nous n'auons qu'à penser aux espines qui ont percé la vostre. Si quelque defluxion nous tombe sur la iouë, representons nous les soufflets que les vostres ont souffert. Si vne apoplexie nous veut estrangler, pensons à mesme temps aux chesnes, & aux cordes, dont vous estiez lié par le col, avec vne Cruauté sans exēple. Si la goutte s'empare de nos mains, & de noz pieds, courons promptement au

remede de ce souuenir que les vostres ont esté clouéz, & nous serons gueris tout à l'heure. En fin si noz corps sont affligez de quelque playe, Considerons les vostres, des yeulx de l'Ame; il ne faut point d'autre remede, que cete seule consideration.

Impatient, que mille crimes tiennent attaché à vn lit, avec les chesnes toutes de feu, d'vne fiebure, prens le Calice de mon Sauueur, & boy apres luy du fiel, & du vinaigre; c'est l'vnique moyen d'estancher ta soif.

Courtisans, puis qu'avecq tant de bruit, & tant d'esclat, vous faictes profession de la Generosité; aurez vous le cœur si foible, & l'Ame si lache, que de vous plaindre à grands cris des petites douleurs qui vous tiennent à la geenne, pour punitiõ du crime de vos debauches; vous representant la verité des tourmens, que ce diuin IESVS endure sur la Croix en expiation

piation de vos propres offences? En viendrez vous iusques à cete detestable impieté de blasphemer dans vos douleurs, le nom de ce mesme Dieu qui meurt de douleur, par vn excès de misericorde? Soutiëndrez vous encore effrontement, que vos maux sont sans exemple, apres auoir ietté les yeux sur cet adorable Sauueur crucifié entre deux larrons?

Esprits affligez, ie vous somme tous de comparoistre sur ceste Montaigne de douleur, pour raconter, chascun à son tour, l'histoire de ses infortunes, puis que la Croix de mon I E S V S, est le vray dictame de toutes sortes de playes. Ie veux, dire l'vnique soulagement à toute sorte de malheurs. Si quelqu'un se plaint de la mort de son Pere; qu'il iette les yeux sur la Croix, & il y trouuera à mesme temps sa consolation. Si quelque autre soupire de la perte, qu'il aura faite de ses biens, qu'il

contemple la croix de mon Sauueur, & il fera plus riche que iamais, ne souhaitant rien du monde. Si celuy là est publiquement diffamé, qu'il tourne visage du costé de la Croix, il recouuera son honneur tout à l'heure. Et en fin si celuy cy est la fable des hommes, & le iouët de la fortune, qu'il aye recours à la Croix, il se rendra inuincible par ses armes: ie vous laisse l'estude de ces leçons.

Ie voy cependant mon Sauueur qui se prepare aux adieux, estant sur le point de partir: Car il s'escric encore, *Consummatum est. Tout est consommé.* Il est vray mon Sauueur, le crime est réparé, la Iustice est satisfaite, & voz ennemis sont vaincus. *Tout est consommé mon cher Pere.* Car ie n'ay plus de sang dans les veines, ie n'ay plus de peau sur les os. *Tout est consommé,* l'humour de ma vie s'est exalee en soupirs, & en larmes, il ne me reste
dans

dans le sein que le vent du dernier sanglot, qui me ravira l'Âme du corps. *Tout est consommé.* J'ay fuiuy la loy des peines, que vous m'avez imposees; vous avez maudit la Terre, mais vous voyez comme ie porte sur ma teste, les fruiçts de sa malediction. Si Adam pour cucillir la pome a leué la main, les miennes sont encores clouees à ce nouuel arbre de vie pour en effacer le crime. *Tout est donc consommé.* Je n'ay rien plus à faire qu'à mourir, & i'en meurs d'enuie dès le premier moment de ma conception. *Tout est consommé.* Ha Seigneur! que ie ne puisse dire cela de mes mauuaises habitudes: Car le feu de mes brutales passions me deuore continuellement. *Tout est cōsommé:* O doux IESVS le monde tient mon cœur enflâmé, mes folles humeurs ne sont point encore consummez. *Tout est consommé pourtant.* Faiçtes donc, s'il vous plaist, que le feu

de vostre amour me reduise en cédres, afin que tout soit aussi consommé en moy : *Tout est consommé !* He que ne le suis-je en effect, Seigneur, aussi bien que de volonté. Il me semble toutes-fois qu'il ne faut point d'autre feu que celui du desir extreme que i'en ay pourueu que le vent de vostre grace entretienne son ardeur. *Tout est consommé !* O qu'il faut estre scauant en amour, pour descouurer les amoureuses Merueilles, qui sont cachees dans ces paroles ! ie ne veus point aler trop auuant. Ie me cõtente de scauoir avec Sainct Pol, que mon Dieu est crucifié. Si toutes les sciences du monde, n'ont cete Verité pour obiect, elles sont fauces. C'est pourquoy ie ne scaurois entendre, que ce, que la Croix me prechera. Ie veux passer Docteur dans l'Vniuersité du mont du Caluaire. La Croix de mon Sauueur sera mon Liure, ses playes mes leçons, &
luy

luy mesmes mon Maistre de Philosophie, deuant qui ie fairay des argumés sur sa bôté, & sur ma malice, concluât tousiours à l'hōneur de sa misericorde, affin quelle aye pitié de moy.

Changeons de termes, pour parler de la douleur de cette Saincte Mere; Mais qu'en dirons nous, si les Anges sont muetz? qu'el esprit curieux ozera sonder les abismes de ce nouueau Occéa, que les l'armes qu'elle repand ont produit? Il me semble que l'humilité mesme, & le respect en cete sorte de pensees ne peuuent estre dignement receuables; parce qu'ils sont forcez dans la necessité où l'on se trouue, d'estre humble, & respectueux, en vn sujet, où l'arrogance est inseparable du precipice. Que feray- ie donc? o Vierge adorable. Si ie parle de vos tourmens, ma temerité m'en prepare des nouueaux. Si ie garde le silence, la contraincte qui me

l'impose , m'en oste le merite. De sorte que ie ne puis , ny parler, ny me taire, quoy que ie fois également violente, d'ouurir la bouche, & de la fermer. Permettez moy donc , s'il vous plaist, que mes yeux, & mon cœur, facent chacun à leur tour l'office de ma langue , pour exprimer en leur langage, non pas vostre douleur, mais plustost cele que ie souffre de vous voir endurer. Voicy pourtant des nouvelles pensees sur vostre affliction.

Ceste Mere desolee auoit ouy toutes les plaintes de mon Sauueur. Et il est croyable, que chasque accent se metamorphosoit en vn glaiue tranchant, qui luy perçoit les entrailles, comme foible pour le secourir avec toute la force de son amour, elle auoit entendu les pitoyables cris de ce Sauueur, mourant de soif, & de mille autres douleurs encore, sans luy pouuoir
don-

donner vne goutte d'eau : Car quoy qu'elle pleurat amerement, ses larmes, ayant vn principe d'amour, estoient toutes de flamme liquide. De sorte qu'au lieu d'esteindre la soif, elles en eussent augmenté l'ardeur. Je veux m'imaginer aussi, que viuant en son cher fils, plutost qu'en elle mesmes, elle ne soupiroit que par les soupirs de ce doux I E S V S, & que son cœur estoit nauré d'autant de playes que son cher enfant en auoit sur le corps: volez plus haut, si vous pouuez.

Pretons silence encore à ce dernier adieu, que ce Sauueur nous fait par cete amoureuse priere, qu'il adresse à son Pere, en disant, *Seigneur ie mets mon Esprit en vos mains.* Quel excez d'Amour, mais quel excez d'Humilité! Ce fils mourant d'Amour prie le Pere avec toute sorte de respect, de prendre son Esprit en sa protection, quoy qu'elle en soit inseparable. *Seigneur ie*
mets

mets mon Esprit en vos mains. Il appelle Seigneur celuy à qui il est egal en essence, & en puissance. Voila son humilité ; & il met son Esprit en ses mains, bien qu'il y fut desia, comme si de ces paroles, il en eut voulu faire autant des nouvelles chesnes. Et Voila son Amour. *Seigneur ie mets mon Esprit en vos mains.* Ce dieu meurt en homme, est toutes-fois, sa mort est toute diuine. Car rendant son Esprit à son Pere, il rend sa vie, à la vie, mesme. *Seigneur ie mets mon Esprit en vos mains.*

O doux Sauueur, faiçtes s'il vous plaist, que mon Ame soit l'Echô de ces mesmes paroles, affin qu'en mourant, ie vous tienne ces semblables discours, *Seigneur ie mets mon Esprit en vos mains*; o qu'il y a du contentement à mourir en parlant de la sorte ! Cet viure dans la mort, & mourir dans la vie. *Seigneur ie mets donc mon Esprit en vos mains des-à présent.* Pour pouuoir
viure

viure heureux dans mes miseres. Je ne
 veux point attendre que ie meure ; ie
 vous fais maintenant cete priere, afin
 de trouuer autant des felicitez en ma
 vie, comme i'en pourrois esperer en
 ma mort. *Seigneur ie mets mon Esprit en
 vos mains. Receuez le, s'il vous plaist.*
 Il est à vous, ie vous le rends. Cet vn
 ruisseau qui se va ioindre à sa source;
 cet vn rayon, qui ne peut subsister
 hors du corps de sa lumiere. Cet vn
 athome, qui cherche son vnité. *Sei-
 gneur ie mets mon Esprit en vos mains,*
 mais avec cete resolution, de ne l'en
 retirer iamais, pour estre à iamais vny
 avec vous, dans le sejour glorieux de
 cete Eternité, dont vous seul estes la
 mesure, comme estant infiny. Mais
 que dis-je infiny ? *Et inclinato capite
 emisit Spiritum. Et abaissant la teste il
 rend l'Esprit.*

Quel effroy me saisit ! Mon cœur
 est dans les alarmes de la mort, & mō
 Ame,

Ame, dans ses agonies. Mes cheueux s'herissent, mon sang se gele, & mes entrailles palpitent, dans les trances de mon estonnement. La Terre tremble: Le Ciel s'esclate en foudres. Le Flambeau du jour s'est estaint, & les Astres de nuict, en ont vne eternele, pour sepulture. L'air tout en feu, remplit tout de ses Flames, affin d'embraser tout, Quel oracle consulteray-ie, pour cognoitre la cause de tous ces Prodiges? Ha! le Grand Dieu de la Nature est mort, & la Nature me-me n'en peut celebrer les funerailles, si elle ne s'enseuelit dans le Tombeau de son premier neant. De sorte que ie voy tout mourir en mourant. Toutes-fois les morts resuscitent; Mais c'est sans doubte pour mourir encore vne fois de regret, puis que l'auteur de la vie ne vit plus, Qui voudroit respirer encore, si ce n'est pour ietter le dernier soupir: Car les
pier-

pierres inanimees, ont vne Ame de Compassion, puis quelles se fendent de pitié ! Helas Seigneur, que n'ay ie vn Cœur de Pierre, me voyant insensible avec vn cœur de chair.

Des lors que mon Sauueur eut rendu l'Esprit entre les mains de son Pere ; comme à la source Eternele, dont ce Ruisseau de mesme nature, procedoit, le Soleil fut le premier qui porta le dueil de ce trepas, couurant son beau visage du noir de son affliction. Mais chose estrange, ce bel astre s'esclipce luy mesme, cōme s'il estoit animé, & il est croyable qu'en son occident, sa clarté naturele se Metamorphosa en vne lumiere de Raison, puis qu'avec tant de Iustice, il celebre les funerailles de son Createur. La Lune se couure de son manteau de nuit, quoy qu'il fut azuré, scachant bien que les tenebres de son affliction, en fairoient perdre, & l'esclat,

l'esclat, & le lustre. Les Estoiles ne paroissent point dans cette obscurité; comme si elles n'en pouuoient supporter l'horreur. Les Elemens agissent tous diuersement, mais prodigieusement, chacun à sa fasson; le feu ne luit plus, que dans les esclairs, & dans les foudres. L'air est tellement esmeu, par le vent des soupirs, dont tous les cœurs l'agitent sans cesse, qu'il ne predict qu'orage, & que tempeste. La Terre, tousiours tremblante, comme animee d'un frisson de peur, & d'effroy, ne peut treuuer vn tombeau pour se cacher, quoy qu'elle en soit toute plaine.

L'eau cherchant vn abry, se resserre dans les yeux des mortels, pour renaistre encore vne fois, dans les larmes de regret qu'ils repandent. Les Rochers muetz, & insensibles, se fendent, & toutes-fois en se fendant ils parlent, & souffrent, comme s'ils auoient

auoient des langues , & des cœurs. Les arbres estant sur le point de fleurir , ne produisent que des Espines au lieu de Fleurs. De sorte qu'ils se metamorphosent tous en Buissons. Les oyseaux effrayez , errent par tout, ne scachant dans quel element ils doibuent treuver leur sepulture , & dans l'effroy qui les anime , chacun oublie son ramage, pour aprandre à croasser comme les Corbeaux, ou à huer comme les Hiboux. En fin toutes les choses créées sont reduites aux abois , par la mort du Dieu de la Nature ; comme si la Nature mesme, debuoit mourir avec luy.

Courtisans, faut il donc que le Soleil s'esclipse à la mort de son Createur , & que vous n'en cligniez pas les yeux de pitié, ou d'estonnement? La Lune aura t'elle le visage couuert de dueil, tandis que les vostres seront parez de ioye. Les estoiles se cache-

R

ront

ront elles de peur, sans vous en faire, puis que vous n'estes point capables ny de compassion, ny d'amour. Le feu alumera t'il les Esclairs, & les foudres de la Iustice diuine pour reduire vos testes en cendres, plustost qu'embrafer vos Ames d'amour. L'air sera t'il agité, sans emmouuoir vos Espritz; Quoy la Terre tremblera, & vous demeurerez immobiles. L'eau se resserera dans vos yeux, pour estre repandue en larmes, & vous ne pleurerez pas. Les Rochers muetz parlent, & souffrent dans leur insensibilité, & vous aurez des langues sans vous plaindre, & des cœurs de chair, sans soupirer. Les arbres se pareront d'Espines, voyant que leur Createur en est encore couronné; & vous les foulerez aux pieds, apres en auoir cueilly les Roses. Les oyseaux publieront leur effroy par leur ramage, en vn accident si funeste, & vous garde-

garderez le silence dans vostre malice pour mediter le mespris de toutes ces Veritez. En fin : Tout ce qui est en la Nature portera sur le visage quelque marque d'ennuy & de tristesse , & vous serez seuls plus insensibles que les Rochers , & plus durs que les Pierres. N'aprehendez vous pas , que ces mesmes Rochers , & ces mesmes Pierres ne soyent vn iour autant de temoings de vostre damnation?

Si les Montaignes de Gelboé ont esté autres fois maudites par le Roy David, pour n'auoir pris le dueil de la mort de Saul; comment vous deffendrez vous contre les reproches de vostre insensibilité, en la mort de ce diuin Createur, scachant mesmes que le Ciel exauça les veux de ce Propheete. De sorte que si les Rochers insensibles ont esté punis pour n'auoir point eu de ressentiment ; pourrez vous exempter vos cœurs de Roche

des supplices , où le crime de leur durté les a des-ja condempnez. La fideration en est assez importante.

Je reuiens encore à vous. O diuin Redempteur, mais ie ne vous trouue plus : Car vous estes des-ja decendu aux Limbes ! Ha qu'il se cognoit bié maintenāt que ie ne viuois pas en vous, puis que ie ne suis pas mort avec vous. *Je vous voy*, pendu à l'arbre, dont j'ay mangé le fruit. *Je vous voy*, obeissant iusques à la mort, pour reparer le crime de ma desobeissance. *Je vous voy*, tout dechiré à lambeaux, & acablé soubz le faix de mes pechez, afin de m'exempter de leurs peines. Que fera ce de moy, Seigneur, vous portez les espines sur la teste, & ie ne puis les souffrir soubz les pieds. Vostre visage est tout remply de crachatz, & à peine en puis-je voir la Terre couuerte. Vostre bouche a eu en partage, le fiel, & le vinaigre, & ie n'en scau-

scaurois souffrir la senteur. Voz mains sont clouees à vn poteau, & si les miens sont piquees d'une epingle, j'en viens iusques au depit & iusques à la cholere. Vostre corps a seruy debut à la Rage, & le mien fert de Blanc à la Volupté. Vous estez mort enfin dans les douleurs, & ie vis encore dans les delices; Que fera ce donc de moy; o doux IESVS? ie reclame vostre seule Misericorde: Car toutes les fois que ie pense à vostre Iustice, il me semble que les Enfers sont ouuertz pour m'engloutir. Voyons la fin de ces funestes Vespres.

On peut curieusement remarquer que nostre Seigneur à fait d'aussi grandz Miracles en sa mort, qu'en sa vie: Car si en viuant il a donné la lumiere aux auueugles, en mourant il en priue le Soleil. Si en viuant il fait parler les muets, en mou-

rant il donne des langues aux Rochers pour se plaindre, à leur faſſon. Si en viuant il reſuſcite les mortz, ſa mort leur redonne la vie. Si en viuant il ſe fait craindre aux Vents, & à la Mer, en mourant il fait trembler la Terre. Si en viuant encore il eſt reconnu pour Fils de Dieu, apres ſa mort ſes ennemis meſme le confeſſent.

O adorable Sauueur ; Mais en eſfect tout adorable ! Ha qu'il y a du plaisir de ſ'eſgarer en la meditation de voſtre Grandeur infinie : Car quand ie conſidere que voſtre foibleſſe meſme a eſté toute puiffante, puis qu'en mourant vous reſuſcitez les mortz, j'humilie mon Eſprit dans mon ſilence, ne ſcachant comment dire pour vous exprimer ſeulement mon deſſaut. Vous voulez eſtre enſeueley, & par vn Miracle digne de vous, les tombeaux s'ouurent à l'enuy, & don-

donnent congé à leurs hostes, pour vous offrir en hommage leurs funestes maisons. Vous vous estes humilié iusques à la mort de la Croix, & en vous rabaisant, dans l'infamie de ce supplice, les Pierres ont publié vostre Grandeur. Vous avez bien fait encore dauantage: Car scachant que la Nature sonneroit l'alarme, par tous les quatrecoins de l'vniuers, à l'heure de vostre mort, vous avez sans doute commandé au Soleil de s'esclipser, affin de cacher soubz le voile de son obscurité, toutes ces Pompes funebres, que vos Creatures vous prepa- roient pour vn dernier tribut. Mais voicy le Miracle decouvert: ces tenebres naissant en plain midy, publient encore la puissance infinie dont vous voulez cacher la Verité, soubz leur voile. De sorte que ie puis soutenir pour la seconde fois, que dans vostre aneantissement, vous avez trou-

ué le Trone de vostre gloire immortelle. Changeons de discours, & de pensee.

Ne voy je pas vn Cheualier, plus cruel que tous les Bourreaux ensemble; qui d'une lance mutriere perce le cœur de mon IESVS! Ha! cruele lance que cherches tu dans ce cœur? si tu y cherches la vie, il y a des-ja lōg temps que l'amour en a fait le raiuissement, tu ny treuueras que la Mere; Mais que fais tu, en voulant punir vn cœur coupable? tu en blesses deux innocens: Le cœur de la Mere est dās celuy du fils, & tu te rendz meurtriere de tous ensemble, pour emporter le prix de la Cruauté. Toutesfois il me semble que tu es excusable; s'il est vray, que l'aimant attire le fer; Car le cœur de mon IESVS, estant vn vray aimant, il t'a attiré avec violence, pour receuoir vne nouvelle blessure d'amour, comme en estant tout plain. Mais quelle
estran-

estrange Merueille. Je voy deux fontaines, l'une de sang, & l'autre d'eau. Ha i'en decouvre encore le secret. Il y a deux fontaines, parce qu'il y a deux playes, puis que le cœur du fils & celuy de la Mere sont egalement blessez. Le cœur du fils produit la fontaine de sang, à cause que son sang doibt effacer nos crimes; & le Cœur de la Mere, nous donne vne fontaine d'eau; Mais d'eau de larmes, comme estant toute en larmes, affin de nous emouuoir à Compassion. Il faut que ie vous die encore vne autre pensee.

Vous vous ramantevres que mon Sauueur sua sang, & eau, dans le Iardin d'Oliuet, par vn effort d'Amour, & voicy les dernieres gouttes de cette sueur amoureuse, qui s'estoient resserrees dans le cœur, & qui se repandent amoureusement par cete derniere blessure d'amour. Alons à la fin.

Mon Ame, si ce premier martyr a
veu les Cieux ouuertz. Tu iouis main-
tenant de la mesme grace, puis que le
cœur ouuert de ton Sauueur, est ton
Paradis; Mais tu vois aussi que le che-
min en est tout sanglant. De sorte
que pour y entrer dedans, il faut ne-
cessairement souffrir le martyr. *O*
douce necessité! puis que mon Redem-
pneur en est l'exemple. *O douce necessi-
té,* puis qu'elle se termine à vne gloire
sans fin. *O douce necessité!* puis qu'on
endure pour l'amour de celuy, qui
nous a aymez beaucoup plus que soy
mesme. Seigneur, Pourquoi m'avez
vous commandé de porter vostre
Croix? Ne scauez vous pas que se m'et
vn fardeau si glorieux, que ie n'en
pouuois refuser l'honneur qui en est
inseparable? Il me semble que vostre
commandemēt oste le merite à mon
obeissance: Car ie vous doibs obeir
comme à mon souuerain. Et en vous
obeissant

obeissant par raison, ie ne puis vous temoigner mon amour. Toutesfois, puis que vous cognoissez les plus secretz sentimens de mon Ame, ie vous offre tous les mouuemens de cete bonne Volonté, qui me possede maintenant, affin que vous receuiez pour effect, tout ce que je scaurois faire, si vous m'en donniez le moyen, comme j'en ay le desir. Suiuez moy, sur ces traces.

Courtisans, ie vous laisse deuant les yeux ce miroir de la Passion de mon Sauueur; ie vous laisse dis-je ce theatre sanglant, où il a representé la Tragedie de son amoureux sacrifice. Tout y est adorable avec effroy: Car si ce miroir vous represente la Misericorde d'un coté, il vous fait voir aussi la Iustice de l'autre. Et si l'Amour paroît sur ce funeste Theatre, la Vengeance y ioue son personnage. Cela veut dire, que si vous vous en aprochez comme la Magde-
lene,

lene, les larmes aux yeux, les soupirs à la bouche, & les regretz dans l' Ame, vous y cuillirez les fruitz de la grace. Mais si vous y cōparoissez avec l'impudence, & l'obstinatiō d'un mauuais larron, les abismes sont encore ouverts pour vous engloutir.

Quand ie contemple ce diuin IESVS sur le Trosne amoureux de sa croix en action d'expirer d'amour, apres auoir repandu par amour, tout le sang de ses veines, & que d'un costé ie voy sa Misericorde, representee par le bon larron, & de l'autre sa Iustice, figuree par le mauuais, ie tremble de peur dās les plus douces esperances de mon salut. Quoy lors que les Cieux sont ouverts par autant de portes, que mon Sauueur a de playes, il ny a qu'un seul qui entre dedans, son Cōpaignon est repoussé, & si rudement, qu'il en est precipité iusques dans les Enfers, *O admirable Misericorde ! Mais O epouuentable*

table Justice ! O adorable Bonté ! Mais O horrible Vengeance ! D'un coté ie suis ravvy de joye, & de l'autre ie frissonne d'estonnement. D'un coté l'Esperance me fait heureux, auuant que l'estre, & de l'autre, la Crainte me rend malheureux par aduance.

Que sera-ce de vous, Messieurs les Courtisans, à l'heure de la mort, si ces portes des Cieux vous sont fermées? Et si ces ruisseaux de sang ne coulent plus pour lauer voz crimes, dans la mesme obstination de ce mauuais l'arron.

Pleurez, Pleurez donc de bonne heure, si vous voulez comme (vn autre S. Pierre) trouuer le port de vostre salut, dans la Mer de voz larmes; Aussi bien ne les pouuez vous refuser à l'objet de mon IESVS Crucifié.

Faint, illegible text, likely bleed-through from the reverse side of the page. The text is mirrored and difficult to decipher.



LE BREVIERE

D E S

COVRTISANS,

A COMPLIES.

CHAPITRE VII.

Tenebra facta sunt super totam Terram.



COVRTISANS, c'est à ce coup que la Nature vous somme de comparoistre aux funerailes de son Createur. Le Soleil vous y inuite par son Eclipse. La Terre vous y apelle, au bruit de

S

ion

son tremblement: Les Pierres vous y attendent en grand nombre s'estant fendues, pour multiplier leurs especes: Le Voile du temple s'y trouue tout rompu, & tout dechiré: Et les mortz mesme resuscitent, pour honorer de leur presence miraculeuse, vne action si funeste, & si juste. Les Anges s'y trouueroient s'ils auoient des yeux pour pleurer, & des langues pour se plaindre; Mais leur Reyne tient leur place, comme abondante en larmes, & en soupirs.

Accourez donc aux funerailes, puis que vous n'avez pas assisté à la mort. Vous avez refusé d'accompagner ce doux Sauueur à la Croix; luy refuserez vous encore vostre secours, pour l'en descendre. Vos pechez l'ont cloué à ce poteau; que vostre Pitié au moins l'en dettache. Vous avez abandonné son corps aux douleurs: le laisseres vous encore sur
l'autel

l'autel sanglant de son sacrifice, comme si vous le pouuiez immoler vne seconde fois.

Vous voyez comme S. Iehan, la Magdelene, & le bon Nicodeme sont empressez à le declouer de cet arbre de vie, où il s'estoit fait cramponer; Que le plus hardy de tous luy oste la couronne d'Espines, pour s'en parer à son tour. Toutesfois ce ne sont plus des Espines, puis que la pointe en est emouffee. Que celuy la luy arrache les cloux des mains, & des piedz, & qu'il s'en ferue comme des Fleches, pour se percer le cœur de regret; mais que dis-je? ces cloux ne blessent plus, ilz ne font que guerir. Que celuy cy encore attache son corps à la croix, ou la croix à son Ame, pour y mourir de douleur. Ce seroit en vain aussi: Car cete Croix, au lieu de causer la mort, donne l'immortalité.

Ha Magdelene ! c'et à ce coup qu'il te faut verser autant de larmes d'amour , sur les piedz sacrez de mon IESVS , que tu en as repandues de regret ; puis que l'amour les a percez, aussi bien que son Cœur. C'et à ce coup que tes cheueux pourront vtilement seruir de torchon , pour essuyer ces piedz sanglans ; Mais de quel prix seront tes cheueux , lors qu'ils auront changé leur couleur doree , avec cele de pourpre ? Tu peus bien, imaginer ; que si les anges estoient capables d'enuie , ils enuieroient ta belle cheuelure, ayant esté arosee du sang precieux de leur Createur.

Ie n'oze parler à vous , ny de vous. O Vierge desolee , parceque mon Esprit ne me peut fournir de pensees, ny ma langue des parolles , pour dire quelque chose de vostre affliction : Car quel nom peut on donner à vostre douleur ? Si ie l'apele extreme , elle s'apele

s'apele autrement, & qui scait donc le nom qui luy est propre. En disant que vos peines sont incomprehensibles, ie n'en dis rien du tout, puis que ie n'en scaurois rien comprendre. Et quoy que ie mete en auuant que vous souffrez tout ce qui se peut endurer, c'est auueugler de nouveau les Espritz en la cognoissance de vos douleurs, plustost que leur debander les yeux, parceque leurs imaginations ne sont pas secondes iusques au point de conceuoir la grandeur de vos tourmens. S. Bernard va bien plus auuant encore, lors qu'il soutient, que quand vos peines eussent esté diuisees en autant de parties, qu'il auoit des creatures au monde: la moindre de leurs douleurs eut suffi pour causer la mort, sans vne grace particuliere de secours. S. Bonauenture nous veut persuader avec ses respectz ordinaires; Que vous auez souffert plus que vostre cher fils; Et

voicy l'explication de sa pensee. C'est que vous ressentitez dans l'Ame, tous les tourmens que mon Sauueur endura sur son corps. Et le ressentiment que vous en eutes, nous semble en quelque faison plus extreme, considerant que les douleurs mouroient sans cesse en mon Sauueur, & qu'elles naissoient en vous, puis qu'elles uiuent encore apres la mort. Ce qui me fait imaginer que mon IESVS souffroit plus en vous, qu'en luy mesme, scachant, que le souuenir de son trespas, vous feroit mourir mille fois. Et s'il est vray, que les ruisseaux des douleurs, retournent à leur source, mon IESVS n'ayant souffert que pour s'estre incarné, on peut se persuader que les ruisseaux des peines de la Passion de mon Sauueur n'ont fait que passer dans son sein en souffrant, & en mourant, & qu'ils retournent à cette heure, dans le cœur de la Mere, com-

comme dans leur source.

Qui pourroit donc sonder les abismes de vos ennuis? O Vierge affligee, puis que vos afflictions n'ont point de nom & moins encore d'exemple. Le vous voy en vn estat si deplorable que les Rochers en deburoient pleurer, & nos cœurs de chair n'en soupirent pas seulement. Mais ne vous en estonnez point, puis que nous auons crucifié le fils, nous ne scaurions auoir des regretz pour la Mere. Rompons l'escorce, & penetrons encore plus auuant.

Quand ie pense que le Pere abandonne le fils sur la Croix, & que le fils crucifié, abandonne la Mere, mourante de regret & d'amour, sur le mont de Caluaire? Iugez dans quelle confusion peut estre mon Esprit: Car le fils abandonné de son Pere, s'abandonne luy mesme refusant le secours de sa diuinité, à son humanité. Et

la Mere delaissee de son fils s'abandonne aussi elle mesme, comme nous presche le deuot Arnaldus, disant que cete Vierge ne viuoit plus qu'en son fils mort, comme estant morte avec luy.

Tout le monde scait, que les Echos rendent leurs oracles dans les Creux des Montaignes, & que la voix, qui les consulte, est repetee long temps aprez qu'elle a esté pronôcée. Voulez vous voir le Mistere de cete proposition? La Sainte Vierge est vne mōtaine inaccessible. Cete montaigne, est plaine de fentes, & d'ouuertures, puis qu'elle a le cœur percé de mille traitz de martyre. La croix, où sō fils est crucifié, est plâtee au milieu de cete mōtaine, comme l'ayant grauee dans son ame. Tellemēt que les cris de douleur, que mō Sauueur iette au vent, faisant vn Echo dās le sein de cete Mere; les tristes accens en sont maintenant

repe-

repetez , & leur son pitoyable la tient
toujours en alarme. Et toutesfois sa
constance est si parfaite qu'elle nour-
rit ses douleurs de son silence, ne vou-
lant pas ouvrir la bouche, pour les
soulager par ses cris. Elle pleure bien
amerement: Mais quoy que ses lar-
mes soient puisees du profond de son
sein, ses yeux les repandent si dou-
cement, & avec tant de grace, qu'elles
se rendent invisibles en tombant. Je
veux dire, que les nuages de sa dou-
leur en se resoudant en pluye , cete
pluye tombe sans faire bruit , de me-
me que celle de l'aurore, dont tous les
matins elle arose les Fleurs. Elle sou-
pire bien avec violence; Mais le vent
de ses soupirs, aussi humble que le
cœur, qui le produit, perd peu à peu
sa force en naissant, & il ne luy en re-
ste qu'autant qui luy en faut, pour
porter l'air batu de son bruit, aux
oreilles de cete mesme Vierge. Iugez

ce qu'elle peut souffrir, dans cete nouuelle contrainte, où elle se trouue, de cacher ses larmes, & d'estoufer ses soupirs, dans les dures espraintes de ses maulx.

Auec quelles impatiences attendoit cete Mere le Corps de son cher fils, pour le pouuoir caresser à son aize, parmy les mesaises de ses douleurs, à mesme Temps qu'on declo-uoit vne de ses mains, & que cete main pendoit en bas, sa bouche luy donnoit des ja mille baisers, par l'enuie qu'elle en auoit. Et lors que la teste penchoit d'vn mesme coté, se laissant emporter au poids du corps, vne me- me enuie de la baizer, sans conte, ny sans mesure, la possedoit si puis- sament, qu'elle en croyoit faire l'action: estranges effectz de l'amour!

Ce precieux corps de mon Sauueur ne fut pas plustost decendu de la croix que ceste Sainte Mere l'embrasse
estroi-

estroitement , & apres l'auoir mis sur son chalte giron , elle conte de ses yeux toutes les playes qu'on luy a faites, & comme elles sont sans nombre, elle se mesconte souuent. Mais voicy des nouvelles Merueilles d'amour. Les regards de cete Vierge, en parcourant toutes les blessures de ce corps, les attirent dans son cœur. De sorte, que chasque regard est vne Fleche qui redonde par reflexion dans son sein. Et apres que ses yeux luy ont causé cet accroissement de martyre , ilz recommencent leur exercice ordinaire.

Cete Mere pleure donc tousiours, & en pleurant elle mele l'eau de ses larmes, avec le pretieux sang de son cher fils. Disons plutoft que comme l'eau des ses pleurs, est vn sãg espuré, de mesme que le laiët , qu'vn sang se mele avec l'autre, & toutesfois ce n'est qu'vn mesme sang: car tout le sang
du

du fils , procedoit de la Mere , & d'au- tant qu'il estoit repandu , ie veux croire , que cete Vierge , tousiours Mere , luy en vouloit encore remplir les veines d'vn nouveau. C'et pour quoy vous la voyez maintenant repandre des larmes de sang , en abondance , sur ce corps adorable ; que d'amou- reux misteres !

Il est necessaire de se représenter , si l'on veut s'entretenir sur ces memes pensees , Que le Cœur de cete Vierge ayant la liberte de soupirer , ses sanglotz sortent en foule avec tant d'effort , & avec tant de Violence du profond de son sein , qu'on diroit qu'ils en arrachent les entrailles. Elle voudroit bien encore faire parler son Ame par ses plaintes , mais ses desirs ne s'accordent pas avec sa douleur , parceque son excez , rend sa langue muete. Et pour n'estre point oyleuse durant son silence , elle recommence le pitoyable

ble exercice de ses tristes baisers, pressant de ses leures, ceux de mō Redempteur: ie dy pressant avec effort, comme si par l'amoureux artifice de cete force, elle auoit dessain de cueillir les lis fletris de cete bouche pale, & y semer à mesme temps, les œilllets de la sienne.

De combien de diferentes estreintes, toutes animees de differens s'entimens, embrasse t'el ce corps tout diuin. On jugeroit à son action, que si son pouuoir egaloit sa volonté, elle desireroit faire r'entrer ce corps, dans son corps; comme s'y elle aprehendoit que la mort ne le luy rauisse encore vne fois. Ou bien puis qu'il doibt estre enseuely, affin de luy redonner ses entrailles pour sepulture, de mesme qu'elles luy ont seruy de Berceau. Imaginons nous encore, qu'elle estreint si serré entre ses bras ce sacré corps, à dessain d'en imprimer toutes les playes

playes sur le sien, puis qu'elles sont des-
 jagrauces dans son Ame. Mais en fin
 durant le temps de ces careffes, la dou-
 leur s'asoupissant dans sa violence,
 elle fait vn effort pour recouurer la
 voix, & pour se plaindre en ces ter-
 mes.

„ En quel estat te voy-je reduit
 „ maintenant, mon cher fils? Le ne te
 „ cognois plus que par tes misereres, par-
 „ ce qu'elles sont si grandes, qu'autre
 „ que toy ne les pouuoit endurer. Mes
 „ yeux ont beau chercher sur ton visa-
 „ ge quelque trait de ta ressemblance;
 „ ie n'y trouue que celuy de tō amour,
 „ n'ayant peu estre effacé par la Cruau-
 „ té. De combien de playes at'on cou-
 „ uert ton corps, pour en faire sortir tō
 „ Ame; cōme si la moindre ne sufisoit
 „ pas. Le voy ton chef percé de mille
 „ espines, & tu n'auois qu'une seule vie
 „ à perdre. Helas qui donnera assez des
 „ larmes à mes yeux, pour pleurer mes
 infor-

„infortunes ? Le Ciel ne me cognoit
„plus , la Terre n'a pour moy que
„des foudres ; Et le Soleil m'a priué de
„sa lumiere. Les morts tant seule-
„ment ont ouuert leurs tombeaux,
„pour y enseuelir mes Miseres. Mais
„pourquoy les enseuelirois je , puis
„que tu en es la cause, mon cher fils ?
„Il faut que ie meure à mon tour
„peu à peu , pour celebrer de mes
„peines presentes, la memoire de tes
„Tourmens passez. Ha que n'ay-je au-
„tant de vies que tu as souffert de dou-
„leurs ; & que ne m'estoit il permis
„de les livrer toutes ensemble à la
„mort , pour t'en exempter. Mais
„quoy ? ton amour te rendoit si jaloux
„de tes supplices, qu'ẽ mourát de dou-
„leur , ce n'estoit que de la douleur
„de mourir si tot. Toutesfois, puis que
„ta jalousie procedoit d'amour, & que
„tu m'aymois si fort , il me semble,
„que tu debuois partager avec moy
ton

„ton martyrre. Mais c'eut esté bien
 „peu de mourir vne fois, il faut, il faut
 „que ie viue pour souffrir autant de
 „differentes mortz, que tu as enduré
 „de diuers tourmens; Encore suis-je
 „trop heureuse dans mes malheurs, de
 „me voir digne d'une si glorieuse
 „s'ouffrance : Car quel plus grand
 „honneur puis-je souhaiter, que de
 „mourir pour celuy, qui m'a fait nai-
 „stre. Mourons donc, mais ie veux
 „que ce soit si lentement, que chaque
 „soupon me soit vne mort. Que dis-
 „je; viuons plustost, mais à condition,
 „que mon cœur ne respirera iamais
 „que le mesme air qu'il aura soupiré
 „de douleur. Affin que mon Ame
 „soit vn temple, & mon corps vn au-
 „tel, où ie rende des continuels sacri-
 „fices, de mon continuel martyrre.

A ces derniers mortz, son cœur, à
 qui ces plaintes ostoient la liberté de
 soupirer, renouë sa langue, & luy im-
 pose

pose silence pour se plaindre à son tour. Mais son langage de soupirs, n'empesche point cete Vierge de caresser son fils : Car elle le baise continuelement. Et ie veux croire quelle s'esforce de le r'animer avec le vent de son Halene. Et comme c'et la moitié de sa vie de luy en donner la moitié. Ses bras ne lachent iamais aussi la prise, de cè pretieux corps ; peut estre ont ils fait cet amoureux cōplot de le tenir enseuely dans leurs enlacements, iusques au jour de sa Resurrection, affin de n'abandonner point vne si chere conqueste. Et la crainte que cete Vierge a du contraire luy fait continuer ces plaintes de la sorte.

„ Faut il donc que ie t'abandonne encore , mon cher fils ; He „ quoy la Rage des luifs, n'est elle „ pas assouuie ; s'ils estoient alterez „ de ton sang , tu n'en as plus dedans „ les veines. Si ton corps estoit destiné

T

pour

„pour proye à leur fureur, elle en a
„deuoré la vie : Me voudroient ils
„,oster cete derniere consolation, de
„contempler au trauers de mes lar-
„mes, ces pitoyables reliques de leur
„Cruauté? Helas que deuiendray-ie si
„leur Tirannie me poursuit iusques
„dans ta sepulture. Le n'ay rien de li-
„bre que les yeux, la langue, & le
„cœur, pour pleurer, pour me plain-
„dre, & pour soupirer. Que si mes
„larmes les offencent, qu'ils m'arra-
„chent les yeux ; si mes plaintes les
„importunent, qu'ils me coupent la
„langue ; & si mes soupirs leur deplai-
„sent, qu'ils en accourcissent promte-
„ment le nombre. Car comment
„pourrois-je retenir mes pleurs, puis
„que la douleur qui me possede, en a
„laché la bonde. Comment scaurois-
„ie arreter mes plaintes, puis que les
„peines que j'endure, n'ont point de
„relache. Et quel moyen de m'em-
pescher

„pescher de soupirer, puis que mon
„cœur affligé en a changé l'habitude
„en nature. Qu'on m'otte la vie, si
„l'on me veut d'effendre de mourir,
„au souuenir de ton trespas.

• Ses sanglotz donnoient quelques
fois de l'interuale à ses plaintes; mais
le relache, n'en estoit pas de longue
duree, & en continuant, elle faisoit
ouir ces discours.

„ Comment est il possible que ie
„souffre tant de m'aux sans mourir:
„puis que le moindre, est plus im-
„suportable que la mort mesmes? Il
„semble que la douleur soit l'element
„de ma vie, & que mes malheurs, &
„mes miseres, ourdissent de nouveau
„la trame de mes jours. Adoucis vn
„peu la rigueur de ce sort, mon cher
„fils, & permetz moy de te suiure
„dans le tombeau, puis que mon
„cœur y garde des-ja ta place. Tu scais
„biē que ie ne scaurois viure sans toy,

,,attiré donc par pitié, ou par amour le
 ,,dernier soupir de mes entrailles. Que
 ,,veux tu que ie face dás le mōde, apres
 ,,t'y auoir veu crucifié entre deux lar-
 ,,rōs. Ie ne marcheray jamais, que ie ne
 ,,trouue soubz les piedz les memes e-
 ,,spines qu'õ ta mises sur la teste. Tous
 ,,les arbres qui se presenteront à mes
 ,,yeux, porterōt, l'image de ta croix, &
 ,,lors que le Soleil se couchera, ie m'i-
 ,,magineray qu'il se veut esclipper vne
 ,,secōde fois, & que pour vne seconde
 ,,fois tu veux souffrir la mort, en fin l'a-
 ,,mour que ie te porte, faisant changer
 ,,de nature à toute sorte d'objectz, ie
 ,,ne verray ny ne ressembleray que des
 ,,mortz, mais la plus cruelle de toutes
 ,,ensemble, procedera du regret de ne
 ,,pouuoir mourir.

Elle vouloit continuer ces plaintes,
 lors que S. Iehan luy dict, d'vne voix
 interrompue de sanglotz, qu'il estoit
 temps de chercher vn tombeau pour
 enseuelir ce pretieux corps. Ha

Ha Courtisans voicy vne effroyable attainte de reproche: Car vous voyez, cōme ce souuerain createur de la Terre, est en peine d'en treuuer sept pieds, pour sa sepulture. Vous le voyez dis-je estādū sur ce chaste giron de sa Mere, en attendant qu'on mandie vn suaire pour l'enueloper. Si ces funestes Veritez n'attirent des larmes de vos yeux, & des soupirs de vos cœurs. le ne croy point que les rochers soient plus insensibles que vos Ames.

Alez plus auuāt encore dās cete meditation, & ramanteuez vous les honneurs qu'ō fait à vos cōpaignons, apres leur mort vous voyez la carcasse puāte de leurs corps à demy pourry, parce de superbes habitz, & couchee de sō lōg, sur vn liēt magnifique, & l'on contēple ce colosse de fumier à la lumiere d'vn nōbre infiny de flābeaux, comme si c'estoit le Colosse de Rodes, qu'on met au rang des Merueilles du monde. Tournez maintenant la medaile.

Cete masse de vers sera eleuee en vue , sur vne couche , toute esclatante d'or, & de soye, & le fils de Dieu sera gifant par Terre, sans auoir vn seul drapeau pour couvrir sa nudité.

Cete charogne sera honoree de millerespectz, & esclairee d'autant de lumieres ; Et le corps sacré de mon Redempteur n'aura pas vne seule chandele, pour esclairer ses funerailles. En fin on portera en Terre ce monceau de boüe , avec toutes les funestes Magnificences qu'on scauroit s'imaginer, Et l'on va enseuelir mon IESVS dans vn tombeau mendié. Voicy les pompes funestes de son Enterrement.

Saint Iehan & la Magdelene sont les pauures , qui vont deuant , & au lieu d'estre couuertz de dueil , ils en sont tous plains. Leurs cœurs embrasés d'amour, aussi bien qu'animez de regret, seruent de Flambeaux mortuaires.

tuaires. Nicodeme & Ioseph d'Arimathie suiuent apres, portant ce corps adorable de mon Sauueur. Et la desolée Mere toute couuerte de larmes, est la dernière de ce triste conuoy. Ses sanglotz seruent de cloche, & à leur son lamentable, on met en Terre, ce Createur du Ciel. Les chemins n'estoient point tapissez de noir, parce que tout le monde ensemble portoit encore le dueil de ses Tenebres. Toutesfois le Soleil recomença de nouveau sa Carriere, pour esclairer ses funerailes. Je vous laisse dans les regretz, pour en celebrer le souuenir.

Je finis ce Breuiere, O Vierge Tres-saincte, & tres affligée, par le Repentir de mon audace, ayant fait voler ma plume iusques dans l'air, où vos regretz ont retenty pour en produire dans les Espritz vn Echô imaginaire: Bien qu'il soit impossible que le recit de vos Tourmens, ne bruye quelques

fois aux oreilles des Ames les plus insensibles, pour les emouuoir à Pitié. Faites donc s'il vous plait, o Vierge toute adorable, que ie reçoïue la premiere atteinte de cete compassion, & que cet Echô de vos regretz resone incessamment dans le rocher de mon Ame, affin d'amolir sa durté.

Fin. des Complies.

MEDI



MEDITATION

TRES-IMPORTANTE

*Pour faire profit de la lecture
de ce Breuiere.*

CHAPITRE DERNIER



LE Premier office de la Passion de mō Redempteur nous represente beaucoup de misteres, où nos espritz arrogans peuuēt aprādre à s'humilier. Et nos Volontez souueraines, à subir les loix de la Raison : Car toutes les fois que nos imaginations & nos pēsees se vont promener dans ce Iardin solitaire, que mon Sauueur a arrosé de
 T 5 son

son pretieux sang il faut necessairement, que nos Ames se rendent aux attaines de la Compassion, si elles resistent à celles de l'amour. Il faut disje que nos cœurs, de quelque froide trempe qu'ils puissent estre, aprenent à soupirerde regret, & de douleur.

Et ie vous en laisse le jugement, dans l'experience où vous estes, de toutes ces Veritez m'imaginant que vous soupirez de Tristesse, de voir ce doux **IE SVS** Triste iusques à la mort. Il sue sang & eau, dans les agonies mortelles, où l'aprehension qu'il a de vostre perte, le reduit : Car il voit dans sa Presciēce, comme vous vous baignez de ioye, dans l'eau de ses larmes. Et le Regret qu'il en a, le tient aux abois. Que s'il aprehende la mort dans son innocence, ce n'est que pour vous aprendre à la craindre dans vostre malice: des le moment de sa conception il s'estoit resolu à mourir, Et pour
vous

vous forcer de le croire, vous voyez en quels termes il prie son Pere. *Que tout ce que vous desirez soit accompli en moy, dit il, puis que ie n'ay point d'autre Volonté que la vostre.* Soyez l'Echô de ces diuines paroles, redisant tous-jours la mesme chose au fort de voz Ennuis. Que la fortune vous face choir, qu'une maladie vos clouë à vostre liët, ou que la mort seule, vous en deliure. En tous ces accidens n'ouurez jamais la bouche que pour prier ce Pere Eternel, que sa Volonté soit accomplie dans vos malheurs, de me- me que dans vos prosperitez. C'est la leçon que mon Sauueur vous a don- nee, d'as l'Eschole de son Iardin d'Oli- uet. Ne l'oubliez pas, puis que vostre salut en depend.

Le second office de la Passion, est vn autre Tableau où la Cruauté, & l'Amour, l'Arrogance, & l'Humilité sont visuellement representees. Car avec
quelle

quelle rage, & avec quelle fureur entreine t'on dás la prifon, ce doux Sauueur, & avec quelle amour fouffret'il cete violence, & cete tyrannie. Quelle fouueraineté, & quel empire n'exercent pas les Iuifs sur cet aymable Redempteur, & quelle humilité, & quelle obeiffance ne leur temoigne t'il dans fa captiuité.

Humiliez vous donc Espritz Arrogans, puis que ce Tout-puissant se rabaisse iusques foubz les pieds de fes ennemis. Vous fait on vn affront. Iettez les yeux de vos penfées sur la jouë de ce doux I E S V S, comme eftant encore enflee du foufflet qu'on luy a donné. Et vous ne vous plaindrez plus de l'iniüre que vous aurez receue.

Le troiziesme Office de la Passion, eft vn troiziesme tableau de tout ce que la fureur a de cruel, & la rage d'inhumain. Representez vous aucunes-fois

fois , au millieu de vos plaisirs, les douleurs, sans nombre, & sans exemple , que ce diuin Redempteur souffre dans le Pretoire de Pilate , ou vne troupe de Bourreaux metent à prix sa peau , & son sang, faisant à l'enuy à qui l'escorche-
ra plustost , & quel d'entreux aura plus de force , pour en briser toutes les veines. Et ie veux croire que changeant tout à coup d'humeur , & d'action , vous n'oyerez vos delices dans vos larmes, & que vos cœurs touchez de pitié, ne parleront plus qu'un langage de regret , & d'ennuy en la Meditation de cest tourmens que mon Dieu endure.

Le quatriesme Office de la Passion nous fait voir à decouuert les entrailles de cet adorable Sauueur , puis qu'il n'a plus de peau sur sa cher, ny de cher sur ses os. Ha cœurs de fer! o Ames de

dé pierre! *Voilà l'homme.* Ne changez vous point de Nature, pour auoir quelque ressentiment? Toutesfois l'aimant attire le fer, & les pierres se fendent de Compassion. Il faut donc se rendre ou à l'amour, ou à la pitié; dans vostre insensibilité mesmes.

Le Cinquiesme Office de la Passion, est vn nouveau sujet d'estonnement, en la Consideration de ce mesme Sauueur. Le voyant acablé soubz le pesant fardeau de sa Croix, & gisant dans la bouë au milieu des Rues de Hierusalem. Toutes les fois que le monde vous tentera de gouter ses ameres douceurs, résistez luy avec la pensee de ces funestes Veritez, & ie vous en prometz la victoire.

Le Sixiesme Office de la Passion est vn Portrait animé de cet amour trois fois adorable de mon Redempteur. Et son sang en est la Couleur, son corps la Toile d'attante, ses cloux les Pinceaux,

aux, & sa Croix la Bordure. N'ayez jamais d'autre objet deuant les yeux. Si vous voulez estre auueugles en presence de ces beautez dont les charmes assujettissent vostre Raison, menant vos Ames en triomphe. Et dans tous les verres de ce nectar imaginaire, qu'on vous presentera, versez y dedans vne goutte du vinaigre, detrempé dans le fiel, qu'on donne à boire à mon Sauueur, afin que le monde ne vous enyure pas. C'est l'vnique Remede à ce mal : C'est le seul port, où il faut aborder pour euitter ces naufrages.

Le dernier Office de la Passion est vn autre portrait de la douleur de la Mere, en la mort de son fils. Mais si la Nature, elle mesmes a imité Thimãte, ayant voilé par vn Eclipse de Soleil le visage de cete Lune, tousiours pleine de Perfection : Je veux dire, de cete Vierge, toute miraculeuse ; Que puis-je

puis-je faire avec le foible Pinceau de ma Plume; Et que pourrez voir aussi dans ce portrait, avec vne pareille foiblesse de vos regards. Seruez vous donc de vos yeux à pleurer, dans leur auueuglement, pour compatir à la douleur de cete Mere toute esplorée. Et par vne Nature contraire à celle de la Piralide, ne pouuant bruler dans le feu pour mourir d'amour, cherchez vn tombeau dans l'eau de vos larmes, & mourez de Regret de voir cete Vierge affligée; pourriez vous pretendre à vn plus glorieux tres-pas?

*Fin du Breviere des Courtisans, acheuë
le samedy seiziesme du mois de
Feburier. 1630.*



